

CENTRALE V. E. II

NAZIONALE

BIBLIOTECA

RA

419

ROMA

CENTRALE V. E. II

1/F

pr. L. 5.000 -
Lucca
Sett. 69



1592


91-9

*... e cithlo an 2. onle d.
... Tortois pesti; a poco a poco me-
... redito an un uadone se lo facc hantile, li falcu e gatan
... tanto puto una di goro amb. et mela di pice gressa in plu
... al voyer la pietra in 40 n.*

*R Poluere fatta di nocciuole salustiche, cioe dlla
... liorta finissima q i. messa in un bichiero
... di vino rosso la sera, et poi si beua la matt.
... il vino con la poluere d'oro, e se sia appa-
... recchiato alquanto g gno si va a dormire
... et le pree più grossa d'un' uono si ridura in' pefetti.
... Per la scolarina delle Reni*

*- R Chiaro d'un ouo di Galina negra, e sbatolo, poi
... la incorporarai an olio rosato a poco a poco lauendo
... continuamente 2. o 3. hore finche si incorpori
... bene et si facci vnguento bianco, col gte vnguento
... il Patiente dalla buca tutto lo spiroso hio a basso
... al pie biando in giù, et il Patiente hia soccorri
... e sta an bi tanto che li vnguento s. imbeua.*

Alto & wayer



Q. Sangue d'una leue et a l'ultima, con onco 7. S.
Satisfagja. Abbiaccia il d'acqua un d'esso cudo,
acis il n. 4. e cimenta in croce. Poi il Patient
se piglia ogni mat. a digiuno un cubito
di d'acqua nell'acqua calda. E uida l'acqua
la pietra, et uinauati.

Ad restringendo l'urinae ex natura. S.
Albomina ouis, reseruiat agitata. Salgia d'aceto,
puluerizata. Poud'acqua rosacea accitata, et fiat
emplastrum d'acqua rosacea et fassid' huius applicet.
Poud' masey et d'acqua rosacea emplastro sic applicet.
The reseruiat. fa rimproverale.

Ad restringendo fluxum sanguinis
Lamentabile puluerizate equinal pudent nuncij
- Hungarian unguis in vino pamp. calido cubito genito.

THEOLOGICAE RESOLUTIONES

EX PENETRALIBVS PERITIO-
rum Theologorum depromptæ,

ET AD COMMODVM STVDIOSO-
rum summa diligentia collectæ:

A REVER. PAVLO FRANZOSO
Benacense, nec non Tridentinæ
diœcesis,

IN COLLEGIVM PATAVINVM
Sacræ Theologiæ cooptato.



B R I X I A E,
APVD POLYCRETVM TVRLINVM.

Permissu Superiorum.

RA 14

THEOLOGICAE

RESOLUTIONES

DE THEOLOGICA PERITO

DE THEOLOGICA PERITO

DE THEOLOGICA PERITO

DE THEOLOGICA PERITO


DE THEOLOGICA PERITO

DE THEOLOGICA PERITO

DE THEOLOGICA PERITO

DE THEOLOGICA PERITO

DE THEOLOGICA PERITO



DE THEOLOGICA PERITO

DE THEOLOGICA PERITO

DE THEOLOGICA PERITO

HA

ILLVSTRISSIMO AC REVERENDISS.

D.D. LVDOVICO MADRVCIO
S. R. E. Cardinali Tridenti
Episcopo,

ET PRINCIPIS OPTIMO,
D. Colendissimo.

Paulus Franzosus. S. P. D.



IBE LLVM resolutionum
Theologicarum (Illustris-
sime Princeps, & Cardina-
lis amplissime) quem in
gratiam, & commodum stu-
diosorū, superioribus men-
sibus, ex vberimis sacrae
Theologiae fontibus hausi, sub tui faustissi-
mi nominis auspicio in lucem proferre sta-
tui, tibi quē potissimum nuncupandum cen-
sui: tum ut, meam, qua te reuereor, singu-
larem obseruantiam tibi patefacerem: tum,
ut aliqua ex parte, propter tua in me meri-
ta, aliquam grati animi significationem da-
rem, penitusq; me amplitudini tuae deditum,

addictum, atque obstrictum esse omnibus testatum relinquerem: tum deniquè vt tuo nomine insignitus Honoratior in lucem exiret. Et cui quæso conuenientius, atq; decentius quàm amplitudini tuæ inscribi poterat? cum innumeras animi virtutes summa cum nobilitate, & dignitate coniunxeris? Taceo hic maiorum tuorum res, præclare & sapienter gestas: Taceo dignitates & legationes, quibus Madruciae Familiæ Heroes fuerunt decoratæ: Taceo miram Prudentiam, spectatissimam fidem, incredibilem constantiam in summis Regum, ac Imperatorum muneribus obeundis: Taceo admirabilem in rebus gerendis vigilantiam, inauditam animi magnitudinem, & in maximis negotijs diiudicandis dexteritatem insignem, non mediocri cum humanitate coniunctam. Etenim cui ~~omnium~~ morum suauitas non est perspecta? cui vitæ totius innocentia, atquè integritas non cognita? cui in probis fouendis, ac literatis promouendis animus propensus non est exploratus? Cui deniquè incredibilis in omnes etiam humiles, & abiectos affabilitas, ac liberalitas est obscura? Hæc sunt splendidissima lumina, quibus actiones tuas illustrissimas reddidisti, hæc insignia, atquè ornamenta, quibus meruisti à

sti à Summis Pontificibus mirabiliter ama-
ri, amplissimis honoribus affici, & supre-
mo Sanctæ Romanæ Inquisitionis Officio
præponi. Quare non mirum si omnes te ad-
mirantur, venerantur, ac summis præco-
nijs extollunt. eo igitur animo pro singu-
lari tua humanitate hosce mearum vigilia-
rum primos labores accipe, quo gratissi-
mo, & libentissimo tibi affero. Vale Ripæ
sexto Kalendas sextilis 1592.

QV AESTIONVM THEOLOGICARVM,

QV AE IN HOC LIBRO
continentur.

I N D E X.



TRVM Deus sit subiectum Theologiae.	pagina. 1
Vtrum in Theologia semper agatur de Deo.	pag. 2
Vtrum Deum esse sit per se notum.	2
Vtrum Deum esse sit demonstrabile.	3
Vtrum Deus sit corpus.	4
Vtrum Deus sit omnino simplex.	5
Vtrum in Deo sint omnes perfectiones.	5
Vtrum omnia, quae sunt, bona sint.	5
Vtrum solus Deus sit bonus per essentiam.	6
Vtrum Deus sit in omnibus rebus, & ubique.	7
Vtrum Deus dicatur esse in Demonibus.	7
Vtrum Deus sit ubique per praesentiam, essentiam, & potentiam.	8
Vtrum Deus sit omnino immutabilis.	9
Vtrum Deus sit eternus.	9
Vtrum Deus sit Vnus.	9
Vtrum Deus possit simul esse Trinus, & Vnus.	10
Vtrum aliquis intellectus creatus possit Deum per essentiam, videre.	12
Vtrum essentia Dei possit videri oculis corporeis.	12
Vtrum intellectus creatus ad videndum Deum indigeat aliquo creato lumine.	13
Vtrum videntium essentiam Dei vnus alio perfectius videat.	14
Vtrum videntes Deum per essentiam ipsum comprehen-	hen-

I N D E X.

pendant.	pag. 15
Vtrum videntes Deum omnia in ipso videant.	pag. 16
Vtrum aliquis in hac vita possit videre Deum.	16
Vtrum Deus comprehendat seipsum.	17
Vtrum intelligere Dei sit aliud quā eius substantia.	17
Vtrum Deus cognoscat alia à se.	18
Vtrum Deus habeat scientiam non entium.	19
Vtrum Deus cognoscat mala.	20
Vtrum Deus singularia cognoscat.	20
Vtrum Deus futura contingentia cognoscat.	21
Vtrum idæ sint.	22
Vtrum in Deo sit voluntas.	23
Vtrum voluntas Dei sit causa rerum.	23
Vtrum voluntas Dei semper impleatur.	24
Vtrum Deus habeat liberum arbitrium.	26
Vtrum Deus æqualiter omnia diligit.	26
Vtrum omnia subiaceant Diuinæ prouidentia.	27
Vtrum homines prædestinentur a Deo.	27
Vtrum Deus aliquem reprobet.	28
Vtrum prædestinatio sit certa.	29
Vtrum Deus sit omnipotens.	30
Vtrum Deus possit facere, & præterita nō fuerint.	31
Vtrum Deus sit beatitudo cuiuslibet beati.	32
Vtrum vna, vel duę sint processiones in Diuinis.	33
Vtrum Deus pater genuerit Deum filium.	33
Vtrum Deus se, vel alium Deum genuerit.	34
Vtrum pater, & filius sit vnum principium Spiritus Sancti.	35
Vtrum patri conueniat mittri.	35
Vtrum creare sit aliquid ex nihilo facere.	36
Vtrum solius Dei sit creare.	36
Vtrum Deus sit causa mali.	37

De Angelis.

Vtrum Angeli, qui naturaliter sunt incorporei, aliquando corpora assumant.	38
--	----

I N D E X

Vtrum Angeli in assumptis corporibus opera vitæ exerceant .	pag. 39
vtrum Dēmones in corporibus assumptis possint generare hominem .	40
vtrum Angelus sit in loco.	41
vtrum Angeli cognoscant cogitationes cordium.	42
vtrum Angelus fuerit ab æterno productus.	42
vtrum Angeli sint creati in Cælo Empyreo.	43
vtrum Angeli sint creati in gratia.	43
vtrum Angeli beati possint peccare .	44
vtrum tot peccauerunt , quot permanferunt .	45
vtrum dolor sit in Dēmonibus .	45
vtrum iste aer sit locus pœnalis Dēmonum .	46
vtrum animę separatę cognoscant ea , quę hic aguntur .	pag. 47
vtrum anima rationalis immediatē à Deo sit producta?	48
vtrum etiam corpus humanum immediatē sit à Deo productum.	49
Quare Deus non creauit simul fœminam , & virū ?	49
Quare mulier specialiter facta est de costâ Adę , & non de aliqua alia parte corporis?	50
Quare potius de latere viri dormientis , quàm vigilantis sumebatur costâ ad formationē mulieris?	50
vtrum de sola costâ mulier formata fuerit .	51
vtrum primus homo omnium scientiam habuerit.	51
Quare Deus hominem tentari permisit , quem decipiendum præsciuit ?	52
Quare Deus creauit illos homines , quos futuros præuidit malos ?	53
Quare Deus non fecit hominem impeccabilem ?	53
Quare Deus , qui potuit illos præseruare , ne consentirent , hoc non fecit ?	53
vtrum Nouem sint ordines seu Chori Angelorū .	54
vtrum homines assumantur ad ordines Angelorum .	54
pagina .	54
vtrum om-	

I N D E X.

Vtrum omnibus hominibus Angeli ad custodiam deputentur.	55
vtrum beatitudo hominis consistat in Deo, an potius in diuitijs.	56
vtrum beatitudo hominis consistat in visione Diuine essentie.	57
vtrum ad beatitudinem hominis requiratur corpus ex necessitate.	57
vtrum vnus homo possit esse beatior altero.	58
vtrum aliquis in hac vita possit esse beatus.	59
vtrum omnis homo appetat beatitudinem.	60
vtrum voluntas sit tantum boni.	60
vtrum voluntas moueatur à corpore cœlesti.	61
vtrum solus Deus sit causa voluntatis.	62
Vtrum solo Deo fruendum sit.	62
vtrum hominibus sit fruendum.	63
vtrum virtutibus sit fruendum.	63
vtrum fides, spes, & charitas sint tres virtutes Theologicę.	64
vtrum fides sit prior spe, & spes charitate.	64
vtrum charitas possit esse sine fide, & spe.	65
vtrum charitas sit maior fide, & spe.	65
vtrum fides, & spes maneant post hanc vitam, sicuti Charitas.	66
vtrum Dona Spiritus sancti remaneant in patria.	67

De vitijs, & peccatis.

Vtrum vitium sit contra naturam.	67
vtrum peccatum simul possit esse cum virtute.	68
vtrum grauitas peccatorum varietur secundum obiecta.	pag. 68
vtrum peccata spiritualia sint maioris culpe, quàm carnalia.	69
vtrum sola voluntas sit subiectum peccati.	70
vtrum etiam in sensualitate possit esse peccatum.	71
pagina.	71

I N D E X

Verum peccatum sit causa peccati.	pag. 73
Vtrum ignorantia sit peccatum.	72
Vtrum Deus sit causa peccati.	73
Vtrum Diabolus sit homini causa peccandi.	74
Vtrum peccatum primi parentis transeat per originem in omnes posteros.	74
Vtrum peccatum originale sit magis in carne, quam in anima.	75
Quare Deus animam carni infundit, præsciens ipsam per carnem fore maculandam?	76
Vtrum anima, dum corpori infunditur, talis sit, qualis à Deo creatur.	76
Vtrum mors, & alij corporales defectus, sint effectus peccati.	pag. 76
Vtrum mors, & ceteri defectus sint homini naturales.	77
Vtrum aliqua macula maneat in anima, post actum peccati.	78
Vtrum omne peccatū inducat reatū pœnæ æternæ.	78
Vtrum peccatum veniale possit fieri mortale.	79
Vtrum primus homo in statu innocentia potuerit peccare venialiter.	80
Vtrum blasphemia sit peccatum mortale.	81
Vtrum peccatum in Spiritum sanctum sit irremissibile.	pag. 81
Quare peccatum primorum parentum remediabile fuit, non autem Angelorum?	83
Quare præsumptio est minus peccatum, quam desperatio?	83
Vtrum desperatio, & præsumptio simpliciter sint causa mortis æternæ.	84
Vtrum peccare sub spe veniæ, semper ad præsumptionem pertineat.	84
Vtrum peccatores sint ex charitate diligendi.	85
Vtrum aliquis possit habere odio seipsum.	86
Vtrum ex necessitate charitatis debeamus diligere inimicos.	86

I N D E X.

Vtrum Demones sint diligendi .	pag. 87
Vtrum Deus magis diligendus sit, quam proximus. 88	
Vtrum quatuor sint diligenda, scilicet Deus, anima propria, proximus, & corpus proprium .	89
vtrum filius magis sit diligendus, quàm pater .	89
vtrum homo magis debeat diligere patrem, quàm matrem .	90
vtrum homo plus debeat diligere vxorem, quàm pa- trem, & matrem .	91
vtrum dare eleemosynam sit in præcepto .	92
vtrum eleemosynę corporales potiores sint, quàm spirituales .	92
vtrum possit fieri eleemosyna de iniuste acquisitis. 93	
vtrum aliquis sub potestate constitutus possit elee- mosynam facere .	94
vtrum correctio fraterna sit actus charitatis. 94	
vtrum licitum sit peccatores occidere .	95
vtrum occidere hominem peccatorem liceat priua- tę personę .	95
vtrum liceat alicui occidere se ipsum .	96
vtrum furtum sit peccatum mortale. 96	
vtrum liceat alicui furari propter necessitatem .	97
vtrum liceat condemnato ad mortem se defendere, si possit .	97
vtrum Aduocatus peccet, si iniustam causam defen- dat .	98

De incarnatione .

Vtrum fuerit conueniens Deum incarnari .	99
Vtrum fuerit necessarium, ad reparationem generis humani, verbum Dei incarnari .	100
vtrũ si homo nõ peccasset Deus fuisset incarnatus. 101	
vtrum principaliter incarnatio Christi facta fuerit ad tollendum peccatum originale, vel actuale. 102	
vtrum vnio animę, & corporis facta fuerit in Chri- sto .	pag. 103
vtrum Di-	

I N D E X

Vtrum Diuinę Naturę conueniat assumere naturam creatam .	pag. 103
vtrum vna persona possit sine alia naturam creatam assumere .	104
vtrum fuerit magis conueniens, quòd persona filij assumeret humanam naturam, quàm alia persona Diuina .	105
vtrum fuerit conueniens, quòd filius Dei humanam naturam assumeret ex stirpe Adæ .	106
vtrum Christus descenderit de Cælo , quantum ad corpus .	106
vtrum filius Dei assumpserit corpus, & aîam simul .	107
vtrum caro prius fuerit à verbo assumpta, quàm animę vnita .	108
vtrum in Christo fuerit fides .	109
vtrum in Christo fuerit spes .	109
vtrum in Christo fuerit gratię plenitudo .	110
vtrum gratia Christi sit infinita .	111
vtrum Christus sit Caput Ecclesię .	112
vtrum Diabolus sit caput omnium malorum .	113
vtrum Christus habuerit aliquam scientiam præter Diuinam .	114
vtrum anima Christi comprehenderit Diuinam Naturam .	115
vtrum anima Christi in verbo omniũ cognouerit .	115
vtrum anima Christi videat verbum , siue Diuinam essentiam clarius qualibet alia creatura .	116
vtrum scientia in Christo fuerit maior scientia Angelorum .	117
vtrum Christus aliquid ad homine didicerit .	118
vtrum Christus aliquid acceperit ab Angelis .	118
vtrum anima Christi simpliciter habuerit omnipotentiam .	119
vtrum filius Dei in humana natura assumere debuerit tit corporis defectus .	119
vtrum Christus defectus corporales contraxerit .	120
vtrum in	

I N D E X.

Vtrum in Christo fuerit peccatum.	pag. 111
vtrum in Christo fuerit ignorantia.	122
vtrum anima Christi fuerit passibilis.	123
vtrum ex necessitate Christus passus fuerit.	123
vtrum in Christo fuerit dolor sensibilis.	124
vtrum in Christo fuerit timor.	124
vtrum in Christo fuerit ira.	125
vtrum Christus sit Creatura.	125
vtrum in Christo sint due voluntates.	126
vtrum humana Christi voluntas omninò fuerit con-	
formis Diuinę voluntati in voluto.	127
vtrum Christus meruerit solùm nobis, & non sibi.	
pagina.	128
vtrum Christo competat orare.	128
vtrum Deo conueniat filios adoptare.	129
vtrum adoptare conueniat toti Trinitati.	130
vtrum Christus possit dici prædestinatus.	130
vtrum Beata Virgo fuerit concepta in peccato origi-	
nali.	131
vtrum Beata Virgo præ ceteris hominibus, maiorem	
gratię plenitudinem à Christo obtinuerit.	135
vtrum Christus sit principium gratię.	135
vtrum Beata Maria fuerit Virgo in concipiendo.	136
vtrum Mater Dei fuerit virgo in partu, & perman-	
serit post partum.	137
vtrum inter Mariam, & Ioseph fuerit verum Matrimo-	
nium.	137
vtrum caro Christi fuerit sumpta de Adam.	139
vtrum fuerit conueniens Christum nasci de fœmina.	
pagina.	140
vtrum Christus debeat dici conceptus de Spiritu	
Sancto.	140
vtrum Spiritus sanctus possit dici pater Christi secun-	
dum carnem.	141
vtrum conceptio Christi fuerit naturalis, vel mira-	
culosa.	142

INDEX.

Vtrum Christo sit attribuenda aliqua natiuitas temporalis.	pag. 143
Vtrum secundum temporalem Christi Natiuitatem, Beata Virgo possit dici Mater eius.	143
vtrum Beata Virgo debeat dici Mater Dei:	144
vtrum fuerit necessarium Christum pati, pro liberatione generis humani.	144
vtrum possibile fuerit, Deum alio modo liberare humanum genus, quàm per Christi mortem.	145
vtrum Deus pater tradiderit Christum passioni.	146
vtrum Iudei bonum fuerint operati, occidendo Christum.	147
vtrum filius Dei mortuus sit.	148
vtrum Christus in Triduo Mortis fuerit homo.	148
vtrum fuerit conueniens, Christum ad infernum descendere.	150
vtrum Christus descenderit ad infernum damnatorum.	152
vtrum Christus fuerit totus in inferno.	152
vtrum Christus descendens ad inferos Sanctos patres inde liberauerit.	153
vtrum statim in Cœlum ascenderint.	154
vtrum Christus in suo descensu liberauerit animas à purgatorio.	155
vtrum fuerit necessarium Christum resurgere.	155
vtrum Christus fuerit causa suæ resurrectionis.	156
vtrum fuerit conueniens Christum ascendere in Cœlum.	157
vtrum Christus ascenderit in Cœlum secundum Diuinam Naturam.	158
vtrum propriè Christo conueniat sedere ad dexteram Dei Patris.	159

De Sacramentis.

Vtrum ex necessitate Sacramenta fuerint instituta ad humanam salutem.	160
---	-----

vtrum Sa-

I N D E X.

Vtrum Sacramenta sint causa gratiæ .	pag. 161
Vtrum Sacramenta nouæ Legis habeant virtutem ex passione Christi .	161
vtrum solus Deus operetur interiorem effectum Sa- cramenti .	162
vtrum Christus potestatem Sacramenta'em potuerit Ministris communicare .	163
vtrum mali ministri possint cōferre Sacramenta.	163
vtrum Angeli possint Sacramenta ministrare .	165
vtrum debeant esse septem Sacramenta Ecclesiæ.	166
vtrum oīa Sacramenta sint de necessitate salutis.	167

De Baptismo .

Vtrum Baptismus sit ipsa ablutio .	pag. 168
Vtrum ad Baptismum requiratur aqua simplex.	169
Vtrum hæc sit conueniens forma Baptismi, ego te ba- ptizo, in nomine patris, & filij, & Spiritus sancti.	169
vtrum vnum tantum, vel plura sint baptismata .	170
vtrum soli præbyteri possint baptizare .	171
vtrum peccatores sint baptizandi .	172
vtrum inuitis parentibus pueri Iudæorum, vel aliorū infidelium sint baptizandi .	173
vtrum paruulus existeret in utero matris possit ba- ptizari .	174
vtrum aliquis posset in articulo necessitatis proijce- re puerum intra puteum, dicendo verba : ego te baptizo &c. ad hunc finem, vt paruulus ille esset baptizatus .	176
vtrum aliquis similiter debeat occidere matrem, vt baptizet puerum .	176
vtrum per Baptismum tollantur omnia peccata .	177
vtrum per baptismum, homo liberetur ab omni rea- tu peccati .	177
Vtrum effectus baptismi sit Apertio Ianuæ Regni Cœlestis .	pag. 178
vtrum Baptismus sit iterabilis .	179
vtrum par-	

I N D E X

vtum paruulus expositus fit baptizandus.	180
vtum in quocunque statu vię, post lapsum, fuerit aliquod Sacramentum institutum.	181

De Confirmatione.

Vtrum Confirmatio sit Sacramentum.	pag. 183
Vtrum Chrisma sit conueniens materia huius Sacramenti.	pag. 184
vtum hoc Sacramentum imprimat characterem.	185
vtum Confirmatio possit ab alio conferri, quàm ab Episcopo.	185
vtum hoc Sacramentũ ad salutẽ sit necessarium.	186
vtum Confirmatio dignior sit Baptismo.	187.

De Sacramento Eucharistię.

Vtrum Eucharistia sit Sacramentum.	188
Vtrum totus Chrs contineat sub hoc Sacramento.	190
vtum totus Christus contineatur sub vtraque specie huius Sacramenti.	191
vtum Corpus Christi sit in hoc Sacramento sicut in loco.	pag. 192
vtum accidentia remaneant sine subiecto in hoc Sacramento.	193
vtum sint duo modi manducandi.	194
vtum Sacerdos debeat denegare Corpus Christi peccatori petenti.	195
Quare Corpus Christi sub aliena specie sumitur?	196

De pœnitentia.

Verum pœnitentia sit Sacramentum.	pag. 196
Verum pœnitentia sit de necessitate salutis.	197
vtum pœnitentia debeat durare vsq; ad finem vitę.	198
vtum remissa culpa per pœnitentiam remaneat reatus pœnæ.	199
vtum peccata dimissa redeant per subsequens peccatum.	200

I N D E X.

Vtrum contritio, confessio, & satisfactio tres sint partes pœnitentiæ.	pag. 201
Vtrum confessio sacramentalis soli Sacerdoti sit facienda.	202
Vtrum aliquis in extremo vitæ suæ agere pœnitentiã possit.	203
Vtrum in aliquo casu, liceat alijs, quàm sacerdotibus confiteri.	205
Vtrum purgatorium sit post hanc vitam.	206
Vtrum pœna purgatorij sit maior quacunq; pœna huius vitæ.	209

De extrema vnctione.

Vtrum extrema vnctio sit sacramentum.	212
Vtrum hoc sacramentum debeat iterari.	213

De Ordine.

Vtrum ordo sit sacramentum.	213
Vtrum septem sint ordines.	214

De Matrimonio.

Vtrum Matrimonium sit sacramentum.	216
Vtrum Matrimonium fuerit ante, vel post peccatum institutum.	217
Vtrum consensus per verba de præsentì expressus sit causa efficiens Matrimonij.	218
Vtrum Matrimonium per verba de futuro sit verum, & ratum Matrimonium.	219
Vtrum fides, proles, & sacramentum sint tria bona coniugij.	220
Vtrum error impediat matrimonium.	220
Vtrum post consensum legitimũ de præsentì, licitum sit alteri, altero inuito eligere monasterium.	221
Vtrum alter coniugum, post copulam carnalem, possit ingredi Religionem.	223

I N D E X

De Resurrectionis , Iudicij & conditione .

V trum resurrectio generalis hominũ sit futura.	224
V trum possit idem homo resurgere.	225
V trũ resurrectio sit naturalis, vel supernaturalis.	227
V trum omnes mortui resoluantur in cineres antequam resurgant.	228
Q uomodo intelligatur Christus iudex viuorum , & mortuorum.	231
V trum idem prorsus homo in eodemq; corpore , quo vixerat , sit resurrecturus .	232
V trum omnes in ætate iuuenili resurgent .	233
V trum animabus , post mortem , receptacula sint assignanda .	234
V trum statim post mortẽ , animæ deducantur ad Cœlum , vel ad infernum.	238
V trum ignis inferni sit corporeus.	239
V trum aĩæ separatae igne illo inferni torqueantur.	240
V trum iudicium vniuersale sit futurum .	242
V trum mundus sit innouandus .	244
V trum motus corporum Cœlestium per illam inno-uationem sit cessaturus .	246
V trum mundus sit per ignem purgandus .	247
V trum Beatitudo Sanctorum sit maior futura post iudicium , quàm ante .	248
V trum Beatitudo solũ sit in patria .	249
V trum damnati vellent plus non esse , quàm esse in miseria poenæ .	251
V trum damnati nolint se peccasse .	254
V trum damnati gloriam beatorum videant , & beati eorum poenam .	255
V trum beati lætentur de poenis damnatorum .	257
V trum damnati habeant Deum odio .	259

F I N I S.



QV AESTIONVM

P R I M A

E S T T A L I S.

Vtrum Deus sit subiectum Theologiæ.

R E S O L V T I O.

DI C E N D U M est secundum D. Bonavent. in prologo primi sent. Q. I. quòd Deus dicitur esse subiectum Theologiæ radicale. Christus verò subiectum integrale. res autem & signa sunt subiectum vniuersale. Deus dicitur subiectum radicale, quia omnia habent ordinem ad Deum, vt ad principium, & ad finem. Christus est subiectum integrale, in quantum comprehendit Diuinam naturam, & humanam, siue creatam, & increatam: res verò, & signa sunt subiectum vniuersale, quia tota sacra scriptura versatur vel circa res, vel circa signa.

2 Quæstionum Theologicarum

Vtrum semper de Deo agatur in
Theologia.

R E S O L V T I O .

Dicendum est, quòd sic, sed diuerso modo.
nam quatuor, sunt Sacræ Theologiæ Tra-
ctatus, in quorum primo agitur de Deo ab-
solutè secundum rationem suæ naturalis perfe-
ctionis. in secundo determinatur de Deo, quatenus
eius potentia relucet in effectu creationis. in Ter-
tio autem tractatur de Deo, in quantum eius sa-
pientia clara est in opere redemptionis. in Quarto
vero, & ultimo agitur de Deo, quatenus eius bo-
nitas, seu clementia refulget in fructu glorifica-
tionis. præterea, in primo agitur de rebus frui-
bilibus. in Secundo de rebus vtibilibus. in Tertiò
de vtibilibus ordinatis ad fruibilia. in Quarto
verò de signis. Vndè manifestum est, quòd in
Theologia semper agitur de Deo, diuersimodè ta-
men, vt dictum est.

Vtrum Deum esse sit per se notum.

R E S O L V T I O .

Dicendum est secundum. D. Tho. in 1. part.
Q. 2. art. 1. quòd hæc propositio, Deus est,
quantum in se, per se nota est: quia præ-
dicatum est idem cū subiecto. Deus enim est suum
esse,

esse, & sua diuina essentia est ipse Deus. sed quia nos ignoramus Deum esse à priori, non est nobis per se nota, sed indiget demonstrari per ea, quæ sunt magis nota quo ad nos, scilicet per effectus, & minus nota quo ad naturam, non quòd natura cognoscat, cum omnis notitia sit nostra, sed quia nos cognoscimus aliquid via, & ordine, quo natura procedit in operando, videlicet à causa ad causatum. Vnde, cum à causa non possimus scire Deum esse, necesse est, quòd à posteriori, .s. ab effectu perueniamus in cognitionem causæ primæ, & vniuersalis, scilicet ipsius Dei Opt. Max. qui prima omnium est entium causa.

Vtrum Deum esse sit demonstrabile.

R E S O L V T I O.

Dicendum est secundum. D. Th. in 1. par. Q. 2. art. 2. quòd duplex est demonstratio. Vna, quæ est per causam, & dicitur propter quid. Alia, quæ est per effectum, & dicitur demonstratio quia: prima est per priora simpliciter, secunda verò est per ea, quæ sunt priora quo ad nos: cum enim effectus aliquis nobis est manifestior, quàm sua causa, per effectum procedimus ad cognitionem causæ. ex quolibet autem effectu potest demonstrari propriam causam eius esse, si tamen (vt dictum est) eius effectus sint ma-

4 Quæstionum Theologicarum.
gis: noti quo ad nos, quia cùm effectus dependant
à causa, posito effectū necesse est causam præexi-
stere. & sic ex effectibus Dei, potest demonstra-
ri Deum esse: nam Deum esse, quatenus non est
per se notum quo ad nos, demonstrabile est per
effectus nobis notos.

Vtrum Deus sit corpus.

R E S O L V T I O.

Dicendum est secundum D. Tho. in 1. part.
Q. 3. art. 1. quòd Deus absolutè non est
corpus, sed purè incorporeus, quòd sic pa-
tet: omne corpus est mobile secundum Philoso-
phum, Deus autem omninò immobilis est, ergo
Deus non est corpus, sed actus purus, incorpo-
reus, & maxime simplex, nam, vt dicitur Io-
an. 4. Deus spiritus est. præterea, nullum cor-
pus mouet nisi moueatur, Deus autem mouet non
motus, ergo Deus non est corpus. Vltèrius, om-
ne corpus habet esse ab alio, Deus autem à nullo
recipit esse, imò ipse est suum esse, & sua diui-
na essentia, & causa prima omnium existentium
in natura creata, ergo Deus non est corpus, sed
penitus incorporeus, independens, actus purus,
& apud quem non cadit transmutatio, nec vicif-
situdinis obumbratio.

Vtrum

Vtrum Deus sit omninò simplex.

R E S O L V T I O.

Dicendum est secundum D. Thom. in 1. part. Quæst. 3. arti. 7. quòd Deus est maximè simplex, quia non est corpus, non est forma, non est materia, deniq; Deus non est creatura aliqua, sed creator omnium, quæ sunt, siue sint corporea, siue sint incorporea. Vndè absolutè dicendum est, quòd Deus sit omninò simplex.

Vtrum in Deo sint omnes perfectiones.

R E S O L V T I O.

Dicendum est secundum D. Thom. in 1. part. Quæst. 4. artic. 2. quòd verè in Deo sunt omnium rerum perfectiones, nam si in re producta reperitur aliqua perfectio, multo magis modo eminentiori debet reperiri in causa producente; sed cum Deus omnium sit causa, sequitur etiam quòd omnes perfectiones modo eminentiori sint in ipso Deo.

Vtrum omnia, quæ sunt, bona sint.

R E S O L V T I O.

Dicendum est, quòd sic, cuius ratio est, quia cum Deus sit bonus, non potest mala per
A 4 ipsum

6 Quæstionum Theologicarum

ipsum creatura produci, ut dicitur in 2. sentent. distinct. 3. Vndè, Sap. Cap. 11. nihil odiſti eorum quæ feciſti. & Gen. 1. vidit Deus cuncta, quæ fecerat: & erant valde bona: & hoc eſt, quia omnia bona ſunt in ſui natura 1. Tim. 4. bona eſt omnis creatura. præterea omne ens per actum, qui actus quadam eſt perfectio, quatenus ens, bonum eſt, quia omne ens eſt tale ut dicit Ariſtoti. in 2. de anima, ergo omne ens eſt bonum quatenus ens eſt, licet reſpectu adiuncti, aliquid ens poſſit eſſe malum. Vndè manifeſtum eſt, quòd omnia, quæ ſunt, quatenus talia ſunt, bona ſunt.

Vtrum ſolus Deus ſit bonus per ſuam
eſſentiam.

R E S O L V T I O.

Dicendum eſt ſecundum Thom. in 1. part. Quæſt. 6. art. 3. quòd ſolus Deus eſt bonus per ſuam eſſentiam; quoniam ſolius Dei eſſentia eſt ſuum eſſe, & cui non adveniunt aliqua accidentia, ſed quòd alijs conuenit accidentaliter, ſibi conuenit eſſentialiter, ut eſſe potentem, ſapientem & huiusmodi; ipſe etiam non ordinatur ad aliud ut ad finem, ſed ipſe eſt finis ultimus omnium rerum. Vndè manifeſtum eſt, quòd ſolus Deus habet omnimodam
perfe-

perfectiorem secundum suam essentiam, & per consequens ille solus est per suam Diuinam essentiam bonus.

Vtrum Deus sit in omnibus rebus & ubique.

R E S O L V T I O .

D*icendum est secundum D. Thom. in 1. part. Quæst. 8. art. 1. & 2. quòd Deum esse in omnibus rebus, & ubique potest considerari dupliciter. Vno modo effectiue (scilicet per modum causæ efficientis) & virtualiter. Alio modo formaliter, & circumscriptiue. Deus igitur primo modo dicitur esse in omnibus rebus, & ubique, quia omnium rerum dicitur esse causa efficiens, & non solum locis, sed etiam omnibus loca replentibus esse tribuit. Secundo autem modo, Deus non est in omni loco, quoniam solum corpus formaliter, & circumscriptiue est in loco. Vnde, cum Deus non sit corpus, sed purè incorporeus, (vt dictum est) consequens est, quòd non sit ubique formaliter, sed solum per modum causæ efficientis, vt dictum est.*

Vtrum Deus dicatur esse in Dæmonibus.

R E S O L V T I O .

D*icendum est secundum D. Tho. in 3. part. Q. 8. art. 1. in resp. ad 4. quòd Dæmones possunt*

8 Quæstionum Theologicarum

possunt considerari dupliciter. Vno modo quatenus sunt res quædam, scilicet creaturæ. Alio modo inquantum sunt demones, scilicet creaturæ, propter culpam, deformes. Si igitur Demones considerentur primo modo, quatenus scilicet sunt creaturæ quædam; sic Deus dicitur esse in Dæmonibus, cum sit in omnibus rebus creatis. si verò considerentur Demones secundo modo, quatenus scilicet deformes sunt per culpam: sic Deus non est in Dæmonibus.

Vtrum Deus sit vbique per præsentiam, essentiam, & potentiam.

R E S O L V T I O.

Dicendum est secundum Thom. in 1. par. Q. 8. art. 3. quòd solus Deus dicitur esse in omnibus rebus creatis per potentiam, præsentiam, & essentiam; per potentiam quidem, in quantum omnia ipsi Deo subduntur; per præsentiam, in quantum omnia nuda, & aperta sunt oculis eius: per essentiam quatenus omnia, quæ sunt, habent esse ab ipso Deo, qui est ipsamet sua essentia, & causa omnium existentium in natura creata.

Vtrum

Vtrum Deus sit omnino immutabilis .

R E S O L V T I O .

Dicendum est secundum *D. Thom.* in 1. part. Q. 9. art. 1. quòd Deus omninò immutabilis est, vt dicitur *Mal. 3.* ego Deus & non mutator . præterea , Deus est actus purus absque permissiōe alicuius potentiæ , ergo immutabilis est , nam quòd mutatur , est aliquo modo in potentia . ex quo patet , quòd impossibile est Deum aliquo modo mutari .

Vtrum Deus sit æternus .

R E S O L V T I O .

Dicendum est secundum *Thom.* in 1. part. Q. 10. art. 2. quòd soli Deo propriè conuenit æternitas , quia ratio æternitatis consequitur immutabilitatem , sicut ratio temporis consequitur motum ; Vnde , cum Deus sit maximè immutabilis , sibi etiam maximè competit esse æternum . nec solum est æternus ; sed est sua ipsamet æternitas , sicut sua essentia .

Vtrum Deus sit vnus .

R E S O L V T I O .

Dicendum est secundum *D. Tho.* in 1. part. Q. 11. art. 3. & *D. Bonauent.* in 1. sent. dist.

dist. 2. Q. 1. & Scotum ibidem Q. 3. quòd tantum vnus est Deus, secundum illud Ephes. 4. vnus Deus, vna fides, vnum baptisma, & Deuter. 6. Audi Israel, Dominus Deus tuus Vnus est. Vndè simpliciter, secundum fidem Catholicam, credere, & affirmare debemus, Deum essentialiter esse tantum Vnum, quoniam diuina essentia est vna, & si plures essent diuinæ essentia, plures essent Dij: quòd omninò negandum est: nam oporteret eos adinuicem differre, sed cum in Deo nulla sit differentia, nec essentialis, neque accidentalis, sequitur dicendum, quòd tantum vnus sit Deus.

Vtrum Deus possit simul esse Trinus,
& Vnus.

R E S O L V T I O.

Dicendum est secundum Magist. in 1. sent. dist. 2. & Scotum ibidem Q. 4. quòd sic dixit enim Deus Gen. 1. Faciamus hominem ad imaginem, & similitudinem nostram. Ideò per hoc, quòd dicit faciamus, & nostram, ostenditur pluralitas personarum: per hoc verò, quòd dicit, ad imaginem, ostenditur vnitas essentia: quia secundum Hilarium, vbi est imago, & similitudo solet esse vnitas charitatis. confirmatur hoc etiam aut, noui Testamenti, inquit

quit enim Ioannes in Epistola Canonica 1.c.5. Tres sunt, qui testimonium perhibent in Cœlo, Pater, Verbum, & Spiritus Sanctus: & hi tres Vnum sunt. Vndè, quilibet catholicus firmiter credere debet, Deum esse Trinum, & Vnum, Trinum in personis, Vnum verò in essentia: neque aliqua est contradictio, nam possibile est (vt dicit Scotus loco citato) cum vnitatem Diuinæ essentiae pluralitatem esse personarum, ratio est, quia contradictio secundum Arist. est affirmatio, & negatio eiusdem rei, & nominis, Ideo Vnitas, & Pluralitas personarum, non sunt secundum Idem, quia vnitas est secundum essentiam, & pluralitas, est secundum personas; Vndè, non est pluralitas & vnitas secundum Idem, quia essentia Diuina, & persona distinguuntur ex natura rei, vel formaliter secundum nos, ad contradictionem autem requiritur non solum identitas rei, sed etiam nominis. exemplum primi, Marcus currit, Cicero non currit, licet res sit eadem non tamen vox. exemplum secundi. Vnita essentia, & pluralitas personarum, licet sit idem re, non tamen est identitas nominis, quod requiritur ad contradictionem. Vndè, manifestum est, quod Deus, sine contradictione aliqua, potest esse simul Trinus, & Vnus.

Vtrum aliquis intellectus creatus possit
videre Deum per essentiam.

R E S O L V T I O.

Dicendum est secundum Thom in 1. part.
Q. 12. art. 1. quod sic, dicitur enim 1.
10. 1. videbimus enim sicuti est: Deus au-
tem est sua diuina essentia, & sua essentia est
ipse Deus, ergo intellectus creatus potest Deum
per essentiam videre. præterea, si intellectus crea-
tus nunquam essentiam Dei videret, vel nunquam
Beatitudinem obtineret, vel in alio eius Beatitu-
do consisteret, quam in Deo, quod est alienum à
fide; in ipso enim est vltima perfectio rationalis
creaturæ. præterea, vnumquodque perfectum est
in quantum ad suum principium attingit, si igitur
intellectus rationalis creaturæ pertingere non
possit ad primam causam rerum, remanebit ina-
ne desiderium Naturæ. Vndè concedendum est,
quod Beati Dei essentiam videant.

Vtrum essentia Dei possit videri oculis
corporeis.

R E S O L V T I O.

Dicendum est secundum. D. Thom. in 1.
part. Q. 12. art. 3. quod impossibile est,
Deum videri sensu visus, vel quocunque
alio

alio sensu ; nam omnis actus proportionatur ei cuius est actus , sed cum potentia visiva non se extendat ultra corporalia ; sequitur dicendum , quod nec essentia Dei oculis corporis videri possit , cum Deus sit maximè incorporeus , ut supra ostensum est . Vndè , nec sensu , nec imaginatione , essentia Dei videri potest , sed solo intellectu .

Vtrum intellectus creatus ad videndum Deum indigeat aliquo creato lumine .

R E S O L V T I O .

D*icendum est secundum Thom. in 1. part. Quæst. 12. artic. 5. quod sic , nam omne quod eleuatur ad aliquid , quod excedit suam Naturam , oportet quod disponatur aliqua dispositione , quæ sit supra suam naturam : sicuti , si aer debeat accipere formam ignis , oportet quod disponatur aliqua dispositione ad talem formam . cum igitur intellectus creatus videt Deum per essentiam , ipsa essentia Dei sit forma intelligibilis ipsius intellectus . Vndè , oportet , quod aliqua dispositio supernaturalis ei superaddatur ad hoc quod eleuetur in tantam sublimitatem ; virtus enim naturalis ipsius intellectus creati non sufficit ad essentiam Dei videndam , & cum non*
suffi-

sufficiat, oportet quòd ex diuina gratia super accrescat ei virtus intelligendi ad hoc, quòd intellectus fiat potens ad videndam Dei essentiam. Vnde, manifestum est, quòd intellectus creatus aliquo indiget creato lumine ad essentiam Dei videndam.

Vtrum videntium essentiam Dei vnus alio perfectius videat.

R E S O L V T I O.

Dicendum est secundum D. Thom. in 1. par. Q. 12. art. 6. quòd sic. animatuertendum tamen est, quòd hoc non erit per aliquam Dei similitudinem perfectiorem in vno, quàm in alio, cum illa visio non sit futura per aliquam similitudinem; sed hoc erit per hoc, quia intellectus vnus habebit maiorem virtutem, seu facultatem ad videndum Deum, quàm alterius. facultas autem videndi Deum non competit intellectui creato secundum suam essentiam, vel naturam: sed per lumen gloriæ: quod intellectus in quadam Deiformitate constituit, vt dictum est. Vnde intellectus plus participans de lumine gloriæ, perfectius Deum videbit: plus autem participabit de lumine gloriæ, qui plus habet de charitate: quia vbi est maior charitas, ibi est maius desiderium: desiderium verò quodammodo

*modo facit desideratum aptum, & paratum ad
suspceptionem desiderati. Vnde, relinquitur, quod,
qui maiorem habuerit charitatem, perfectius Deū
videbit, & beatior erit.*

*Vtrum videntes Deum per essentiam ip-
sum comprehendant.*

R E S O L V T I O.

D*icendum est secundū Th. in 1. part. Q. 12.
art. 7. quod comprehendere Deum impos-
sibile est cuicunque intellectui creato, ra-
tio est ista, quia sicuti Deus est infinitus, simili-
ter etiā infinita est cognitionis, & per consequens
incomprehensibilis est. vnumquodque enim co-
gnoscibile est, quatenus actu ens est: Deus igitur
cuius esse est infinitum, infinitè cognoscibilis est,
Nullus autem intellectus creatus potest Deum
infinitè cognoscere; nam in tantum intellectus
creatus diuinam essentiam, perfectius, vel mi-
nus perfectè cognoscit, in quantum maiori, vel
minori lumine perfunditur gloriæ: cū igitur
lumen gloriæ creatum in quocunque intellectu
creato receptum, non possit esse infinitum, impos-
sibile est, quod aliquis intellectus creatus Deum
infinitè cognoscat. Vnde, impossibile etiam est,
quod Deum comprehendat.*

Vtrum videntes Deum omnia in ipso
videant.

R E S O L V T I O.

Dicendum est secundum D. Th. in 1. part.
Q. 12. art. 8. quòd non, nam sicuti nullus
intellectus creatus totaliter Deum compre-
hendere potest, vt dictum est, similiter nullus in-
tellectus creatus, videndo Deum, potest cognosce-
re omnia, quæ Deus facit, vel facere potest. hoc
enim est comprehendere eius virtutem. & sic ma-
nifestum est, quòd nullus intellectus creatus, vi-
dendo Deum, potest omnia, quæ in Deo sunt, vide-
re; sed horum, quæ Deus facit, vel facere potest
tanto aliquis intellectus plura cognoscit, quanto
perfectius Deum videt.

Vtrum aliquis in hac Vita possit videre Deū.

R E S O L V T I O.

Dicendum est secundum D. Th. in 1. part.
Q. 12. art. 11. quòd ab homine puro Deus
videri non potest, nisi ab hac vita mortali
separetur. cuius ratio est; quia modus cognitionis
sequitur modum naturæ rei cognoscentis: Anima
autem nostra, quamdiu in hac vita viuimus, ha-
bet esse in materia corporali. Vnde naturaliter non
cognoscit aliqua, nisi quæ habent formam in ma-
teria:

teria: vel quæ per huiusmodi cognosci possunt. Manifestum autem est quòd Deus est incorporeus, independens, & actus purus; ergo per naturas rerum materialium cognosci non potest. Vndè relinquitur, quòd anima nostra, quamdiu hac vita mortali utitur, videre Deum nullo modo possit.

Vtrum Deus comprehendat seipsum.

R E S O L V T I O.

D Icendum est secundū Th. in 1. par. Q. 14. art. 3. quòd sic, nam omne, quod intelligit se, comprehendit se: ut dicit Aug. sed Deus intelligit se, igitur Deus comprehendit se. præterea, quando res cognoscitur, ita perfectè, sicuti cognoscibilis est, comprehenditur: sed cum Deus ita perfectè cognoscat seipsum, sicuti perfectè cognoscibilis est, necesse etiam est, quòd perfectè seipsum comprehendat. Vndè, manifestum est, quòd tantum seipsum cognoscit, quantum cognoscibilis est. & propter hoc, seipsum perfectè comprehendit.

Vtrum intelligere Dei sit aliud quàm eius substantia.

R E S O L V T I O.

D Icendum est secundum D. Th. in 1. part. Q. 14. art. 4. quòd intelligere Dei non

18 *Quæstionum Theologicorum*
est aliud, quàm eius substantia; nam in Deo
non est forma, quæ sit aliud, quàm suum esse.
Vndè cum ipsa sua essentia etiam sit species in-
telligibilis, ex necessitate sequitur, quòd ipsum
eius intelligere sit eius essentia, & eius esse. in
Deo enim intellectus, & id quòd intelligitur,
& species intelligibilis, & ipsum intelligibile,
& ipsum intelligere, sunt omninò vnum, &
idem. & sic intelligere Dei non est aliud, quàm
eius substantia.

Vtrum Deus cognoscat alia à se.

R E S O L V T I O.

Dicendum est secundum Tb. in I. par. Q. 14.
art. 5. quòd sic. nam cum Deus se exten-
dat ad alia à se, eo quòd ipse est prima
causa effectiua omnium rerum, consequens est,
quòd etiam alia à se cognoscat, non in seipsis, sed
in seipso, in quantum. s. essentia sua continet si-
militudinem aliorum ab ipso. Vndè, quicumque
effectus præexistunt in Deo, sicut in causa prima,
necesse est, quòd sint in ipso eius intelligere: &
quòd omnia in eo sint secundum modum intelli-
gibilem, nam omne, quòd est in alio, est in eo se-
cundum modum eius, in quo est.

Vtrum

Vtrum Deus habeat scientiam non
entium.

R E S O L V T I O .

Dicendum est secundum D. Th. in 1. part.
Q. 14. art. 9. quòd Deus scit omnia,
quæ sunt quocunque modo. ea verò, quæ
simpliciter non sunt, nihil prohibet aliquo mo-
do esse; nam simpliciter sunt, quæ actu sunt,
illa verò quæ non sunt actu, sunt in potentia,
vel ipsius Dei, vel creaturæ: siue in potentia
actiua, siue in passiuā: siue in potentia opinan-
di vel imaginandi: vel quocunque modo signi-
ficandi. quæcunque igitur possunt per creatu-
ram fieri, vel cogitari, vel dici, & etiam quæ-
cunque ipse facere potest, omnia cognoscit Deus:
etiam si actu non sint secundum illud Apost. ad
Rom. 4. qui vocat ea, quæ non sunt, tanquam ea,
quæ sunt. & pro tanto dici potest, quòd Deus ha-
bet etiam scientiam non entium. sed horum quæ
actu non sunt, est attendenda quædam diuersitas.
Quædam enim licet non sint nunc in actu, tamen
vel fuerunt, vel erunt: & omnia ista Deus dici-
tur scire scientia visionis. quædam verò sunt, quæ
sunt in potentia Dei, vel creaturæ, quæ tamen nec
sunt, nec erunt, neque fuerunt; & respectu ho-

20 Quæstionum Theologicarum
rum non dicitur habere scientiam visionis, sed
simplicis intelligentiæ.

Vtrum Deus cognoscat mala.

R E S O L V T I O.

Dicendum est secundum Thom. in 1. part.
Q. 14. art. 10. quod sic, nam quicumque
perfectè cognoscit aliquid, oportet quod
cognoscat etiam ea omnia, quæ possunt illi acci-
dere. sunt autem quædam bona, quibus acci-
dere potest, ut per mala corrumpantur: Vn-
dè, Deus non perfectè cognosceret bona, nisi e-
tiam cognosceret mala. Sic autem, unumquod-
que est cognoscibile, secundum quod est: Vndè,
cùm hoc sit esse mali, quod est priuatio boni,
per hoc ipsum quod Deus cognoscit bona, co-
gnoscit etiam mala, sicuti per lucem cogno-
scuntur tenebræ.

Vtrum Deus singularia cognoscat.

R E S O L V T I O.

Dicendum est secundum Thom. in 1. part.
Q. 14. art. 11. quod sic, nam omnes per-
fectiones in creaturis inuentæ, in Deo
præexistunt secundum altiorem modum; sed co-
gnoscere singularia pertinet ad nostram perfe-
ctionem:

*tionem : ergo necesse est , quòd Deus singula-
ria cognoscat . Nam & Philosophus pro in-
conuenienti habet , quòd aliquid cognoscatur à
nobis , quòd non cognoscatur à Deo . præterea ,
Deus cùm sit primum principium rerum om-
nium , necesse est etiam , quòd sit principium
sufficiens omnia cognoscendi , quæ per ipsum
fiunt , non solùm in vniuersali , sed etiam in sin-
gulari . relinquitur ergo , quod Deus singula-
ria cognoscat .*

**Vtrum Deus futura contingentia co-
gnoscat .**

R E S O L V T I O .

Dicendum est secundum Th. in 1. part.
Q. 14. art. 13. quòd sic , nam cùm Deus
sciat omnia , non solùm quæ actu sunt ,
sed etiam quæ sunt in potentia sua , vel creatu-
ræ , (horum autem quædam sunt contingentia
nobis futura) necesse est , quòd etiam futura
contingentia cognoscat : sciendum tamen est , quòd
licet contingentia fiant in actu successiuè , non
tamen Deus successiuè contingentia cognoscit ,
pro vt sunt in suo esse , sicut nos , sed simul :
quia sua cognitio mensuratur Aeternitate , si-
cuti etiam suum esse . Aeternitas verò tota si-
mul existens ambit totum tempus . Vndè om-

nia, quæ sunt in tempore, sunt Deo ab æterno præsentia, & sic manifestum est, quod contingentia infallibiliter à Deo cognoscuntur: in quantum subduntur Diuino conspectui, secundum suam præsentialitatem, & tamen sunt futura contingentia, suis causis comparata.

Vtrum Ideæ sint.

R E S O L V T I O.

Dicendum est secundum Th. in 1. par. 2. 15. art. 1. quod necesse est ponere in mente Diuina Ideas. Idea enim Græcè, Latine forma dicitur. Vnde per Ideas intelliguntur formæ aliarum rerum præter ipsas res existentes: forma verò alicuius rei præter ipsam existens potest considerari dupliciter; vel ut sit exemplar eius, cuius dicitur forma: vel ut sit principium cognitionis ipsius, quatenus scilicet formæ cognoscibilem dicuntur esse in cognoscente. & quantum ad vtrumque necesse est ponere Ideas: quod sic patet. in omnibus, quæ non à casu generantur, necesse est formam esse finem cuiuscunque generationis. Agens autem non ageret propter formam, nisi quatenus similitudo formæ est in ipso, quod quidem contingit dupliciter. in quibusdam enim Agentibus præexistit forma rei fiendæ secundum esse naturale, sicut in his, quæ agunt per naturam; sicut

sicut homo generat hominem, & ignis ignem. in quibusdam verò secundum esse intelligibile, ut in his, quæ agunt per intellectum, sicut similitudo Domus præexistit in mente Aedificatoris; & hæc potest dici Idea Domus: quia Artifex intendit Domum assimilare formæ, quam mente concepit. quia igitur mundus non est casu factus, sed est factus à Deo per intellectum agentem, necesse est quòd in mente Divina sit forma, ad similitudinem cuius mundus factus est. & in hoc consistit ratio Ideæ.

Vtrum in Deo sit voluntas.

R E S O L V T I O.

Dicendum est secundum Th. in 1. part. Q. 19. art. 1. quòd sic, nam ubi est intellectus, ibi etiam necessariò est voluntas, sed in Deo est intellectus, ergo & voluntas. voluntas enim intellectum consequitur. Vndè, oportet in Deo esse voluntatem, cum sit in eo intellectus. & sicut suum intelligere est suum esse, ita suum velle.

Vtrum Voluntas Dei sit causa rerum.

R E S O L V T I O.

Dicendum est secundum. D. Th. in 1. part. Q. 19. art. 14. quòd sic, nam Deus agit per voluntatem,

tatem, non per necessitatem naturæ, quia effectus procedunt à causa agente, secundum quod præexistunt in ea: eo quòd omne agens agit sibi simile. præexistunt autem effectus in causa secundum modum causæ. Vnde cum esse diuinum sit ipsum eius intelligere: præexistunt in eo effectus eius secundum modum intelligibilem, & per modum intelligibilem procedunt ab eo, & sic per consequens per modum voluntatis. Nam inclinatio eius ad agendum, quòd intellectu conceptum est, pertinet ad voluntatem. Voluntas igitur Dei est causa rerum.

Vtrum Voluntas Dei semper impleatur.

R E S O L V T I O.

Dicendum est secundum Mag. in 1. sent. dist. 47. & D. Thom. in 1. part. Q. 19. art. 6. quòd voluntas Dei semper impletur: & ratio huius est, quia quamuis contingat aliquid fieri extra ordinem alicuius causæ particularis Agentis, non tamen fit aliquid extra ordinem alicuius causæ vniuersalis, sub qua omnes causæ particulares comprehenduntur: quia si aliqua causa particularis deficiat à suo effectu, hoc est propter aliquam aliam causam particularem impediens, quæ continetur sub ordine causæ vniuersalis. Vnde, effectus nullo modo ordinem

ordinem causæ vniuersalis exire potest. Cum igitur *Voluntas Diuina* sit vniuersalis causa omnium rerum, impossibile est, quod *Dei voluntas* suum effectum non consequatur. & Ideo quod recedere videtur à *Diuina voluntate* secundum vnum ordinem, relabitur in ipsam secundum alium. sicut peccator, qui quantum est in se, recedit à *Diuina voluntate*, peccando, tamen incidit in ordinem *Diuinæ voluntatis*, Dum per eius *Iustitiam* punitur; nam qui bona egerunt, ibunt in vitam æternam: qui verò mala in ignem æternum. nec obstat illud *Apost.* quod *Deus* velit omnes homines saluos fieri, quoniam intelligitur de voluntate antecedente, non de consequente. exemplum de primo modo. *Iudex Iustus*, vult omnem hominem viuere, scilicet antecedenter. exemplum secundi. *Iudex Iustus* vult homicidam suspendi, scilicet voluntate consequente. similiter *Deus* antecedenter vult omnem hominem saluari, sed consequenter vult quosdam damnari, secundum exigentiam suæ iustitiæ.

Vnde manifestum est, quod voluntas
Dei semper impletur.

R E S O L V T I O.

Dicendum est secundum Th. in 1. part. Q. 19. art. 10. quod sic, nam cum Deus ex necessitate velit suam bonitatem, alia verò à se non ex necessitate, necesse est, quod respectu horum habeat liberum arbitrium; ratio est, quia liberum arbitrium est eorum, quæ non necessariò, vel instinctu naturali sunt volita; non enim animalia, quæ naturali instinctu mouentur ad aliquid, dicuntur libero arbitrio moueri. Deus itaque habet liberum arbitrium, vt dictum est.

Vtrum Deus æqualiter omnia diligat?

R E S O L V T I O.

Dicendum est secundum D. Th. in 1. part. Q. 20. art. 3. quod cum amare sit velle bonum alicui, duplici ratione potest aliquid magis, vel minus amari. Vno modo ex parte ipsius actus voluntatis, qui est magis, vel minus intensus, & sic Deus non magis quædam alijs amat, quia omnia amat vno, & simplici actu voluntatis, & semper eodem modo se habente. Alio modo ex parte ipsius boni, quod aliquis vult amato. & sic dicimur aliquem magis alio amare, cui volumus maius bonum; quamuis non magis

gis intensa voluntate. & hoc modo Deus quædam alijs magis amat. cum enim amor Dei sit causa bonitatis rerum, vt dictum est, non esset aliquid alio melius, si Deus nollet vni maius bonũ, quàm alteri; Vnde, videmus, quòd rationabilia Deus ordinauit ad Vitam eternã, non autem irrationabilia.

Vtrum omnia subiaceant Diuinæ
prouidentia,

R E S O L V T I O.

Dicendum est secundum Th. in 1. part. Q. 22. art. 2. quòd sic, nam cum prouidentia nihil aliud sit, quàm ratio ordinis rerum in finem, necesse est, omnia, inquantum participiant esse, intantum subdi Diuinæ prouidentia. similiter dictum est, quòd Deus omnia cognoscit, & vniuersalia, & particularia. & cum eius cognitio comparetur ad res, sicut cognitio artis comparatur ad artificia, necesse est, quòd omnia supponantur suo ordini, sicut omnia artificia subduntur ordini artis. Omnia itaque subiacent Diuinæ prouidentia.

Vtrum homines prædestinentur à Deo.

R E S O L V T I O.

Dicendum est secundum Th. in 1. part. Q. 23. art. 1. quòd maximè conueniens est Deo hominem

minem prædestinare : ratio autem huius est , quia omnia diuinæ prouidentia subiacent : ad prouidentiam autem pertinet res in finem ordinare , finis autem , ad quem res creata ordinantur à Deo , est duplex . Vnus qui excedit proportionem naturæ creatæ , & facultatem ; & iste finis est Vita æterna , quæ in diuina visione consistit , quæ est supra naturam cuiuslibet creaturæ . Alius autem finis est Naturæ creatæ proportionatus , quem scilicet res creata attingere potest secundum virtutem suæ naturæ . cum igitur rationalis creatura . propriè loquendo , non possit virtute suæ naturæ in tantam sublimitatem peruenire , necesse est , quòd ab alio . s. à Deo transmittatur : cuius quidem ratio transmissionis in Deo præexistit , sicut & in eo est ratio ordinis omnium in finem , quam prouidentiam vocamus . Vnde , ratio prædictæ transmissionis creaturæ rationalis in finem Vitæ æternæ , prædestinatio nominatur . & sic manifestum est , quòd à Deo homines prædestinantur .

Vtrum Deus aliquem reprobet .

R E S O L V T I O .

Dicendum est secundum D. Th. in 1. part. Q. 23. art. 3. quòd sic , nam (vt dictū est) prædestinatio est pars prouidentia: ad prouidentiam autem pertinet permittere aliquem deffectum

defectum in rebus, quæ providentiæ subduntur. Undè, cum per diuinam providentiam, homines in vitam æternam ordinentur, pertinet etiam ad Diuinam providentiam, vt permittat aliquos ab hoc fine deficere; & hoc dicitur reprobare. sic igitur, sicut prædestinatio est pars providentiæ respectu eorum, qui diuinitus ordinantur in æternam salutem: ita reprobratio est pars providentiæ respectu illorum, qui ab hoc fine decidunt. & sicut prædestinatio includit voluntatem conferendi gratiam, & gloriam; ita reprobratio includit voluntatem permittendi aliquem cadere in culpam, & inferendi Damnationis pœnam pro culpa.

Vtrum prædestinatio sit certa.

R E S O L V T I O.

Dicendum est secundum eundem Th. in 1. part. Q. 23. art. 6. quòd prædestinationem esse certam contingit dupliciter, vel ex parte prædestinantis, scilicet ipsius Dei; & sic est certa, & infallibilis. Deus enim vult omnes homines saluos fieri. vel ex parte ipsius prædestinati, scilicet ex parte nostri liberi arbitrij, quod cōtingenter se habet ad prædestinationem; & sic prædestinatio est incerta, nec inponit necessitatē. Undè quamuis prædestinatio ex parte sui certissime, & infallibiliter consequatur suū effectum, non tamen

tamen imponit necessitatem, ut scilicet effectus eius ex necessitate proveniat. De numero autem omnium prædestinatorum quis sit: dicunt quidam, quòd tot homines saluabuntur, quot remanserunt Angeli, quidam verò, quòd tot homines saluabuntur, quot Angeli ceciderunt. Sed melius dicitur, quòd soli Deo est cognitus numerus electorum in superna felicitate locandus.

Vtrum Deus sit omnipotens.

R E S O L V T I O.

Dicendum est secundum D. Th. in 1. part, Q. 25. art. 3. quòd Deum esse omnipotentem considerari potest dupliciter. vel in rebus possibilibus, & factibilibus, quæ nec in seipsis, nec in Deo implicant contradictionem aliquam: sic Deus dicitur omnipotens. vel ipsum esse omnipotentem in rebus, quæ vel in seipsis, vel in Deo contradictionem implicant: & sic Deus non dicitur omnipotens. Deus enim non potest facere rem aliquam, quæ in seipsa implicat contradictionem. non enim potest facere hominem, sine anima rationali, nec parietem album sine albedine. similiter Deus non potest aliquod, quod in seipso contradictionem implicat: non enim potest Deus, quatenus Deus est, peccare, mori, & huiusmodi, cum omnino hoc sit impossibile. imò dico, quòd si mori, & pecca-

& peccare posset Deus, non omnipotens, sed potius impotens esse diceretur. Unde, concludendum est, quòd Deus potest omnia possibilia non implicanti contradictionem.

Vtrum Deus possit facere, quòd praterita non fuerint.

R E S O L V T I O.

Dicendum est secundum D. Th. in 1. part. Q. 25. art. 4. quòd sub omnipotentia Dei non cadit aliquid, quod contradictionem implicat, ut dictum est; praterita autem non fuisse, contradictionem implicat: ergo Deus facere non potest, quòd praterita non fuerint. Sicuti. n. contradictionem implicat dicere, quòd Socrates sedet, & non sedet, ita quòd sederit, & non sederit. nam contradictio secundum Arist. in 1. de interpret. est affirmatio; & negatio eiusdem subiecti, & pradicati. Ideò sine dubio, ut sonat auribus, maximè implicat contradictionem, dicere quòd praterita non fuerint; prateritum enim idè est prateritum, quia fuit; sed dicere quòd prateritum non fuerit, est dicere quòd prateritum non sit prateritum, quòd omninò est impossibile. praterea, sciendum est, quòd illa, quæ dicuntur impossibilia secundum aliquam potentiam scilicet naturalem, possibilia tamen sunt secundum potentiam

32 **Questionum Theologicarum**

Divinam; veluti mortuos resurgere, cum non implicet contradictionem. Unde, licet Deus. v. g. omnem possit corruptionem mentis, & corporis à muliere corrupta auferre, non tamen potest facere, quod corrupta non fuerit, vel quod homo, qui resurrexit non fuerit mortuus, sicut etiam ab aliquo peccatore auferre non potest, quod non peccaverit, & quod charitatem non amiserit, cum omnia hæc implicent contradictionem.

Vtrum Deus sit Beatitudo cuiuslibet beati.

R E S O L V T I O.

Dicendum est secundum Th. in 1. par. Q. 26. art. 3. quod in Beatitudine duo possunt considerari, scilicet obiectum actus, quod est intelligibile, & ipse actus, qui est intelligere. si Beatitudo consideretur ex parte ipsius obiecti; sic Solus Deus est beatitudo cuiuslibet beati: nam ex hoc solo est aliquis beatus, quia Deum intelligit, secundum illud Aug. beatus est, qui te novit etiam si alia ignoret. si verò ex parte actus intelligentis, Beatitudo est quid creatum in creaturis beatis, in Deo autem secundum hoc aliquid increatum. Beatitudo ergo, quantum ad obiectum, est summum bonum simpliciter, nempe Deus: sed quantum ad actum in creaturis beatis, est summum bonum: non simpliciter, sed in genere bonorum participialium à creatura.

Vtrum

Vtrum vna, vel duæ sint processiones
in Diuinis.

R E S O L V T I O.

Dicendum est secundum D. Th. in 1. part. Q.
27. art. 5. quòd duæ tantùm sunt proces-
siones in Diuinis. Vna Verbi. altera ve-
rò Amoris. ratio huius est, quia duo tantùm sunt
procedentes scilicet Filius, & Spiritus Sanctus,
Filius procedit per modum naturæ: Spiritus San-
ctus verò per modum voluntatis. præterea, pro-
cessiones Diuinæ non possunt accipi nisi secundum
actiones immanentes, quæ, cùm in Diuina Natu-
ra sint tantùm duæ, scilicet intelligere, & velle,
necesse est, quòd etiam duæ tantùm sint processio-
nes in Diuinis, vna scilicet Verbi, alia verò Amo-
ris. vt dictum est.

Vtrum Deus pater genueret Deum filium.

R E S O L V T I O.

Dicendum est Catholicè secundum omnes
Doct. quòd Deus pater ab æterno genuit
Deum filium, vt in symbolo scriptum est.
Lumen de lumine, Deum, verum de Deo vero. qui
pater nunquam fuit sine filio, nec filius sine patre;
nam personæ Diuinæ sunt sibi inuicem coæternæ,
secundum illud Athan. Pater est æternus, æternus

est Filius, æternus est Spiritus Sanctus, non tamen tres æterni sed vnus æternus Deus. Relinquitur ergo, quòd filius à solo patre sit, non factus, nec creatus, sed genitus.

Vtrum Deus se, vel alium Deum genuerit.

R E S O L V T I O.

Dicendum est secundum Magist. in 1. sent. dist. 4. quòd Deus nec se, nec alium Deum genuit. Nam quamuis ab æterno Deus pater genuerit Deum filium, non tamen genuit seipsum, vel alium Deum in essentia, sed genuit alium in persona. Vndè, Magist. sent. ibi hanc proponit Quæstionem. si Deus genuit Deū, aut igitur Deus pater genuit Deum, qui est Deus pater; & sic genuit seipsum: aut Deus pater genuit Deum, qui non est Deus pater; & sic genuit alium Deum. sed ipsemet soluit, dicendo, quòd illa propositio, quæ dicit, Deus pater genuit Deum, qui non est Deus pater, potest duos habere sensus; quorum primus est, Deus pater genuit Deum, qui nō est Deus pater, scilicet filium, qui filius non est pater, & iste sensus verus est. Alius sensus est, Deus pater genuit Deum, qui non est Deus pater, scilicet alium Deum in essentia: & iste sensus falsus est, & à fide alienus; quoniam vnus tantum est Deus in essentia, vt superius dictum fuit.

Vtrum

Vtrum pater , & filius sint vnum principium
Spiritus Sancti .

R E S O L V T I O .

Dicendum est secundum D.Th. in 1. part.
Q. 36. art. 4. quod sic , & ratio D.Th. est
ista . pater , & filius in omnibus vnum
sunt, in quibus non distinguuntur relatiua opposi-
tione, sed cum in productione Spiritus Sancti, non
opponantur adinuicem relatiue, sequitur, quod pa-
ter, & filius, sint vnum principium Spiritus San-
cti. Similiter Hoc Confirmat D. Bonauent. in pri-
mo sent. dist. 11. Q. 2. dicens, quod Spiritus Sanctus
procedit à patre, & filio, in quantum sunt vnum
in fecunditate voluntatis . vna enim est in patre ,
& filio voluntas , quia pater , & filius sunt vna
substantia . Relinquitur ergo quod pater, & filius,
sint vnum principium Spiritus Sancti .

Vtrum patri conueniat mitti .

R E S O L V T I O .

Dicendum est secundum D.Th. in 1. part. Q.
43. art. 4. & Mag. sent. in 1. dist. 15. quod
patri nullo modo mitti conuenit ; ratio est
ista : pater à nullo procedit , imò processionis est
principium, ergo nullo modo potest dici missus : q
hoc sit verum patet, quoniam missio in sui ratione
importat processionem ab alio , & in Diuinis se-

36 *Quæstionum Theologicarum*
cundum originem . Vndè, cùm filius, & Spiritus
Sanctus sint ab alio, scilicet a patre, (diuerso ta-
men modo, quia filius procedit per modum natu-
ra, Spiritus Sanctus vero per modum voluntatis)
ipsi etiam conuenit mitti. patri verò, qui non est
ab alio, nullo modo mitti conuenit.

Vtrum creare sit aliquid ex nihilo facere.

R E S O L V T I O.

D*icendum est secundum D.Th. in 1. part.*
Q.45. art.1. quòd sic, nam sicuti generatio
hominis est ex non ente, quod est non ho-
mo : (scilicet ex non ente in actu, ex ente verò in
potentia, ut dicit Arist. in 1.physic.) ita creatio,
quæ est emanatio totius esse, est ex non ente: quod
est nihil. Ideò illud ex accipitur exclusiue, quate-
nus scilicet excludit ens aliquod, tam potentiale,
quàm actuale præsuppositum creationi. nam nul-
lum ens præsupponitur creatione, ex quo, illud,
quod creatur, procedat. Vndè, manifestum est,
quòd creare est aliquid ex nihilo facere.

Vtrum solius Dei sit creare.

R E S O L V T I O.

D*icendum est secundum D.Th. in 1. part.*
Q.45.art.5. quòd solus Deus creare potest,
non Angeli boni, vel mali; nam creatio nō
est ex aliquo præsupposito, sed est propria actio
causa

causæ vniuersalis scilicet ipsius Dei. & ideo nulla creatura creare potest, nec per se, nec instrumentaliter. Sicut enim aer calefacit instrumentaliter, scilicet præsupposito igne, similiter si aliquis creare posset instrumentaliter, præsupponeret aliquid, quo creare posset; sed cum dictum fuerit, creationem non esse ex aliquo præexistente, vel præsupposito, sequitur dicendum, quod nulla creatura instrumentaliter creare possit. Vnde, in hoc errauit Aui cenna (referente D. Th. loco citato) qui posuit, quod prima substantia separata creata à Deo, creat aliam post se, & substantiam orbis, & animam eius, & quod substantia orbis creat materiam inferiorum corporum. Similiter errauit Mag. sent. in 4. dist. 5. cum dixerit, quod Deus potest creaturæ instrumentalem communicare potentiam. quod esse non potest, quia causa secunda instrumentalis, non participat actionem causæ superioris. Vnde, impossibile est, quod alicui creaturæ conueniat creare, neque virtute propria, neque instrumentaliter, cum creatio non sit ex aliquo præsupposito, quod possit disponi per actionem instrumentalis agentis, ut dictum est.

Vtrum Deus sit causa mali.

R E S O L V T I O.

Dicendum est secundum Magist. in 2. sent. dist. 37. & D. Th. in 1. part. Q. 49. art. 2. quod ma-

38 *Quæstionum Theologicarum*
lum duplex est pœna scilicet, & culpæ. Ideò Deus,
non est causa mali culpæ, sed pœnæ, vt dicit Isa. 43.
ego sum Dominus creans malum, & faciens bo-
num. & Amos. 3. non est malum in ciuitate, quod
Dominus non fecerit: quæ propositiones non essent
veræ, nisi Deus esset causa mali pœnæ. Vnde, Deus
non est author mali culpæ, sed pœnæ, vt dictū est.

DE ANGELIS.

Vtrum Angeli, qui naturaliter sunt incorporei,
aliquando corpora assumant.

RESOLVTIO.

D*icendum est secundum Mag. in 2. sentent.*
dist. 8. & Th. in 1. part. Q. 51. art. 2. quòd
sic, & hoc non ideò, quia indigeant corpo-
re assumpto propter seipsos, sed propter nos. Vnde
assumunt corpora, vt, familiariter cum hominibus
conuersando, demonstrent intelligibilem societate,
quam homines expectant cum eis habendam in fu-
tura vita; vt patet de Angelo, qui apparuit To-
bie, & de illis, qui apparuerunt Lot. præterea, se-
cundum D. Bonauent. in 2. sent. dist. 8. art. 1. Q. 2.
in Angelis duplex est vis scilicet contemplatiua,
& administratiua. Secundum contemplatiuam
conuertuntur ad Deum, & sic non indigent solatio
corporis assumpti. Secundum verò administrati-
uam, Deo volente, descendunt ad nos, per assump-
tionem

ptionem corporum, ad operandum aliquid circa nos, & ad seipsoſ manifestandos, noſq; ipſoſ conſolandos. Ideò notandum eſt pulcherrimè, quod *Angeli* aſſumunt corpora, ex aere, condensando ipſum, non virtute propria, ſed virtute Diuina, quantum neceſſe eſt ad corporis aſſumendi formationem. Vndè, manifeſtum eſt, quòd *Angeli* corpora aſſumunt, ſicut inſtrumenta vel organa ad operandum, ad manifeſtandumq; etiam aliquid nobis, ad ſalutem noſtram, vt dictum eſt.

Vtrum *Angeli* in aſſumptis corporibus opera vitæ exercent.

R E S O L V T I O.

Dicendum eſt ſecundum D. Thom. in 1. part. Q. 51. art. 3. quòd *Angeli* in aſſumptis corporibus non exercent opera vitæ vniuocè, ſed ſolum æquiuoce; nam quamvis *Angeli*, per corpora aſſumpta, poſſint operari quedam opera vitæ, quantum ad id, in quo communicant cum corporibus non vitalibus, non tamen poſſunt quantum ad id, quod eſt proprium viuentium. *Angeli* enim in aſſumptis corporibus non viuunt vita nutritiua, quæ eſt principium operis vitæ. Vndè, tantum æquiuoce in aſſumptis corporibus ipſi *Angeli* opera vitæ exercent, non autem vniuocè, cum non informant corpora.

Vtrum

Vtrum Dæmones in assumptis corporibus
possint generare hominem.

R E S O L V T I O.

Dicendum est absolutè secundum Thom. in
1. part. Q. 31. art. 3. in resp. ad ult. quòd
non, cuius ratio est, quia si Dæmones in
assumptis corporibus possent generare hominem,
possent etiam ex consequenti exercere opera vitæ,
sed hoc est falsum, ergo & c. falsitas consequentis
patet ex eo, quòd suprà determinatum est, Ante-
cedens non indiget probatione, ergo Dæmones in
assumptis corporibus non possunt hominem gene-
rare. Vndè sciendum est, quòd, licèt ex coitu eo-
rum aliqui quandoq; nascentur homines; hoc ta-
men non est per semen ab eis decisum, aut à cor-
poribus assumptis, sed per semen alicuius homi-
nis ad hoc acceptum, ut potè, quòd idem Dæmon,
qui est succubus ad virum, fiat incubus ad mulie-
rem: sicuti & aliarum rerum semina assumunt,
ad aliquarum rerum generationem, adeò quòd in-
strumentaliter se habent, sicut Agricola ad pro-
ductionem fructuum, & prædicatores ad illumi-
nationem mentium. Vndè, ille, qui nasci-
tur, non est filius Dæmonis, sed
illius hominis, cuius
semen acceptum
est.

Vtrum

Vtrum Angelus sit in loco .

R E S O L V T I O .

Dicendum est secundum D. Tho. in 1. part. Q. 52. art. 1. & 2. & Scotum in 3. Sent. dist. 2. Q. 5. & Petrum Tat. ibidem Q. eadem, quòd aliquid potest esse in loco tripliciter. Vno modo circumscriptiuè. Alio modo definitiuè. Tertiò modo præsentialiter. Vndè illud dicitur esse in loco circumscriptiuè, quando illud sic se habet ad locum, quòd vltima pars ipsius locati, & vltima ipsius loci sunt simul, & continua; & hoc modo omne corpus naturale est in loco. Secundò illud dicitur esse in loco definitiuè, quòd sic est in vno loco; quòd non in alio, sine circumscriptione ipsius loci. & sic Angelus hoc modo dicitur esse in loco. Vndè notandum est, quòd valet consequentia, est in loco circumscriptiuè, ergo definitiuè, non è conuerso definitiuè, ergo circumscriptiuè. Tertio modo præsentialiter, Deus est in omnibus rebus, Ideò valet consequentia, est in loco circumscriptiuè, & definitiuè, ergo præsentialiter, non è conuerso. clarum itaque est, quòd Deus est ubique præsentialiter, essentialiter, & potentialiter, vt in superioribus dictum fuit. Angelus verò in loco definitiuè. corpus verò circumscriptiuè.

Vtrum

Vtrum Angeli cognoscant cogitationes cordium .

R E S O L V T I O .

Dicendum est secundum D. Thom. in 1. part. Q. 57. art. 4. quòd cogitatio potest cognosci dupliciter . Vno modo in suo effectu . Alio modo in seipsa : si primo modo , tunc non solum ab Angelo , sed etiam ab homine cogitatio cordis alterius cognosci potest . homo enim per immutationem vultus , & dispositionem corporis , (vt medicus) quandoq; potest cogitationes cordis alterius cognoscere . cogitationes verò cordium , secundo modo sumptæ , soli Deo sunt naturaliter cognitæ , nam cogitationes cordium puræ voluntariæ sunt , cum ex sola voluntate dependeat , quòd aliquis actu cogitet , merè autem voluntaria soli Deo , & volenti nota sunt , ergo solus Deus scrutator cordium est ,

Vtrum Angelus fuerit ab æterno productus .

R E S O L V T I O .

Dicendum est secundum D. Th. in 1. part. Q. 61. art. 2. quòd solus Deus Pater , & Filius , & Spiritus Sanctus est ab æterno . Hoc enim fides catholica indubitanter tenet : &
omne

omne contrarium est sicut hæreticum refutandum.
sic enim Deus creaturas produxit, quid eas ex ni-
hilo fecit. i. postquam nihil fuerat. Angelus ergo
nullo modo fuit ab æterno productus ab ipso Deo.

Vtrum Angeli sint creati in Cælo Empyreco.

R E S O L V T I O.

D*icendum est secundum Th. in 1. part. Q. 61.*
art. 4. quod sic, nam ex creaturis corporali-
bus, & spiritualibus vnum vniuersum constitui-
tur: Ideo sic creatæ sunt spirituales creaturæ, quod
ad creaturam corporalem aliquem ordinem habent,
& toti creaturæ corporali præsent. Vnde con-
ueniens fuit, quod Angeli in supremo corpore crea-
rentur (quod est Cælum Empyreum) tanquam to-
ti naturæ corporeæ præsent. siue proprie id di-
catur Cælum empyreum, siue qualitercunque no-
minetur. supremum enim Cælum, est Cælum An-
gelorum, vt dicit Isid. creati itaq; sunt Angeli in
Cælo empyreo, i. in Cælo splendido, vel igneo a splen-
dore, non a calore, vt dicit Mag. in 2. Sent. dist. 2.

Vtrum Angeli sint creati in gratia.

R E S O L V T I O.

D*icendum est secundum Magist. Sent. in 1.*
distin. 4. & D. Bonauent. ibidem art. 1. Q. 2.
quod Angeli non fuerunt creati in gratia gratum
faciente

faciente; (licet D. Thom. probabiliter aliter dicat in 1. part. Q. 62. art. 3.) ratio est ista, quia si fuissent creati in gratia, non cecidisset Lucifer cum suis socijs. Vnde secundum Magist. Sent. Angeli non fuerunt creati mali, eo quod non statim peccauerunt, sed cum aliqua morula; nec in eorum creatione peccatum acceperunt: similiter nec boni, eo quod non habuerunt certitudinem sui status. dicendum igitur est, quod omnes Angeli creati fuerunt boni bonitate naturæ, non autem bonitate gratiæ, quia conuersi quidam eorum ad Deum gratiam, & distinctos ordines acceperunt; quidam verò auersi excacati fuerunt. Vnde, probabiliter secundum D. Bonau. dicendum est, quod Angeli non fuerunt creati in gratia gratum faciente,

Vtrum Angeli Beati possint peccare.

R E S O L V T I O.

Dicendum est secundum Magist. in 2. sen. dist. 7. & Th. in 1. part. Q. 62. art. 8. quod non, nam cum sint confirmati in gratia, & Deum per essentiam videant, non possunt velle, aut agere nisi, quod Deus vult. eorum enim voluntas conformis est voluntati Diuinæ, ergo non possunt peccare. Si autem dicatur, quod habent liberum arbitrium, respondeo, quod est confir-

confirmatum in gratia . Vndè, si Angeli essent in puris naturalibus, possent sine dubio peccare, sed quia confirmati sunt in gratia, & beatitudine, nullo modo peccare possunt,

Vtrum tot peccauerunt, quot permanserunt.

R E S O L V T I O .

Dicendum est secundum D. Tho. in 1. part. Q. 63. art. 9. quòd plures Angeli permanserunt, quam peccauerunt: ratio est, quia peccatum est contra naturalem inclinationem. ea verò, quæ contra naturam fiunt, vt in paucioribus accidunt. Natura enim consequitur suum effectum frequenter, vel semper, vt in pluribus, deficit autem in paucioribus. Vndè, plures Angeli permanserunt, quam peccauerunt.

Vtrum dolor sit in Dæmonibus.

R E S O L V T I O .

Dicendum est secundum D. Tho. in 1. part. Q. 64. art. 3. quòd timor, dolor, gaudium, & huiusmodi, quatenus sunt passionibus sensus, in Dæmonibus esse non possunt; sic enim sunt propriè appetitus sensitini, qui est virtus in organo corporali; sed Quatenus significant simplices actus voluntatis, sic possunt esse in Dæmonibus.

nibus. & necesse est dicere; quòd in eis sit dolor: quia dolor, secundum quod significat simplicem actum voluntatis, nihil aliud est quàm renisus voluntatis ad id, quod est, vel non est. patet autem, quòd Dæmones multa vellent non esse, quæ sunt, & esse, quæ non sunt. vellent enim mali Angeli, cùm sint inuidi, damnari eos, qui Saluantur: Vndè oportet dicere, quòd in eis sit dolor: & præcipuè, quia de ratione pænæ est, quòd voluntati repugnet: priuantur etiam beatitudine, quam naturaliter appetunt: & in eis semper voluntas mala esse dicitur.

Vtrum iste aer sit locus pœnalis Dæmonum.

R E S O L V T I O.

Dicendum est secundum Thom. in 1. part. Q. 64. art. 4. quòd duplex locus pœnalis demonibus debetur. Vnus ratione culpæ, & hic est infernus. Alius autem ratione exercitationis humanæ, & sic debetur eis caliginosus aer. nam procuratio totius humanæ salutis protenditur vsque ad diem Iudicij. Vndè, vsq; ad illum diem durat ministerium Angelorum, & exercitatio dæmonum, scilicet quòd vsque ad illam diem, boni Angeli ad nos huc mittuntur, & Dæmones in hoc aere caliginoso sunt ad nostrum exercitium: licet eorum aliqui etiam nunc in inferno
sint

sint ad torquendum eos, quos ad malum induxerunt, sicut & aliqui boni Angeli sunt cum animabus Sanctis in Cælo. Sed post diem Iudicii, omnes mali, tam homines, quam Angeli in inferno erunt, boni verò in Cælo. præterea, sciendum est, quòd sicuti locus Cælestis pertinet ad gloriam Angelorum, & tamen gloria eorum non minuitur, cum ad nos veniunt: quia considerant illum locum esse suum, eo modo, quo dicimus honorem Episcopi non minui, dum actu non sedet in Cathedra: similiter dicendum est, quòd Demones licet non actu alligentur gehennalli igni, dum sunt in aere isto caliginoso: tamen inquatum sciunt illam alligationem sibi deberi, eorum pæna non diminuitur.

Vtrum animæ separatæ cognoscant ea, quæ hic aguntur.

R E S O L V T I O.

Dicendum est secundum Thom. in 1. part. Q. 89. art. 8. quòd animæ separatæ, secundum cognitionem naturalem, nesciunt, quæ hic aguntur. & hoc ideò est, quia secundum ordinationem diuinam, & secundum modum essendi, segregatæ sunt à conuersatione viuentium, & coniunctæ conuersatione spiritualium substantiarum, quæ sunt à corpore separatæ. Vnde ea, quæ

48 Quæstionum Theologicarum

apud nos aguntur, naturaliter ignorant. præterea, D. Greg. videtur dicere, quòd animæ beatorum Deum videntes omnia præsentia, quæ hic aguntur cognoscunt, dicit enim. D. Greg. animæ beatorum cum intus omnipotentis Dei claritatem videant, nullo modo credendum est, quòd sit foris aliquid, quod ignorent: licet aliter sentiat Aug. dubitando tamen. Vndè, dicamus, quòd animæ Sanctorum (quia sunt perfectissimè Iustitiæ Diuinæ coniunctæ) nec tristantur, nec rebus viuentium se ingerunt, nisi secundum quod Iustitiæ Diuinæ dispositio exigit. de animabus verò mortuorum dicamus, quòd non per seipsos facta viuentium cognoscere possunt, sed vel per animas eorum, qui hinc ad eos accedunt, vel per Angelos, seu demones, vel etiam spiritu Dei reuelante.

Vtrum anima rationalis à Deo immediate sit producta.

R E S O L V T I O.

Dicendum est secundum Th. in 1. part. Q. 90. art. 3. quòd sic, nam anima producitur non per transmutationem aliquam, sed per creationem; sed quia solus Deus creare potest, nullo præsupposito agente, vt superius dictum est, relinquitur, quòd anima rationalis immediate à Deo producta sit.

Vtrum

Vtrum etiam corpus humanum immediatè
fit à Deo productum.

R E S O L V T I O.

Dicendum est secundum Th. in 1. part. Q. 91.
art. 2. quòd sic in prima formatione, nam cor-
pus humanum non potest formari, nisi aut
à Deo immediatè, aut à semine humano per viam
generationis, sed in prima formatione, nullū præ-
cessit humanum corpus, à quo per viam genera-
tionis formari potuisset corpus primi parentis, for-
matum est ergo à Deo immediatè.

Quare Deus non creavit simul fœminam,
& virum?

R E S O L V T I O.

Respondetur secundum Magist. sent. in 2. di-
stin. 18. dupliciter primò, vt superbia dia-
boli confunderetur. concupierat enim diabo-
lus se esse aliud principium à Deo; Ideò vt in hoc
confunderetur; homo accepit hoc in munere, vt ip-
se primus esset primū principium generationis om-
nium hominum. Secundò, vt similitudo Dei in ho-
mine magis manifestaretur. nam sicuti Deus vnū
est principium creatiuum omnium rerum, similiter
primus homo fuit vnum, & primum principium
generationis omnium hominum, quòd fieri non po-
tuisset, si Deus mulierem, & virum simul creasset.

Quare mulier specialiter facta est de costa Adæ, & non de aliqua alia parte corporis?

R E S O L V T I O.

R Espondetur secundum Magistrum loco citato, quòd hoc idè est, quia inter virum, & mulierem debet esse socialis coniunctio; neque enim mulier debet dominari in virum, (vt dicit Apost. ad Tim. 1. c. 2.) & idè non est formata de capite; neq; debet à viro despici tanquam seruiliter subiecta; & idè non est formata de pedibus. sed de latere ipsius viri formata fuit, tanquam socias, & vt homo eam iuxta se esse ponendam cognosceret.

Quare potius de latere viri dormientis, quam vigilantis sumebatur costa ad formationem mulieris?

R E S O L V T I O.

R Espondetur, secundum Magist. sent. in 2. distin. 18. tripliciter. Primò, ne vir sentiret dolorem in subtractione costæ. Secundò, vt Deus ostenderet suam potentiam, cum aperuit latus ipsius hominis Dormientis; & ipsum à soporis quiete non excitauit. Tertiò, vt profluxio sacramentorum de latere Christi in Cruce dormientis figuraretur; nam de latere Christi dormientis in Cruce

Crute fluxerunt sanguis, & aqua, quibus formata est ecclesia.

Vtrum de sola costa mulier fuerit formata.

R E S O L V T I O.

Dicendum est secundum Magistrum loco citato, quod de sola costa mulier formata fuit sine additione aliorum membrorum: Divina tamen virtute, illa costa multiplicata fuit, ad formandam totam mulierem, non autem naturaliter, sed supernaturaliter; sicuti factum fuit de illis quinq; panibus multiplicatis ad saturationem multorum hominum.

Vtrum primus homo omnium scientiam habuerit.

R E S O L V T I O.

Dicendum est secundum Mag. sent. in 2. distin. 23. & D.Th. in 1. part. Q. 94. art. 3. quod sic. Sed sciendum est, quod scientia habetur tribus modis; vel enim habetur per species acquisitas, aut per species connaturales, aut per species infusas. Ideo, primus homo non habuit scientiam omnium rerum per species acquisitas, quia non fuerat omnia expertus, similiter etiam, nec per species connaturales, quia erat eiusdem naturae nobiscum: anima autem nostra est sicut tabula rasa, in qua nihil scriptum est, ut vult philo-

sophus in 3. de anima. habuit ergo primus homo scientiam omnium per species à Deo infusas: nec tamen illa scientia fuit alterius rationis à scientia nostra: sicuti nec oculi, quos cæco nato Christus dedit, fuerunt alterius rationis ab oculis, quos natura produxit. Vndè, secundum Magist. sent. loco citato, primus homo triplici cognitione præditus fuit. Primò fuit præditus cognitione rerum propter se creatarum, quarum curam erat habiturus. & idè omnibus rebus nomina imposuit. Secundò dotatus fuit cognitione sui Creatoris, non quidem per anigma, sed per interiorè inspirationem, non tamen ita clarè, sicuti in patria cælesti. Tertiò erat illustratus cognitione sui ipsius, nam sciuit quid Deo, quid sibi, & quid alijs debuit. Vndè, manifestum est, quòd primus homo omnium habuit scientiam; quæ necessaria sunt ad regimen humanæ vitæ.

Quare Deus hominem tentari permisit, quem decipiendum præsciuit?

RESOLVTIO.

Respondetur secundum Magist. sent. in 2. distin. 23. quòd Deus hoc fecit ad ostendendam dignitatem humanæ naturæ; nam dignior est conditio naturæ creatæ posse tentari, & non consentire, Deo iuuante, quàm nec posse tentari, nec posse consentire.

Quare

Quare Deus creauit illos homines, quos futuros præuidit malos?

R E S O L V T I O.

R Espondetur secundum Magistrū ibidem loco citato, quòd propter bonum; quod cognouit esse venturum.

Quare Deus non fecit hominem impeccabilem?

R E S O L V T I O.

R Espondetur secundum Magist. in eodem loco, quòd hoc ideo est, quia melius fuit vtraque naturam facere, vnā scilicet, quæ peccare non posset: cuiusmodi est Angelica natura per gratiam confirmantem; aliam, quæ peccare, & non peccare posset ad libitum, cuiusmodi est anima rationalis, vt ex vtraq; Vberius laudaretur, quàm creare vnā naturam tantum vnus modi solum.

Quare Deus, qui potuit illos præseruare, ne consentirent, hoc non fecit?

R E S O L V T I O.

R Espondetur secundum Magist. ibidem, quòd hoc ideo fuit, quia voluit eos Deus in sua natura relinquere, vt nec infructuose boni essent, nec impune mali.

Vtrum Nouem sint ordines seu chori Angelorum.

R E S O L V T I O.

Dicendum est secundum Mag. sent. in 2. distin. 9. quòd nouem sunt ordines Angelorū in tribus hierarchijs distincti, & qualibet hierarchia constat tribus ordinibus, quorum tres sunt superiores, scilicet Seraphin, Cherubin, & Troni. tres verò medi, scilicet Dominationes, Principatus, & Potestates. tres autem sunt infimi, nempe Virtutes, Archangeli, & Angeli. Nouem itaq; sunt ordines Angelorum.

Vtrum homines assumantur ad ordines Angelorum.

R E S O L V T I O.

Dicendum est secundum Mag. sent. in 2. distin. 9. & D. Th. in 1. part. Q. 108. art. 8. quòd ordines Angelorum dupliciter considerari possunt. Vno modo secundum conditionem naturæ. Alio modo secundum dona gratiæ. si ergo primo modo considerentur Angelorum ordines, quantum scilicet ad gradum naturæ. sic homines nullo modo assumi possunt ad ordines Angelorū, quia semper remanebit naturarum distinctio, scilicet hominum, & Angelorum diuersitas. si verò Angelorum ordines secundo considerentur modo, nempe

nempe quantum ad dona gratiæ. sic homines ad ordines Angelorum assumi possunt, quoniam per Donum gratiæ, (quæ dependet ex libertate Dei, non ex ordine naturæ) homines mereri possunt tantam gloriam, ut Angelis æquentur secundum singulos Angelorum gradus: quod est homines ad ordines Angelorum assumi.

Vtrum omnibus hominibus, Angeli ad custodiam deputentur.

R E S O L V T I O.

Dicendum est secundum Mag. sent. in 2. distin. 11. & D. Th. in 1. part. Q. 113. art. 4. quod sic, nam homo in statu huius vitæ constitutus, est quasi in quadam via, qua debet tendere ad patriam; in qua quidem via, multa pericula homini imminet, tum ab interiori: tum etiam ab exteriori. & ideo sicuti hominibus per viam non tutam ambulantibus dantur custodes, ita & cuilibet homini, quandiu viator est, custos Angelus deputatur. Quando autem iam ad terminum viæ pervenerit, iam non habebit Angelum custodem, sed habebit in Regno Cælorum Angelum conregnantem: in inferno verò Dæmonem punientem. Vnde, manifestum est, quod omnibus hominibus, in hoc mundo, Angeli ad custodiam deputantur.

Vtrum

*Vtrum Beatitudo hominis consistat in Deo,
an potius in diuitijs.*

RESOLVTIO.

Dicendum est secundum D. Th. in 1.2. Q. 2.
art. 1. quod vera beatitudo ipsius homi-
nis in Deo, non autem in diuitijs consistit,
nam ubi reperitur finis ultimus ipsius hominis, ibi
etiam eius beatitudo inuenitur, sed finis vlti-
mus hominis non est nisi Deus Opt. Max. (qui et-
tiam omnium rerum principium est) ergo beati-
tudo hominis vera non consistit nisi in Deo, ad quẽ
homo specialiter inter ceteras creaturas, tanquã
ad verã beatitudinem, ordinatur. præterea, sciendũ
est, qd̃ duplices sunt diuitiæ, Naturales, s. & Artifi-
ciales. Naturales diuitiæ sunt, quib⁹ homini sub-
uenitur ad defectus naturales tollendos: sicut cibus,
& potus, vestimenta, habitacula, & huiusmodi.
Diuitiæ verò artificiales sunt, quibus secundum
se natura non iuuatur, vt Denarij: sed ars huma-
na eos adinuenit propter facilitatem commutatio-
nis: vt sint quasi mensura rerum venalium. Vn-
dè, diuitiæ naturales quærentur ad sustentan-
dam naturam humanam. Artificiales verò qua-
runtur propter naturales: non enim quærentur,
nisi, quia per eas emuntur res ad vsum vitæ neces-
sariæ. Vndè huiusmodi diuitiæ non possunt esse
Vltimus finis, sed magis ordinantur proximè ad
hominem, sicut ad finem. omnia enim huiusmo-
di in-

di infra hominem, & propter hominem facta sunt, secundum illud Profet. omnia subiecisti sub pedibus eius. homo autem ordinatur ad Deum, tanquam ad ultimum finem, qui est propria ipsius beatitudo, secundum illud Ps. satiabor cum apparuerit gloria tua.

Vtrum Beatitudo hominis consistat in visione Diuinæ essentia.

R E S O L V T I O.

Dicendum est secundum Th. in 1. 2. Q. 3. art. 8. quod ultima, & perfecta beatitudo hominis non potest esse, nisi in visione Diuinæ essentia, in qua nihil amplius remanet desiderandum, & querendum. Quod sic patet, ad perfectam beatitudinem requiritur, quod cor hominis quiescat, ut dicit Aug. cor autem hominis quiescit, cum intellectus pertingat ad ipsam essentiam primæ causæ, perfectionem ergo suam habebit homo per unionem ad Deum, sicut ad obiectum, in quo solo, ultima, & vera Beatitudo hominis consistit, ut dictum est.

Vtrum ad Beatitudinem hominis requiratur corpus ex necessitate.

R E S O L V T I O.

Dicendum est secundum D. Thom. in 1. 2. Q. 4. art. 5. quod in visione Diuinæ essentia perfecte

perfecta hominis beatitudo consistit, ut dictum est; ergo perfecta beatitudo ipsius hominis non dependet à corpore, ratio est, quia intellectus ad suam operationem non indiget corpore nisi propter phantasmata, sed cum Divina essentia per phantasmata videri non possit, sequitur, quod sine corpore possit esse anima beata. Sed sciendum est, quod ad perfectionem alicuius rei dupliciter aliquid pertinet. Uno modo, ad constituendam essentiam rei, sicut anima requiritur ad essentiam hominis. Alio modo requiritur aliquid, quod pertineat ab bene esse eius: sicuti pulchritudo corporis, vel scientia pertinet ad perfectionem hominis. quamvis ergo corpus primo modo ad perfectionem beatitudinis humane non pertineat, pertinet tamen secundo modo. Unde, corpus non ex necessitate, sed ex congruitate ad beatitudinem hominis requiritur.

Utrum unus homo possit esse beator altero.

RESOLUTIO.

Dicendum est secundum. D. Tho. in 1. 2. Q. 5. art. 2. quod sic, dicitur enim Ioannis 14. in Domo Patris mei mansiones multe sunt, scilicet præmiorum differentia, ergo unus homo potest esse altero beator. Unde, sciendum est, quod in ratione beatitudinis duo includuntur

duntur, scilicet ipse ultimus finis, qui est summum bonum, & adeptio, vel fruitio ipsius boni. quantum igitur ad ipsum bonum, quod est beatitudinis obiectum, & causa, non potest esse una beatitudo alia maior, quia non est nisi unum summum Bonum, scilicet Deus, cuius fruitione homines sunt beati: sed quantum ad fruitionem, & adaptionem huiusmodi boni, potest aliquis alio esse beator: quia quanto magis hoc bono fruatur, tanto beator erit: contingit autem aliquem perfectius frui Deo, quam alium ex eo quod est melius dispositus, vel ordinatus ad eius fruitionem. & secundum hoc, Aliquis altero potest esse beator,

Vtrum aliquis in hac vita possit esse beatus.

R E S O L V T I O.

Dicendum est secundum D. Th. in 1.2. Q.5. art.3. quod non, nam in hac vita non possunt omnia mala excludi: multis enim malis præsens vita subiacet, quæ vitari non possunt, ut ignorantia ex parte intellectus, & inordinata affectioni ex parte appetitus, & multiplicibus pœnalitatibus ex parte corporis. similiter etiam desiderium boni in hac vita satiari non potest: naturaliter enim homo desiderat permanentiam eius boni, quod habet: bona autem vitæ præsens

60. **Quæstionum Theologicarum**
*sentis transitoria sunt, cum & ipsa vita transeat,
quam naturaliter desideramus, & eam perpetuò
permanere vellemus, quia homo naturaliter refu-
git mortem. Vndè, impossibile est, quòd in hac vita
vera habeatur beatitudo, quoniam in hac vita Deū
videre nemo potest, vt superius dictum fuit.*

Vtrum omnis homo appetat beatitudinem.

R E S O L V T I O.

D*icendum est secundum D. Th. in 1.2. Q.5.
art.8. quòd Beatitudo potest considerari
dupliciter. Vno modo communiter. Alio
modo specialiter. Si Beatitudo consideretur pri-
mo modo, sic quilibet homo Beatitudinem appe-
tit, nam ratio communis Beatitudinis est, vt sit
bonum perfectum satiabile totaliterq; satisfaciēs
voluntati illius, qui Beatitudinem appetit. si ve-
rò Beatitudo consideretur secundo modo, nempe
specialiter, tunc non omnes appetunt Beatitudi-
nem, cum non omnes cognoscant rationem Beati-
tudinis in specie. Vndè omnia plana sunt.*

Vtrum Voluntas sit tantum boni.

R E S O L V T I O.

D*icendum est secundum D. Th. in 1.2. Q.8.
art.1. quòd sic, nam obiectum volunta-
tis est bonum, vt dicit Arist. in 1. Etic. bo-
num est, quod omnia appetunt; sed voluntas ali-
quan-*

quando decipitur circa aliquod obiectum, putans
 qd sit bonum verum, cum sit bonum apparens, vt
 dicit Arist. in 2. Phisic. qd finis est bonum, vel
 apparens bonum. Vnde voluntas vniuersaliter est
 tantum boni particulariter vero, & per acci-
 dens est mali, quia apprehendit malum in ratio-
 ne boni, vt fures, qui furantur propter bonum.

Vtrum Voluntas moueatur à corpore
 Cœlesti.

R E S O L V T I O.

Dicendum est secundum D. Thom. in 1. 2.
 Q. 9. art. 5. quod directe voluntas moue-
 ri non potest à corpore cœlesti. nam dire-
 ctè corpora cœlestia non sunt causa nostrorū actūū,
 essent autem, si voluntas, quæ est principii huma-
 norū actūū, à corporibus Cœlestibus directe mouere-
 tur, sed consequens est falsum, nō ergo mouetur vo-
 luntas à corporibus Cœlestibus. præterea, nullū cor-
 pus agere potest in rem incorporeā, sed potius e cō-
 uerso, ergo impossibile est, quod corpus Cœleste
 imprimat directe in intellectum, aut voluntatem.
 Sciendum tamen est, quod cum voluntas mouea-
 tur ab exteriori obiecto, moueri potest etiam indi-
 rectè, & per accidens à corporibus cœlestibus, in
 quantum scilicet corpora exteriora sensui subie-
 cta, & proposita mouent voluntatem, & etiam
 ipsa organa potentiaram sensitiuarum subiacent
 moti-

motibus corporum Cælestium . omnes enim potentia sensitivæ, cum sint actus organorum corporaliū, per accidens moveri possunt à cælestibus corporibus, motis scilicet corporibus, quorum sunt actus : sed quia appetitus intellectivus quodammodo indirectè movetur ab appetitu sensitivo, ideo redundant motus Cælestium corporum in voluntatē, quatenus scilicet per passiones appetitus sensitivi, voluntatem moveri contingit, sicuti adveniente frigore incipit aliquis velle facere ignem . Vndè, concludimus, quòd ista motio voluntatis est ex parte obiecti exterius præsentati, non autem ex parte interioris instinctus .

Vtrum solus Deus sit causa voluntatis .

R E S O L V T I O .

Dicendum est secundum D.Th. in 1.2. Q. 9. art. 6. quòd voluntatis causa non potest esse nisi solus Deus, qui cum sit causa animæ rationalis per creationem, causa etiam est voluntatis, quæ animæ rationalis est potentia . præterea, voluntas habet ordinem ad bonum vniuersale ; Vndè, nihil aliud potest esse causa voluntatis, nisi ipse Deus, qui est vniuersale bonum.

Vtrum solo Deo fruendum sit.

R E S O L V T I O .

Dicendum est secundum Magist. in 1. senten. distin. 1. quòd sola Trinitate increata fruendum

dum est. quòd tali ratione probatur. quod propter se, & nullum alium finem est diligendum; illo propriè est fruendum, sed sola Trinitas est illa, quæ propter se, & nullum alium finem est diligenda, ergo ea solùm fruendum est: maior patet per fruitionis descriptionem, quæ est, frui est rei alicui amore inhaerere finaliter propter seipsam; minor probatur sic, quod potest nos, & nil aliud beatos reddere, illud solùm propter se, & finaliter est diligendum, sed nil aliud, quàm sola Trinitas potest nos beatos reddere, igitur sola Trinitas propter se, & finaliter est diligenda. patet itaque quòd solo Deo fruendum est.

Vtrum hominibus sit fruendum.

R E S O L V T I O.

D*icendum est secundum Magist. loco citato, quòd non simpliciter, sed secundum quid, scilicet in Deo, vt dicit Apost. ad philem. ego te fruar in Domino; Vndè, nisi dixisset in Domino, videretur finem dilectionis in homine constituisse, quòd non fecit.*

Vtrum virtutibus sit fruendum.

R E S O L V T I O.

D*icendum est secundum Magist. sent. in 1. distin. 1. quòd virtutibus simpliciter non est fruendum, sed tantùm instrumentaliter: eo*

E quòd

quòd non quæruntur propter se, sed propter beatitudinem, scilicet propter Deum, qui est vera beatitudo cuiuslibet beati.

Vtrum fides, spes, & charitas sint tres Virtutes Theologicæ.

R E S O L V T I O.

Dicendum est secundum Magist. in 3. sent. & D.Th. in 1.2. Q. 62. art. 3. quòd verè fides, spes, & charitas ponuntur Virtutes Theologicæ, ut dicit Apost. 1. ad Cor. 13. nunc autem manent fides, spes, & charitas. Fides, quia solùm tres sunt personæ Diuinæ, in quas nos credere debemus. Spes, quia similiter in illis solùm sperare debemus. Charitas, quia vnus tantùm est Deus, quem finaliter, & propter se diligere debemus, nempe patrè, & filium, & Spiritũ Sanctum.

Vtrum fides sit prior spe, & spes charitate.

R E S O L V T I O.

Dicendum est secundum D.Th. in 1.2. Q. 62. art. 4. quòd ordine generationis: sicuti materia est prior forma, sic etiã fides est prior spe, & spes similiter præcedit charitatem. ordine verò perfectionis: sicuti forma prior est materia, similiter charitas præcedit fidẽ, & spem; eo quòd tam fides, quàm etiam spes per charitatem formatur. Vnde, Charitas dicitur mater omnium virtutum

rum, & radix, in quantum omnium virtutum est forma.

Vtrum charitas possit esse sine fide, & spe.

R E S O L V T I O.

Dicendum est secundum D.Th. in 1.2.Q.65. art.5. quòd nullo modo Charitas potest esse sine fide, & spe. nam Charitas est dilectio, qua Deus diligitur propter se, & proximus propter Deum. Vnde, Nemo potest perfectè diligere Deum propter se, & proximum propter Deum, nisi etiam speret à Deo, quem diligit, beatitudinem consequi; nec potest quis hanc sperare beatitudinem, nisi credat Deum, quem diligit, ipsi hanc beatitudinem conferre. Vnde, impossibile est, quòd Charitas possit esse sine fide, & spe: sed bene potius è conuerso, fides, & spes possunt esse sine charitate perfecta.

Vtrum Charitas sit maior fide, & spe.

R E S O L V T I O.

Dicendum est secundum D.Th. in 1.2.Q.66. artic.6. quòd charitas maior est fide, & spe, secundum illud Apost. 1.ad Cor.13. nunc autem manent fides, spes, & charitas, tria hæc, maior autem horum est charitas. Sed sciendum est, quòd vna earum non potest dici maior altera, ex hoc, quòd sit circa maius obiectum: quia omnes virtutes Theo-

66 *Quæstionum Theologicarum*
logicæ respicimus Deum, sicuti proprium obiectum:
sed bene ex eo, quod vna se habet propinquius ad
obiectum, quam alia: & hoc modo charitas est
maior alijs scilicet fide, & spe. ratio est, quia fi-
des est de non visis, spes autem de non habitis: sed
charitas est de eo, quod iam habetur. est enim ama-
tum quodammodo in amante, & amans trahitur
ad vnionem amati, vt dicitur 1. Ioan. 4. qui ma-
net in charitate in Deo manet, & Deus in eo. pa-
tet igitur, quod charitas maior est fide, & spe.

Vtrum fides, & spes maneant post hanc vi-
tam, sicut charitas.

R E S O L V T I O.

D*icendum est secundum Th. in 1. 2. Q. 67. art. 3.*
4. 5. & 6. quod non fides, enim non manet,
propterea quod, beatus videt Deum in quem cre-
debat: similiter non manet spes, quia spes est certa
expectatio futuræ beatitudinis ex Dei gratia; &
meritis proprijs proueniens, qui autem est in alia
vita, habet, & non expectat visionem Dei per es-
sentiam in actu: ergo quando habetur id, quod spe-
ratur, scilicet Diuina fruitio, iam spes esse non po-
terit. Charitas verò, quia respicit dilectionem,
manebit in gloria, vt dicit Apost. 1. ad Cor. 3. cha-
ritas nunquam excidit. Vndè, fides, & spes eua-
cuabuntur in patria, charitas verò in æternum
manebit.

Vtrum

Vtrum Dona Spiritus Sancti remaneant
in Patria.

R E S O L V T I O.

Dicendum est secundum D.Th. in 1.2. Q. 68.
art. 6. quod Dona Spiritus Sancti possunt con-
siderari dupliciter. Vno modo quantum ad essen-
tiam Donorum; & sic perfectissimè erunt in pa-
tria. Alio modo quantum ad materiã, circa quam
operantur; & sic in præsenti habent operationem
circa aliquam materiam, circa quam non habe-
bunt in statu gloriæ: & secundum hoc non ma-
nebunt in patria.

DE VITIIS, ET PECCATIS.

Vtrum vitium sit contra naturam.

R E S O L V T I O.

Dicendum est secundum D.Th. in 1.2. Q. 71.
art. 2. quod vitium non potest esse nisi con-
tra naturam, propriè loquendo. nam na-
tura vniuscuiusq; rei est forma, vt dicit philoso-
phus. in 2. phisic. anima autem rationalis est for-
ma hominis, & consequenter natura ipsius homi-
nis: ideò id, quod est contra ordinem rationis, pro-
priè est contra naturam hominis, quatenus homo
est. quod autem est secundum rationem, est secun-
dum naturam hominis, inquantum homo est. Vn-

Vtrum peccatum simul possit esse cum
virtute.

R E S O L V T I O.

Dicendum est secundum D.Th. in 1. 2. Q. 71.
art. 4. quod virtus duplex est, infusa scilicet,
& acquisita: similiter peccatum duplex est mor-
tale scilicet, & veniale. Ideo peccatum mortale
nullo modo potest esse simul cum virtutibus infu-
sis, quatenus virtutes sunt, sed bene potest esse si-
mul cum acquisitis. peccatum verò veniale non
solum potest esse simul cum virtutibus acquisitis;
sed etiam cum virtutibus infusis. ratio est, quia
peccatum veniale non contrariatur charitati, nec
excludit ipsam, sicuti peccatum mortale.

Vtrum grauitas peccatorum varietur se-
cundum obiecta.

R E S O L V T I O.

Dicendum est secundum D.Th. in 1. 2. Q. 73.
art. 3. quod sic, nam secundum diuersitatem
obiectorum, attenditur diuersitas grauitatis in pec-
catis. quidam enim in Deum, quidam in se, qui-
dam verò in proximum peccant. præterea, sicuti
res exteriores ordinantur ad hominem, sicut ad fi-
nem: similiter homo vltius in Deum ordinatur,
sicut

sicut in finem. Vnde peccatum quod est circa ipsam substantiam hominis, sicut homicidium, est grauius peccato, quod est circa res exteriores, sicut furtum; & adhuc est grauius peccatum, quod immediatè contra Deum committitur, sicut infidelitas, blasphemia, & huiusmodi: & hæc grauitas peccatorum attenditur secundum obiecta principalia, vel minus principalia: Vnde, peccata habent speciem ex obiectis, & penes obiecta similiter habent differentiam grauitatis.

Vtrum peccata spiritualia sint maioris culpæ, quàm carnalia.

R E S O L V T I O.

Dicendum est secundum D. Th. in 1. 2. Q. 73. art. 5. quòd, simpliciter loquendo, peccata spiritualia sunt maioris culpæ, quàm carnalia: quia peccata carnalia versantur circa obiecta minus principalia. peccatum enim carnale, in quantum huiusmodi, est in corpus proprium, quod est minus diligendū secundum ordinem charitatis, quàm Deus, & proximus, in quos peccatur per peccata spiritualia. Vnde, peccata spiritualia, quatenus spiritualia sunt, maioris sunt culpæ, quàm carnalia. præterea, quanto grauior est inclinatio ad peccandum, tanto minus homo peccat, sed grauior est inclinatio in peccatis carnalibus, quàm in spiritualibus, ergo minus carnaliter homo peccat,

quàm spiritualiter, propter concupiscentiam carnis nobis innatam. sciendum tamen est quòd, cum dicimus peccata spiritualia esse maioris culpæ, quàm carnalia, non debemus sic intelligere, quasi quòd quodlibet peccatū spirituale sit maioris culpæ quolibet peccato carnali, sed quia considerata hac sola differentia spiritualitatis, & carnalitatis graniora sunt, quàm cætera peccata cæteris paribus.

Vtrum sola voluntas sit subiectum peccati.

R E S O L V T I O.

Dicendum est secundum D. Th. in 1. 2. Q. 74. art. 2. quòd non sola voluntas est subiectum peccati, sed etiam secundum quid, aliæ animæ vires possunt peccati esse subiecta. nā omne, quod est principium actus voluntarij, est subiectum peccati; actus autem voluntarij dicuntur non solum illi, qui eliciuntur à voluntate, sed etiam illi, qui à voluntate imperantur, ut actus sensitivi. Vnde, non solum voluntas potest peccati esse subiectum, sed omnes illæ potentie, quæ possunt moveri ad suos actus, vel ab eis reprimi per voluntatem.

Vtrum etiam in sensualitate possit esse peccatum.

R E S O L V T I O.

Dicendum est secundum. D. Th. in 1. 2. Q. 74. art. 3. quòd secundum quid, in sensualitate

sualitate potest esse peccatum, nam peccatum potest inueniri in qualibet potentia, cuius actus potest esse voluntarius, & inordinatus, in quo consistit ratio peccati: manifestum est autem, quod actus sensualitatis potest esse voluntarius, in quantum sensualitas (idest appetitus sensitivus) nata est à voluntate moueri. in sensualitate igitur secundum quid potest esse peccatum. præterea notandum est, quod sensualitas non includit in se peccatum, nisi in quantum ratio sensualitati consensum tribuit. nam, secundum Magist. sent. in 2. dist. 24. sensualitas, & ratio sunt duæ potentie; ratio verò duas habet partes, superiorem scilicet, & inferiorem, superior respicit superiora, inferiora verò inferior. Ideò sicuti in peccato primorum parentum fuit serpens suadens malieri, & mulier suadens viro: similiter in nobis est sensualitas, quæ est tanquàm serpens suadens rationi inferiori, quæ est tanquàm mulier, & ratio inferior suadens superiori, quæ est tanquàm vir. Undè, concludere debemus, quod quamuis in sensualitate, secundum quid, possit esse peccatum; tamen ratio principaliter est illa, cui obediunt cæteræ potentie, & ad illam peccatum, tanquàm ad radicem, reducitur.

Vtrum peccatum sit causa peccati.

R E S O L V T I O.

Dicendum est secundum Magist. in 2. sent. dist. 36. & D. Th. in 1. 2. Q. 75. art. 4. quòd sic, sed sciendum est, quòd vnum peccatum potest esse causa alterius dupliciter, per se scilicet, & per accidens: per accidens quidem, cum quis per vnum peccatum amittit gratiam, & ex hoc incidit in aliud peccatum; & sic primum dicitur esse causa secundi per accidens. per se verò cum aliquis ex vno actu peccati disponitur sic, quòd alium actum consimilem committit facilius modo. Vndè, peccatum (vt dicit Magist. loco citato) quod per pœnitentiam non deletur, aut est peccatum, & causa peccati, aut peccatum, & pœna peccati, aut peccatum, & causa, & pœna peccati simul.

Vtrum ignorantia sit peccatum.

R E S O L V T I O.

Dicendum est secundum Magist. sent. in 2. dist. 22. & Th. in 1. 2. Q. 76. art. 2. quòd ignorantia duplex est vincibilis scilicet, & inuincibilis. ignorantia vincibilis est eorum, quæ homines possunt scire, & tenentur, & nolunt: & hæc est peccatum sine dubio. ignorantia verò inuincibilis, est eorum, quæ homines scire non

non possunt, nec tenentur: & hæc non est peccatum, sed magis pœna peccati, non enim est voluntaria, cum non sit in potestate nostra. Vnde, ignorantia est peccatum, loquendo de vincibili.

Vtrum Deus sit causa peccati.

R E S O L V T I O.

Dicendum est secundum D. Thom. in 1. 2. Q. 79. art. 1. quod Deus nullo modo directe potest esse causa peccati, nam peccatum non est ens, sed nihil: Deus autem est omnium creaturarum causa, non autem peccati, quod non est creatura, sed potius defectus creaturæ. Deus igitur non potest esse causa peccati, quia esset iniquus; & non posset iuste punire peccatores. Si causa peccati eorum esset: sed bene dicere possumus, quod Deus sit causa non prohibens, quin homo liberè possit facere malum; non autem directe Deus est causa essentialis peccati, nec indirecte, quia Deus non est author mali culpæ, ut in superioribus dictum fuit: sed in tantum Deus dicitur esse causa peccati, in quantum non impedit, sed permittit nos liberè uti actibus voluntatis. Vnde, Deus quamvis sit causa voluntatis, quatenus voluntas est, non tamen dicitur esse causa voluntatis, quatenus inordinata est per actum suum. patet igitur, quod Deus per se non est causa peccati.

Vtrum

Vtrum Diabolus sit homini causa peccandi.

R E S O L V T I O.

Dicendum est secundum D. Th. in 1. 2. Q. 80. art. 1. quòd Diabolus non est causa per se, sed per accidens peccati. solum enim persuadet nobis Diabolus, vt in culpam incidamus, non autem cogit nos peccare: quia peccatum voluntarium est, non necessarium. Diabolus igitur causa indirecta, & accidentalis est peccati: voluntas verò nostra directè, per suam libertatem peccat, non resistendo diabolicis persuasionibus, & suggestionibus.

Vtrum peccatum primi parentis transeat per originem in omnes posteros.

R E S O L V T I O.

Dicendum est secundum Magist. sent. in 2. dist. 30. & Th. in 1. 2. Q. 81. art. 1. quòd verè, & realiter peccatum primorum parentum in posteros transit, secundum illud Apost. ad Rom. 5. per vnum hominem peccatum in mundum intrauit, quod quidem peccatum in primis parentibus fuit actuale, in nobis autem est originale, quia ab illis in omnes posteros per generationem deriuatur. Et Ideò cùm primus homo fuerit principium generationis omnium hominum, & pec-

& peccauerit, necesse est, quod ab illo peccatum tanquam à radice in omnes transeat posteros secundum carnem concupiscentialiter generatos. nec potest imputari particularibus hominibus, sed vere primo parenti peccatum originale imputatur: nam sicuti homicidium non imputatur manui, sed animæ, quæ mouet manum: similiter peccatum originale Adæ imputatur, non nobis, quia in ipso fuit voluntarium, in nobis verò est necessarium, & ineuitabile. Vnde, manifestum est, quod peccatum originale per originem transit in omnes; & non est peccatum huius personæ, nisi in quantum hac persona recipit naturam à primo parente: Vnde vocatur etiam peccatum naturæ.

Vtrum peccatum originale sit magis in carne, quàm in anima.

R E S O L V T I O.

Dicendum est secundum Th. in 1.2. Q. 83. art. 1. quod aliquid potest esse in aliquo dupliciter. Vno modo sicut in causa, vel principali, vel instrumentali. Alio modo sicut in subiecto. peccatum ergo originale fuit in primo parente, sicut in prima causa principali. in semine verò corporali ab eo deciso est peccatum originale, sicut in causa instrumentali, eo quod per virtutem actiuam seminis traducitur peccatum origi-

originale in prolem simul cum natura humana. in carne verò sicut in subiecto proprio, peccatum originale nullo modo esse potest, sed solum in anima : nam anima subiectum culpæ esse potest, non autem caro.

Quare Deus animam carni infundit ; præsciens ipsam per carnem fore maculandam.

R E S O L V T I O.

D*icendum est secundum Magist. sent. in 2. dist. 32. quòd Deus hoc facit, vt saluetur propagationis humanæ institutio. Sed puto, quòd hoc, soli Diuinorū iudiciorum altitudini remittēdū sit.*

Vtrum anima, dum corpori infunditur, talis sit, qualis à Deo creatur.

R E S O L V T I O.

D*icendum est secundum Magist. sent. in 2. dist. 32. quòd anima non est omninò talis : quia à Deo creatur munda, sed ex coniunctione ad carnem maculam contrahit.*

Vtrum mors, & alij corporales defectus, sint effectus peccati.

R E S O L V T I O.

D*icendum est secundū Th. in 1.2. Q. 85. art. 5. q. sic. sed sciendū est, q. aliquid est causa alterius*

rins dupliciter. Vno modo per se. Alio modo per accidens. illud dicitur esse causa per se, qđ secundū virtutē suā naturæ, vel formæ producit effectum. per accidens autem aliquid est causa alterius, si sit causa remouens prohibens, sicut dicitur in 8. Phisic. quòd diuellens columnam, per accidens mouet lapidem in columna super positum. Ideò, peccatum primi parentis non est per se causa istorum defectuum, cū huiusmodi defectus sint præter intentionem peccantis: sed benè per accidens horum, & mortis causa dicitur, inquantum per peccatum primi parentis sublata est originalis iustitia, per quam sublationem secuta est mors, & cæteri omnes defectus corporis, qui quidem defectus secundum iustitiam Dei punientis ordinati sunt, non autem secundum intentionem peccantis, nisi per accidens. nemo enim peccat, vt habeat malum, sed vt habeat bonum, quamuis illud bonum sit apparens, & non verum: Vnde, si postmodum quis, propter peccatū ab eo cōmissū, punitur, hoc præter eius intentionē euenit. Mors itaq; & oēs defectus corporales sunt quædam pænæ originalis peccati.

Vtrum mors, & cæteri defectus sint homini naturales.

RESOLVTIO.

Dicendum est secundum Thom. in 1. 2. Q. 85. art. 6. quòd homo potest considerari dupliciter,

pliciter, vel secundum suam formam, quæ est anima rationalis: & sic homo naturaliter est incorruptibilis, nec mors homini naturalis est. vel secundum materiam sibi relictam: & sic, quia ex inclinatione materiæ ex contrarijs compositæ, sequitur corruptibilitas in toto, dicere possumus, quod homo naturaliter sit corruptibilis, & mors, & ceteri defectus sint ipsi naturales.

Vtrum aliqua macula maneat in anima, post actum peccati.

R E S O L V T I O.

Dicendum est secundum D.Th. in 1.2. Q.86. art.2. quod macula in anima manet, quavis transeat actus peccati. macula enim significat defectum quendam nitoris, propter recessum à lumine rationis, vel Diuinæ legis; & ideò quamdiu homo manet extra huiusmodi lumen, manet in eo macula peccati: sed postquam redit ad lumen rationis, & ad lumen Diuinum, quod fit per gratiam, tunc macula cessat. pœnitentia autem est illa, per quam homo gratiam, & lumen rationis recipit.

Vtrum omne peccatum inducat reatum pœnæ æternæ.

R E S O L V T I O

Dicendum est secundum D.Thom. in 1.2. Q.87. artic.5. quod peccatum duplex est, mortale scilicet,

scilicet, & veniale. Ideò peccatum mortale causat reatum pœnæ æternæ, in quantum irreparabiliter repugnat ordini Diuinæ iustitiæ, per hoc scilicet, quod contrariatur ipsi principio ordinis, quod est ultimus finis. Peccatum verò veniale non est causa nisi pœnæ temporalis, nam in huiusmodi peccatis, est quidem aliqua inordinatio, non tamen per contrarietatem ad ultimum finem, sed solum circa ea, quæ sunt ad finem; veluti cum homo, etsi nimis ad aliquam rem temporalem afficiatur, non tamen pro ea vellet Deum offendere, faciendo aliquid contra eius præceptum. Unde, huiusmodi peccatis non debetur pœna æterna, sed temporalis. & sic manifestum est, quòd non omne peccatum, sed solum mortale inducit reatum pœnæ æternæ.

Vtrum peccatū veniale possit fieri mortale.

R E S O L V T I O.

Dicendum est secundum Th. in 1.2. Q. 88: art. 3. & 4. quòd peccatum veniale, quatenus veniale est, nullo modo fieri mortale potest. si verò peccatum veniale consideretur, ut actus transiens de vno actu simplici ad actū compositum. sic peccatum veniale potest fieri mortale: nam mutatur actus voluntatis simplex in compositum: veluti, v. g. si quis moveatur à concupiscentia videndo mulierem: in primo actu non

80 *Quæstionum Theologicarum*
committit peccatum mortale, sed veniale. cùm ve-
rò cogitat de ipsa inordinatè, componendo, & di-
uidendo, adhibendo consensum, tunc transit de ve-
niale ad mortale. & sic veniale per dispositionem
hoc modo fit mortale. si quis verò quærat, an mul-
ta venialia peccata constituant vnum mortale, di-
cendum est, quòd peccata venialia possunt conside-
rari dupliciter. Vno modo quatenus venialia sunt,
(vt dixi.) & sic nullo pacto, venialia multa pos-
sunt constituere vnum peccatum mortale: ratio est,
quia peccatum mortale habet reatum pænæ eter-
næ: veniale verò reatum pænæ temporalis. Vn-
dè, nec omnia peccata de mundo possunt habere
tantum de reatu, quantum vnum peccatum mor-
tale. Alio modo considerari possunt peccata ve-
niale dispositiue: & sic verum est, quòd vnum,
vel duo, vel multa venialia possunt facere vnum
mortale per dispositionem ad illud, vt dictum est.

Vtrum primus homo in statu innocentie po-
tuerit peccare venialiter.

R E S O L V T I O.

Dicendum est secundum D.Th. in 1.2. Q.89.
art.3. quòd primus homo peccare veniali-
ter non potuit, antequam peccaret morta-
liter. nam nullo modo potuit esse, vt in statu in-
nocentie, committeret primus homo aliquid, quod
esset de se peccatum veniale, antequam integrita-
tem

tem primi status amitteret, peccando mortaliter. clarum est igitur, quod primus homo in statu innocentiae venialiter peccare non potuit, sed solum mortaliter. postquam verò mortaliter peccauit, etiam ex consequenti venialiter peccare potuit.

Vtrum blasphemiam sit peccatum mortale.

R E S O L V T I O.

Dicendum est secundum D.Th. in 2.2. Q. 13. art. 2. quod sic, nam peccatum mortale est illud, per quod homo separat à primo principio spiritualis vitæ, quod est charitas Dei Opt. Max. Vnde, quæcunque charitati repugnant ex suo genere sunt peccata mortalia: blasphemia autem secundum genus suum repugnat charitati Diuinæ, cum derogat Diuinæ bonitati, quæ est obiectum charitatis. & ideo blasphemia est peccatum mortale ex suo genere.

Vtrum peccatum in Spiritum Sanctum sit irremissibile.

R E S O L V T I O.

Dicendum est secundum Magist. sent. in 2. distin. 43. & Th. in 2.2. Q. 14. art. 3. quod peccatum in Spiritum Sanctum dicitur irremissibile solum per finalem impænitentiam, non alio modo: & hoc est, quando aliquis perseverat in peccato mortali, usque ad mortem. & dicitur in Spiritum

Sanctum, quia est contra virtutem, & bonitatem Spiritus Sancti, non autem quòd Deus nolit, vel non possit remittere aliquod peccatum ita specialiter nominatum, quia si sic, tunc misericordia Dei non esset infinita, quòd omninò falsum est, sed hoc ideò est, quia homo semper perseuerans in peccato mortale, vel credit nunquàm à Deo posse obtinere veniam: vel putat illam sine pœnitentia obtinere. præterea, sciendum est quòd per peccatum in Spiritum Sanctum, non debemus intelligere, quòd alia sit offensio, qua offenditur Spiritus Sanctus, & alia, qua offenditur filius, & alia, qua offenditur pater: eo quòd offensa vnius est offensa omnium: sed quia patri attribuitur potentia, ideò peccatum ex infirmitate propriè cõmititur contra patrem, communiter verò contra omnes personas: similiter, quia filio attribuitur sapientia, peccatum ex ignorantia propriè committitur contra filium, communiter autem contra omnes personas. Spiritui sancto verò attribuitur bonitas, ideò peccatū ex malitia committitur contra Spiritum Sanctum propriè, sed communiter contra totam Trinitatem, vt de alijs dictum est. Vndè peccatum in Spiritum Sanctum dicitur irremissibile, quia peccator ex propria malitia nunquàm vult agere pœnitentiā, & si peccator infinita peccata ex propria malitia commisisset, adhuc posset agere pœnitentiam, quia Deus ex sua infinita bonitate, pœnitentiam agentibus,

tibus, omnia peccata remittit. Vnde, ex parte sui peccatum in Spiritum Sanctum est irremissibile, scilicet per finalem impœnitentiam, licet Deus remittere possit.

Quare peccatum primorum parentũ remediabile fuit, non autem peccatum Angelorum.

R E S O L V T I O.

Dicendum est secundum Mag. sent. in 2. distin. 21. quòd hoc ideò fuit, quia cùm primus homo per alium fuerit seductus, per alium etiam reparari debuit. Diabolus verò, quia nullo suadente peccauit, etiam ipsius peccatum irremediabile fuit. Alio etiam modo respondetur; quia non tota Angelica natura prauaricata erat, vt corrueret: tota autem humana corruebat, ergo melius erat reparanda.

Quare præsumptio est minus peccatum, quàm desperatio?

R E S O L V T I O.

Dicendum est secundum Tho. in 2. 2. Q. 21. art. 2. quòd hoc ideò est, quia magis proprium est Deo misereri, & parcere, quàm punire, propter eius infinitam bonitatem. illud enim secundum se Deo conuenit, hoc autem secundum nostra peccata.

Vtrum desperatio, & præsumptio simpliciter
sint causa mortis æternæ.

R E S O L V T I O.

Dicendum est secundum D.Th. in 2. 2. loco citato, quòd sic, nam desperatio, & præsumptio simpliciter sunt peccata in Spiritum Sanctum, sed cum peccatum in Spiritum sanctum simpliciter ex parte sui (vt dictum est) sit irremissibile, & causa æternæ mortis, sequitur etiam dicendum, quòd desperatio, & præsumptio sint causa mortis æternæ. & ratio huius est, quia sicuti falsum, & hæreticum est, quòd Deus pœnitentibus non indulgeat, vel quòd peccantes ad pœnitentiam non conuertat: ita similiter erroneum, & hæreticum est, quòd in peccato perseverantibus veniam concedat, & à bono opere cessantibus gloriam largiatur. patet ergo, quòd desperatio, & præsumptio simpliciter sunt causa mortis æternæ.

Vtrum peccare sub spe veniæ, semper ad præsumptionem pertineat.

R E S O L V T I O.

Dicendum est secundum D.Th. in 2. 2. Q. eadem art. 2. in resp. ad tertium, quòd peccare sub spe veniæ, cum proposito perseverandi in peccato, ad præsumptionem pertinet. peccare verò sub spe veniæ quandoque percipiendæ, cum proposito abstinendi

abstinendi à peccato, & pœnitendi de peccato, hoc non est præsumptionis simpliciter: quia per hoc videtur habere voluntatem minus firmatam ad peccandum. Vnde, peccare sub spe veniæ non semper ad præsumptionem pertinet.

Vtrum peccatores sint ex charitate diligendi.

R E S O L V T I O.

Dicendum est secundum D.Th. in 2. 2. Q. 25. art. 6. quòd in peccatoribus duo possunt considerari natura scilicet, & culpa. Secundum naturam quidem, quam à Deo habent, sunt capaces beatitudinis: & ideò peccatores secundum eorum naturam sunt ex charitate diligendi. Secundum verò eorum culpam, quæ Deo aduersatur, & est beatitudinis impedimentum, sunt proculdubio odiendi quicunq; peccatores, etiam Pater, & Mater, & propinqui. præterea, secundum præceptū Diuinum, & B. Aug. omnis proximus est diligendus, sed omnis homo est proximus, igitur omnis homo est diligendus: sed peccatores non desinunt esse homines, quia peccatum non tollit naturam: igitur peccatores quatenus homines sunt, ex charitate diligendi sunt.

Vtrum aliquis possit habere odio seipsum.

R E S O L V T I O .

Dicendum est secundum D. Th. in 1.2. Q.29. art.4. quod impossibile est, quod aliquis, per se loquendo, odiat seipsum. nã naturaliter vnumquodq; appetit bonum, nec potest aliquid sibi appetere, nisi sub ratione boni, quia malum est præter intentionem voluntatis. per accidens autem contingit, quod aliquis seipsum odio habeat, quatenus illud, quod appetit, secundum quid est bonum, simpliciter verò malum: & secundum hoc, aliquis per accidens, (scilicet præter eius intentionem) vult sibi malum, quod est odire. qui enim diligit iniquitatem, non solum animam suam odit, sed etiam seipsum totum.

Vtrum ex necessitate charitatis debeamus diligere inimicos.

R E S O L V T I O .

Dicendum est secundum D. Tho. in 2.2. Q.25. art.8. quod dilectio inimicorum tripliciter potest considerari. Vno modo, vt inimici diligantur in quantum sunt inimici, & hoc est diabolicum, & charitati repugnans, quia hoc esset diligere malum alterius. Alio modo, potest accipi dilectio inimicorum quantum ad naturam in vniuersali, & sic dilectio inimicorum est de necessitate

zate charitatis. Natura enim, cum à Deo creata sit, perfecta, & bona est. Tertio modo potest considerari dilectio inimicorum in speciali, vt scilicet aliquis specialiter moueatur motu dilectionis ad inimicum: & istud non est de necessitate charitatis absolutè, sed secundum quid; quia nec etiam moueri motu dilectionis, in speciali, ad quoslibet homines singulariter, est de necessitate charitatis, cum hoc sit quasi impossibile. est tamen de necessitate charitatis secundum preparationem animi, scilicet quòd homo habeat animum paratū ad hoc, quòd in singulari inimicum diligeret, si necessitas occurreret, & ei subueniret quantum ad victum, & vestitum. sciendum tamen est, quòd vnusquisque tenetur ex necessitate charitatis non solum, pro amicis, sed etiam pro inimicis orare: & si quis intentionaliter vellet inimicum excludere, mortaliter peccaret. inimicus itaq; non quatenus inimicus, sed quatenus homo, ex necessitate charitatis diligendus est.

Vtrum Dēmones sint diligendi.

RESOLVTIO.

Dicendum est secundum D.Th. in 2. 2. Q. 25. art. 11. quòd Dēmones possunt considerari dupliciter. Vno modo in quantum Dēmones sunt, scilicet propter culpam deformes: & sic odio quilibet Dēmones habere debet. Alio modo possunt
 conside-

considerari Dæmones quatenus simpliciter creaturæ sunt (scilicet quantum ad eorum naturam, quæ fuit creata bona à Deo Opt. Max.) & sic Dæmones diligendi sunt. ratio est, quia qui odit creaturam, quatenus creatura est, odio habet etiam creator em, scilicet Deum Opt. Max. qui omnium creator est. Vnde, debemus Dæmones diligere, sicuti etiam creaturas irrationales, in quantum scilicet volumus illos spiritus, & illas creaturas in suis naturalibus conseruari ad gloriam Dei.

Vtrum Deus magis diligendus sit, quàm proximus.

R E S O L V T I O.

Dicendum est secundum D. Thom. in 2. 23. Q. 26. art. 2. & D. Bonauent. in 3. sent. dist. 29. Q. 2. quòd Deus magis diligendus est, quàm proximus; ratio, est quia Deus non ordinatur ad aliud, sed potius ipse est finis, ad quem principaliter ordinantur creaturæ capaces beatitudinis, qui finis est vnus solus, & vltimus, & summum Bonum, non habens aliquid superius se, vel sibi æquale. præterea, si Deus propter se, & super omnia (vt dictum superius est) diligitur dilectione fruitionis: proximus autem propter aliud, scilicet propter Deum, dilectione vsus: certè, & sine dubio, charitas facit nos Deū plus, quàm proximum diligere. Deus igitur, vt
dicis

dicit D. Th. magis est diligendus, quia ipse est causa Beatitudinis: proximus autem est diligendus, sicut Beatitudinē ab eo simul nobiscū participans.

Vtrum quatuor sint diligenda, scilicet Deus, anima propria, proximus, & corpus proprium.

R E S O L V T I O.

D*ilicendum est secundum D. Bonau. in 3. sent dist. 28. Q. 6. quod quatuor sunt diligenda Vnum quod est supra nos. s. Deus. Alterum quod nos sumus. s. anima propria. Tertium quod iuxta nos est, s. proximus. Quartum quod infra nos est. s. corpus proprium. nam diligens aut habet respectum ad id, quod est supra se, aut ad se, aut ad id, quod est iuxta se, aut ad id, quod est infra se. Et secundum hoc, quatuor (ut diximus) ex charitate diligenda sunt, nempe Deus, anima propria, proximus, & corpus propriū.*

Vtrū filius magis sit diligendus, quā pater.

R E S O L V T I O.

D*ilicendum est secundum D. Th. in 2. 2. Q. 26. art. 9. quod dilectio potest considerari dupliciter. Vno modo ex parte obiecti; Et sic pater est magis diligendus, quā filius; quia. s. patrem diligimus sub ratione principij, quod*

quod habet rationem eminentioris boni. Alio modo dilectio potest considerari ex parte ipsius diligētis: & sic magis diligitur, quod est coniunctius. & secundum hoc, filius est magis diligendus, quàm pater; ratio est, quia parentes magis sciunt aliquos esse suos filios, quàm e conuerso. alia ratio est, quia pater statim incipit diligere filium: filius verò tempore procedente incipit diligere patrem.

Vtrum homo magis debeat diligere patrem,
quàm matrem.

R E S O L V T I O .

Dicendum est secundum Th. in 2. 2. Q. 26. art. 10. quòd pater, & mater possunt considerari dupliciter. Vno modo, in quantum sunt vna carò, scilicet vnum principium generationis simul: & sic non magis patrem, quàm matrem diligere debemus. nisi enim fuisset pater, non esset filius: similiter nisi fuisset mater, filius non potuisset naturaliter generari à patre solum. Alio modo pater, & mater possunt considerari, quatenus sunt duo principia, quorum vnum sit agens, & alterum patiens: & sic, quia agens nobilius est patiente, (ut vult Phil.) dicendum est, quòd pater magis est diligendus, quàm mater. alia ratio est, quia pater obtinet locum formæ: mater

ter verò materia: forma autem nobilior est materia, ergo pater hoc modo magis diligendus est.

Vtrum homo plus debeat diligere Vxorem, quam patrem, & matrem.

R E S O L V T I O.

D*icendum est secundum D. Th. in 2.2. Q. 26. art. 11. quòd gradus dilectionis considerari potest dupliciter. Vno modo secundum rationem boni. Alio modo secundum coniunctionem ad diligentem. Secundum ergo rationem boni, quod est obiectum dilectionis, magis sunt diligendi parentes, quàm vxores: quia diliguntur sub ratione principij, & cuiusdam boni eminentioris. Secundum autem rationem coniunctionis, magis diligenda est vxor: quia vxor coniungitur viro, vt vna caro existens, secundum illud Math. 19. itaque non sunt Duo, sed vna caro. & ideò intensius diligitur vxor, sed maior reuerentia est parentibus exhibenda. nec obstat illud, quod dicitur Gen. 2. relinquet homo patrem, & matrem, & adhærebit vxori suæ; nam illa verba intelligenda sunt solùm quantum ad vnionem copulæ carnalis, & cohabitationis; non autem quantum ad obligationem: nam cùm homo habuerit esse per generationem à patre, & matre, etiam illos magis diligere debet.*

Vtrum

Vtrum dare eleemosynam sit in præcepto.

R E S O L V T I O.

Dicendum est secundū Th. in 2.2. Q.32. art. 5. q̄ dare eleemosynā de superfluo, & dare eleemosynā ei, qui est in extrema necessitate, est in præcepto, aliās verò est in cōsilio. Vndè, non oīs necessitas obligat ad præceptum, sed illa sola, sine qua, is, qui necessitatem patitur, sustentari non potest. patet igitur, quòd dare eleemosynam non est in præcepto, nisi de superfluo, & illis solū, qui in extrema sunt necessitate, vt dictum est.

Vtrum eleemosinæ corporales sint potiores, quàm spirituales,

R E S O L V T I O.

Dicendum est secundum D. Th. in 2.2. Q.32. art. 3. quòd corporales, & spirituales eleemosynæ possunt comparari ad inuicem dupliciter. Vno modo simpliciter, s. respectu spiritus; & sic eleemosynæ spirituales præferuntur corporalibus: nam illud, quod exhibetur, nobilius est. s. Donum spirituale, quod præeminet corporali. & ratio huius est, quia sicuti homo sibi ipsi magis debet providere, quantum ad spiritum, quàm quantum ad corpus: similiter, & proximo, quem debet, sicut seipsum, diligere. Alio modo spirituales, & corporales eleemosynæ possunt ad inuicem

alicui comparari secundum quid, respectu s. alicuius casus particularis: & sic aliqua eleemosyna corporalis alicui spirituali præfertur. sicut unusquisque debet potius pascere fame morientem, quam insipientem docere.

Utrum possit fieri eleemosyna de iniuste acquisitis.

R E S O L V T I O.

Dicendum est secundum D.Th. in 2.2. Q.32. art.7. quòd tripliciter aliquid potest esse illicitè acquisitum. Vno modo per furtum, & rapinam, & vsuras, & similia; & sic de talibus illicitè acquisitis, cùm homo teneatur ad restitutionem, eleemosyna fieri non potest. Alio modo aliquid illicitè acquiritur per symoniã, veluti cùm aliquis emit, vel vendit aliquod spirituale; & sic de hoc, quia dans, & recipiens contra iustitiam diuinæ legis faciunt, non debet fieri restitutio, sed debet in eleemosynas erogari. & eadem ratio est in similibus, in quibus scilicet, & datio, & acceptio est contra legem. Tertio modo aliquid illicitè acquiritur non ex parte rei acquisitæ, sed ex parte illius, ex quo acquiritur, quod est illicitum, ut pecunia, quam acquirunt mulieres per meretricium, quod est cõtra legem Diuinam, mulier enim exercendo meretricium turpe agit, & mortaliter peccat. sed in eo quod accepit, non iniuste agit,

*nec contra legem . Vnde quod sic illicitè acqui-
situm est, retineri potest, & de eo eleemosyna fieri .*

*Vtrum aliquis sub potestate constitutus pos-
sit eleemosynam facere .*

R E S O L V T I O .

D*icendum est secundum D.Th. in 2.2. Q.32.
art.8. quòd aliquis existens sub potestate
alterius, quatenus huiusmodi est, nullo
modo à se potest alicui eleemosynam dare, nisi ha-
beat consensum cum illo, cuius potestati est subdi-
tus. nam vna est maxima in omnibus scientijs,
quòd scilicet inferiora reguntur à superioribus. si
verò aliquis habeat aliquid, secundum quod pote-
stati superioris non subdit, tunc de hoc sine dubio
potest eleemosynam facere.*

Vtrum correctio fraterna sit actus charitatis .

R E S O L V T I O .

D*icendum est secundum D.Tho. in 2.2. Q.33.
art.1. quòd sic, nam corripere delinquentem
est quædam eleemosyna spiritualis, sed eleemosy-
na est actus charitatis, ergo correctio fraterna est
actus charitatis. sed notandum est, quòd duplex
est correctio delinquentis. Vna quidem, quæ adhi-
bet remedium peccato, in quantum est quoddam
malum ipsius peccantis: & ista est propriè corre-
ctio fraterna, quæ ordinatur ad emendationem de-
linquen-*

linquentis, & etiam propriè est actus charitatis. Alia verò est correctio, quæ adhibet remedium peccato delinquentis, secundum quod est in malum aliorum, & præcipuè in nocumentum communis boni. & talis correctio est actus iustitiæ, cuius est conseruare reſtitutionem iustitiæ vnius ad alterum.

Vtrum sit licitum occidere peccatores.

R E S O L V T I O.

Dicendum est secundum Thom. in 2. 2. Q. 64. art. 2. quòd occidere peccatores maximè licitum est. nam videmus, quòd si saluti totius corporis humani expediat præcisio alicuius membri, puta, cùm est putridum, vel corruptiuum aliorum membrorum, laudabiliter, & salubriter abscinditur. qualibet autem persona singularis comparatur ad totam communitatem, sicut membrum ad totum corpus. & ideo si aliquis homo sit periculosus eommunitati, & corruptiuus ipsius, propter aliquod peccatum, laudabiliter, & salubriter occiditur, vt bonum commune conseruetur.

Vtrum occidere hominem peccatorem liceat priuatæ personæ.

R E S O L V T I O.

Dicendum est secundum Thom. in 2. 2. Q. 64. art. 3. quòd occidere malefactorem licitum est,

est, in quantum ordinatur ad salutem totius communitatis: & ideò ad illum solum pertinet, cui committitur cura communitatis conseruandæ: sicut ad medicum pertinet præcidere membrum putridum, quando ei commissa fuerit cura salutis totius corporis. cura autem boni communis commissæ est principibus habentibus publicam auctoritatem: & ideò eis solum licet malefactores occidere, non autem priuatis personis.

Vtrum liceat alicui occidere seipsum.

R E S O L V T I O.

Dicendum est secundum D. Tho. in 2.2. Q. 64. art. 5. quòd occidere seipsum omninò illicitum est, & peccatum mortale. nam naturaliter qualibet res seipsam amat: & ideò conseruat se in esse, & corrumpentibus resistit quantum potest. Vnde occidere seipsum est agere contra inclinationem naturalem, & contra charitatem, qua quilibet debet seipsum diligere. & semper est peccatum mortale. Vnde, ad solum Deum pertinet iudicium mortis, & vitæ, secundum illud Deut. 32. ego occidam, & ego viuere faciam.

Vtrum furtum sit peccatum mortale.

R E S O L V T I O.

Dicendum est secundum Tho. in 2.2. Q. 66. art. 6. quòd furtum simpliciter est peccatum mortale.

le. nam peccatū mortale, est quod cōtrariatur charitati, quatenus est vita animæ spiritualis, charitas autē consistit quidē principaliter in dilectione Dei, secundariò autē in dilectione proximi, ad quā pertinet, vt proximo bonū velimus. per furtum autem homo infert nocumentum proximo in suis rebus, & si passim homines sibi inuicem furarentur periret humana societas. Vnde, furtum, tanquam contrarium charitati, est peccatum mortale.

Vtrum liceat alicui furari propter necessitatem.

R E S O L V T I O.

Dicendum est secundum D.Tho. in 2.2. Q.66. art.7. quòd furari licitum est, cū imminet personæ periculum, & aliter subueniri non potest. Vnde vti re aliena, siue manifestè, siue occultè accepta in casu necessitatis extremæ non habet propriè rationem furti: quia per talem necessitatem efficitur suum id, quod aliquis accipit ad sustentandam propriam naturam, & vitam.

Vtrum liceat condemnato ad mortem se defendere, si possit.

R E S O L V T I O.

Dicendum est secundum Thom. in 2.2. Q.69. art.4. quòd aliquis damnatur ad mortem dupliciter. Vno modo iustè: & sic non licet condem-

nato se defendere . licitum enim est Iudici cum resistentem impugnare : Vnde relinquitur quòd ex parte eius sit bellum iniustum , & consequenter peccat . Alio modo condemnatur aliquis iniuste : & sic alicui , in hoc casu , licet se defendere ; nam sicuti licet resistere latronibus , ita licet resistere , in tali casu , malis principibus . patet igitur , quòd iniuste condemnato ad mortem , licet se defendere , si possit . iuste verò condemnato non licet nisi forte propter scandalum .

Vtrum Aduocatus peccet , si iniustam causam defendat .

R E S O L V T I O .

Dicendum est secundum Thom. in 2.2.Q.71. art.3. quòd Aduocatus , vel ignoranter , vel scienter omnes causas defendit : si scienter iniustam causam defendat , tunc graue peccatum committit , & ad restitutionem tenetur eius Damni , quod contra iustitiam , per eius auxilium altera pars incurrit . illicitum enim est alicui cooperari ad malum faciendum , siue consulendo , siue adiuuando , siue qualitercunque consentiendo , quia consilians , & coadiuuans , quodammodo est faciens . Vnde omnes tales ad restitutionem tenentur . si autem ignoranter iniustam causam defendat , putans esse iustam , excusatur secundum modum , quo ignorantia excusari potest .

DE INCARNATIONE.

Vtrum fuerit conueniens Deum incarnari.

RESOLVTIO.

D Icendum est secundum D. Tho. in 3. part. Q. 1. art. 1. quòd Deum incarnari conuenientissimum fuit, vt per visibilia monstrantur inuisibilia Dei: ad hoc enim totus mundus factus est, vt patet per illud Apost. ad Rom. 1. inuisibilia Dei per ea, quæ facta sunt, intellecta conspiciuntur. sed per incarnationis mysterium monstratur simul Bonitas, Iustitia, Sapientia, & potentia Dei, vel virtus. Bonitas quidem, quoniam non despexit proprii plasmatis infirmitatem. Iustitia verò, quia sicuti per Diabolum homo, similiter per hominem (nempe Christum) Diabolus victus fuit. Sapientia verò, quoniam inuenit difficillimi pretij decentissimam solutionem. potentia verò, siue virtus infinita, quia nihil est maius, quàm Deum fieri hominem. Deum igitur incarnari conueniens fuit. Præterea, quicquid pertinet ad rationem boni, conueniens est Deo, pertinet autem ad rationem boni, vt se alijs communicet, quòd quidem maximè fit per hoc, quòd naturam creatam sic sibi coniungit, vt trium scilicet verbi, animæ, & carnis vna sit persona. Deum igitur incarnari maximè conueniens fuit.

Vtrum fuerit necessarium, ad reparationem
generis humani verbum Dei
incarnari.

R E S O L V T I O.

Dicendum est secundum D.Tho. in 3. part.
Q. 1. art. 2. quòd aliquid potest esse neces-
sarium dupliciter. Vno modo simpliciter,
vt cibus est necessarius simpliciter ad conseruatio-
nem humanæ vitæ. Alio modo secundum quid,
vt equus est necessarius ad iter. Ideò primo mo-
do, Deum incarnari, non fuit necessarium, ad re-
parationem humanæ naturæ. Deus enim per suam
omnipotentiam poterat hominem, sine dubio, mul-
tis alijs modis reparare. Secundo verò modo, fi-
lium Dei, ad humanæ naturæ reparationem, in-
carnari, maximè necessarium fuit.

Vtrum si homo non peccasset Deus incar-
natus fuisset.

R E S O L V T I O.

Circa hanc quæstionem duæ sunt opiniones.
Prima est D.Th. Altera verò Scoti. Diuus
Th. in 3. part. Q. 1. art. 3. dicit, qd si Adam
non peccasset, Deus non fuisset incarnatus. reddit
rationem, quoniam in sacra scriptura ubique in-
carnat-

carnationis ratio , ex peccato primi hominis assignatur , ergo incarnationis opus ordinatum esse à Deo in remedium peccati conuenientius dicitur , ita quod peccato nō existente, incarnatio non fuisset. Subdit tamen D.Tho. loco citato , quòd potuisset , etiam peccato non existente , Deus incarnari . reddit rationem , quia potentia Dei non limitatur, ad hoc scilicet, quòd incarnatio sit in remedium peccati . Vndè, D.Th. primò loquitur de facto , secundò verò de possibile . Scotus verò in 3. sent. distin. 7. Q. 3. probabiliter asserit, quòd si Adam non peccasset, adhuc verbum fuisset incarnatum . reddit rationem , quoniam quamuis non venisset vt redemptor , venisset tamen vt glorificator . quidam verò Scotista dicit , quòd etiam peccato non existente, Christus venisset vt redemptor, non vt redemptor subleuatiuus, sed vt redemptor præseruatiuus, quia præseruasset nos à malis. Vndè, si Adam non peccasset (vt dicit Petrus Tat. in 3. sent. loco citato) Christus venisset quatuor modis ; primò , vt Caput Ecclesiæ . Secundò , vt glorificator . Tertiò , vt redemptor præseruatiuus . Quartò , vt immortalis, & impassibilis. Vndè, prima opinio est optima, sed hæc secunda, meo iudicio, non est despicenda .

Vtrum principaliter incarnatio Christi facta
fuerit ad tollendum peccatum ori-
ginale, vel actuale.

R E S O L V T I O.

D Icendum est secundum D. Th. in 3. part.
Q. 1. art. 4. quod peccatum actuale, & ori-
ginale possunt comparari adinuicem du-
pliciter. Vno modo intensiue: sicuti est maior al-
bedo, quæ est intensior. & per hunc modum, ma-
ius est peccatum actuale, quàm originale, quia
plus habet de ratione voluntarij. Vnde, quantum
ad magnitudinem peccati intensiuam, Christus
principaliter venit ad tollendum peccatum actua-
le, quàm originale. Alio modo peccatum origi-
nale, & actuale comparari adinuicem possunt ex-
tensiue, sicut dicitur maior albedo, quæ est in ma-
iori superficie. & hoc modo peccatum originale
(per quod totum genus humanum inficitur) est
maius peccato actuale, quod est proprium perso-
næ singularis. Vnde, quantum ad magnitudinem
extensiuam peccati, Christus principaliter venit
ad tollendum peccatum originale, quàm actuale,
quia bonum vniuersale eminentius est, quàm bo-
num particulare. & sic dicere possumus, quod
Christus venit in hunc mundum non solum ad de-
lendum illud peccatum actuale primorum scilicet
parentum, (quod deinde traductum est originale
in po-

in posteros) sed etiam ad deletionem omnium peccatorum, quæ postmodum superaddita sunt; & hoc intelligendum est, non secundum effectum, sed secundum sufficientiam remedij, nam filius Dei, ex parte sui, fuit sufficiens redemptor ad deletionem omnium peccatorum; licet non omnia deleantur, propter defectum hominum, qui Christo non inhærent.

Vtrum vnio animæ, & corporis facta fuerit in Christo.

R E S O L V T I O.

D*icendum est secundum Th. in 3. part. Q. 2. art. 5. quod realiter in Christo anima corpori vnita fuit, nam Christus dicitur homo vniuocè cum alijs hominibus, vt potè eiusdem speciei existens, secundum illud Apost. ad Philip. 2. in similitudinem hominum factus. pertinet autem ad rationem speciei humanæ, quod anima corpori vnizetur. Vndè, necesse est dicere, quod in Christo fuerit anima corpori vnita.*

Vtrum Diuinæ Naturæ conueniat assumere naturam creatam.

R E S O L V T I O.

D*icendum est secundum Th. in 3. part. Q. 3. art. 2. quod in verbo assumptionis duo significantur, scilicet principium actionis, & terminus*

nus eius. esse autem principium assumptionis; conuenit Naturæ Diuinæ, secundum seipsam, quia eius virtute assumptio facta est; sed esse terminum assumptionis non conuenit Naturæ Diuinæ secundum seipsam, sed ratione personæ, in qua consideratur. & ideò propriissime, & primò persona dicitur naturam creatam assumere. secundariò autem dici potest, quòd etiam natura assumpsit naturam ad sui personam, scilicet quòd Diuina natura in persona filij, humanæ naturæ vnita est. Vndè, secundum hunc modum dicitur Natura incarnata.

Vtrum vna persona possit sine alia naturam creatam assumere.

R E S O L V T I O.

Dicendum est secundum. D. Th. in 3. part.
Q. 3. art. 4. quòd in assumptione duo considerantur actus assumentis, & terminus assumptionis. Actus assumentis procedit ex Diuina virtute, quæ communis est tribus personis: sed terminus assumptionis est persona: & ideò dicamus, quòd actio assumptionis communis est tribus personis, sed terminus assumptionis, conuenit ita vni personæ, quod non alijs. tres enim personæ fecerunt, vt humana natura vniretur vni personæ filij. Vndè quamuis tota Trinitas incarnationem Christi sit operata, (eo quòd opera Trinitatis

nitatis ad extra sunt indiuisa,) sola tamen persona filij est incarnata: nam assumptio humanæ naturæ ad ipsum terminata est, vt dicit Magist. sent. in 3. dist. 1.

Vtrum fuerit magis conueniens, quòd persona filij assumeret humanam naturam, quam alia persona Diuina.

R E S O L V T I O.

Dicendum est secundum Magist. sent. in 3. dist. 1. & Th. in 3. part. Q. 3. art. 8. quòd magis fuit conueniens, quòd filius assumeret humanam naturam, quam alia persona Diuina. & hoc ostenditur tribus rationibus, quarum prima sumitur ex appropriato filij, scilicet sapientia; nam consonum fuit, vt Deus, qui in sapientia omnia condidit, secundum illud Ps. omnia in sapientia fecisti, per sapientiam etiam omnia restauraret. Secunda ratio sumitur ab origine ipsius filij, origo enim filij, est esse ab alio: congruum igitur fuit, vt primò mitteretur ille, qui est à solo patre, deinde verò Spiritus Sanctus, qui est à patre, & filio. Tertia ratio sumitur similiter ex proprio ipsius filij, nam proprium filij est esse filium, ideo congruum fuit, quòd ille, qui erat filius Dei in Diuinate, idem fieret filius hominis in humanitate: qui quidem filius est verus Deus, & verus

Et verus homo: nec sunt Duo filij, sed vnus in duabus Naturis inseparabilibus. Vnde, conueniens fuit, vt per verbum veræ sapientiæ, homo reduceretur in Deum, qui per inordinatum appetitum scientiæ recesserat à Deo.

Vtrum fuerit conueniens, quòd filius Dei humanam naturam assumeret ex stirpe Adæ.

R E S O L V T I O.

D*icendum est secundum Mag. sent. in 3. dist. 12. Et Th. in 3. part. Q. 4. art. 6. quòd hoc maximè conueniens fuit. nam quamuis verbum potuerit assumere aliam humanam naturam, quæ. s. non fuisset de generatione primi hominis, (sicuti enim formauit primum hominem de terra sine generatione alterius, sic etiam potuisset de nouo formare humanam Naturam, Et illam assumpsisse) tamen magis fuit conueniens, q̃ humana natura assumeretur à Deo de generatione Adæ, vt per illam vinceretur Diabolus, per quem homo victus fuit.*

Vtrum Christus descenderit de Cælo, quantum ad corpus.

R E S O L V T I O.

D*icendum est secundum D. Th. in 3. part. Q. 5. art. 2. in resp. ad primum, quòd Christus dicitur de Cælo descendisse dupliciter. Vno modo ratione Diuinæ naturæ, non ita quòd Natura Diuina in*

na in Cælo esse desierit, sed quia in infimis nouo modo esse cæpit, scilicet secundum naturam assumptam. Alio modo ratione corporis, non quia ipsum corpus Christi, secundum suam substantiam de Cælo descenderit. sed quia virtute cælesti, i. virtute Spiritus Sancti, corpus eius formatum fuit.

Vtrum filius Dei assumpserit corpus, & animam simul.

R E S O L V T I O.

Dicendum est secundum Mag. sent. in 3. dist. 2. & D. Th. in 3. part. Q. 6. art. 1. quod simul, & semel, in eodem tempore, filius Dei carnem, & animam assumpsit: nec prius carnem, quàm animam. non obstante tamen, quod dignitatis ordine, non temporis, carnem assumpsit mediante anima, nam Diuina Natura est tantæ simplicitatis, quod non debuit immediatè vniri carni, de limo terræ formatæ, nisi mediante spiritu creato, scilicet anima. quo ordine, anima media inuenitur inter Deum, & carnem, sicuti eodem modo Angelus dicitur medius inter hominem, & Deum. præterea, quia primus homo totam humanam Naturam corruerat. s. corpus, & animam simul, ideò conueniens fuit, quod filius Dei similiter totam naturam. s. animam, & carnem simul assumeret, vt totam simul curaret, & sanctificaret. vniuit igitur sibi filius Dei carnem, & animam

nam simul, quæ quidem vnio ab intellectu creato inuestigari non potest. in qua quidem vnione non corpus fantasticum, sed verum corpus natum de muliere Christus assumpsit; licet hoc hæretici negent, credentes verbum Dei veram carnem non posse assumere sine sui iniquatione; qui error excluditur per simile de radio solis: radios enim solares videmus super immunda, & fæda diffundi, & tamen non inquinari. ideò si hoc est verum de sole, erit sine dubio magis verum de filio Dei, qui sine ulla macula, & sui iniquatione factus est verus homo. patet igitur, quòd filius Dei corpus, & animam simul assumpsit.

Vtrum caro prius fuerit à Verbo assumpta, quàm animæ vnita.

R E S O L V T I O.

*D*icendum est secundum Th. in 3. part. Q. 6. art. 4. quòd cum caro humana sortiatur esse per animam, non debuit ante assumi, quàm esset caro humana, quòd factum est anima rationali adueniente. sicut igitur anima non est prius assumpta, quàm caro, (quia contra naturam animæ est, vt prius sit, quàm corpori vniatur) ita caro non debuit prius assumi, quàm anima, quia non prius est caro humana, quàm habeat animam rationalem. Vndè possumus dicere, quòd ante aduentum animæ, non est caro humana, sed potest esse

esse dispositio ad carnem humanam: in conceptione tamen Christi, Spiritus Sanctus, qui est agens infinitæ virtutis, simul & materiam disposuit, & ad perfectum perduxit.

Vtrum in Christo fuerit fides.

RESOLVTIO.

Dicendum est secundum. D. Tho. in 3. part. Q. 7. art. 3. quòd in Christo, fides locum habere non potuit. ratio est, quia obiectū fidei est res Diuina non visa, posito autem quòd res Diuina sit visa, excluditur ratio fidei, quæ est de non apparentibus, vt dicit Apost. ad Hæbr. 11. fides est substantia sperandarum rerum, argumentum non apparentium. Vndè, cū Christus ab instanti suæ conceptionis, plenè viderit Deum per essentiam, sequitur, q̄ in eo fides esse non potuit:

Vtrum in Christo fuerit spes.

RESOLVTIO.

Dicendum est secundum. D. Th. in 3. part. Q. 7. art. 4. quòd in Christo simpliciter non fuit spes, sed solum secundum quid. nam sicuti de ratione fidei est, quòd aliquis assentiat his, quæ non videt: ita de ratione spei est, quòd aliquis expectet id, quòd non dum habet: & sicuti fides, inquantum est virtus Theologica, non est de quocunque non viso, sed solum de Deo
ita

ita etiam spes, quatenus est virtus Theologica, habet pro obiecto ipsum Deum, cuius fruitionem homo principaliter expectat per spei virtutem; sed ex consequenti ille, qui habet virtutem spei, potest etiam in alijs Diuinum Auxilium expectare, sicut & ille, qui habet virtutem fidei, non solum credit Deo de rebus Diuinis, sed etiam de quibuscunque alijs Diuinitus sibi reuelatis. Christus autem à principio suæ conceptionis plenè habuit fruitionem Diuinam, & ideò simpliciter non habuit spem, quæ est virtus Theologica, sed habuit spem secundum quid, scilicet respectu aliquorum, quæ non dum erat adeptus (fidem verò nullo modo habuit, quia omnia plenè cognoscebat, & videbat) nempe spem immortalitatis, & gloriæ corporis, quæ ad eius perfectionem pertinebant.

Vtrum in Christo fuerit gratiæ plenitudo.

R E S O L V T I O.

Dicendum est secundum D. Th. in 3. par. Q. 7. ar. 9. quòd Christus verè habuit plenitudinē gratiarum. quòd ostenditur taliratione. quanto aliquod receptiuum propinquius est causæ influenti, tanto abundantius recipit, sed anima Christi, inter omnes creaturas rationales, propinquius coniungitur Deo, ergo anima Christi maximam recipit influentiam gratiæ eius, & consequenter in Christo fuit plenitudo gratiæ. præterea, propter quod

quod vnumquoque, & illud magis est, teste Phil. 1. post; sed propter Christum nos gratiam habemus, ergo maximam Christus gratiam habuit. Vnde, sicut ignis, qui est causa caloris in omnibus calidis, est maximè calidus, similiter oportuit, quòd anima Christi haberet plenitudinem gratiæ, vt ex ea quondam modo transfunderetur in alios.

Verum gratia Christi sit infinita.

R E S O L V T I O.

Dicendum est secundum Th. in 3. par. Q. 7. ar. 11. quòd in Christo duplex potest considerari gratia. Vna quidem est gratia vniõis, quæ est ipsum vniri personaliter filio Dei, quòd gratis concessum est humanæ Naturæ: & hoc modo, sicut ipsa persona Verbi est infinita, similiter hæc gratia est infinita. Alia verò est gratia habitualis, quæ quidem dupliciter considerari potest. Vno modo, quatenus ens est: & sic gratia habitualis Christi finita est, est enim in anima ipsius Christi sicut in subiecto. Vnde, cum anima Christi sit creatura quædam finitæ capacitatis, sequitur etiam, quòd hæc gratia habitualis, quatenus ens est, finita sit. Alio modo considerari potest gratia habitualis, quatenus gratia est, scilicet secundum propriam rationem gratiæ: & sic est infinita; quia non est limitata secundum ali-

Quæstionum Theologicarum
*quam certam mensuram, habet enim quicquid per-
 tinere potest ad rationem gratiæ.*

Vtrum Christus sit caput Ecclesiæ.

R E S O L V T I O.

Dicendum est secundum D. Tho. in 3. part.
 Q. 8. art. 1. quod Christus metaphoricè
 caput Ecclesiæ dicitur. nam sicuti tota Ec-
 clesia dicitur vnum corpus mysticum, per simili-
 tudinem ad corpus naturale hominis, quod secun-
 dum diuersa membra habet diuersos actus: ita
 Christus dicitur Caput Ecclesiæ, secundum simi-
 litudinem humani capitis, in quo tria considerare
 possumus ordinem scilicet, perfectionem, & vir-
 tutem. Ordinem quidem, quia caput est prima
 pars hominis, incipiendo à superiori: & inde est,
 quod omne principium consuevit vocari caput.
 Perfectionem verò, quia in capite vigent omnes
 sensus, in cæteris verò membris solum sensus ta-
 ctus. Virtutem autem, quia virtus, & motus
 ceterorum membrorum & gubernatio eorum est à
 capite, propter vim sensitiuam, & motiuam ibi
 dominantem hæc autem tria competunt Christo spi-
 ritualiter, primo enim considerando ordinem, se-
 cundum propinquitatem ad Deum, gratia ipsius
 Christi dicitur altior, & prior formaliter: quoniã
 omnes alij acceperunt gratiam, per respectum ad
 gratiam ipsius. Secundo verò perfectionem habet,
 quantum

quantum ad plenitudinem omnium gratiarum, secundum illud Ioan. 1. *Vidimus eum plenum gratia, & veritatis. Tertio, virtutem habet influendi gratiam in omnia membra Ecclesiae, secundum illud Ioan. 1. de plenitudine eius omnes accepimus. Unde, manifestum est, quod Christus est Caput Ecclesiae, & in ipso sunt omnes gratiae, sicut in capite sunt omnes sensus: in membris vero Christi est gratia, sicut solus sensus tactus est in cæteris membris humani corporis.*

Vtrum Diabolus sit caput omnium malorum.

RESOLUTIO.

Dicendum est secundum D. Th. in 3. part. Q. 8. art. 7. quod aliquis potest dici caput alicuius multitudinis dupliciter. vel secundum interiorem influxum, & exteriorem gubernationem. & sic Christus est Caput Ecclesiae, ut dictum est. vel secundum exteriorem gubernationem tantum. & sic quilibet Princeps, vel Prelatus est caput multitudinis sibi subiectæ. & per hunc modum Diabolus dicitur caput omnium malorum, secundum illud Iob. 41. Ipse est Rex super omnes filios superbiae. pertinet autem ad gubernatorem, ut eos, quos gubernat ad suum finem adducat, finis autem Diaboli est auersio rationalis creaturae à Deo. Unde, & a principio, homi-

Quæstionem Theologicarum
nem ab obedientia Diuini præcepti remouere ten-
tauit. & ex hoc, Diabolus dicitur Caput omnium
malorum.

Vtrum Christus habuerit aliquam scien-
tiam præter Diuinam.

R E S O L V T I O.

Dicendum est secundum D. Th. in 3. part.
Q. 9. art. 1. quòd sic, Nam filius Dei,
vt dictum est, humanam naturam integram
assumpsit, idest non solum corpus, sed etiam ani-
mam, non solum sensitiuam, sed etiam rationa-
lem: & ideo oportuit, quòd haberet scientiam
creatam, propter tria. primò quidem propter ani-
mæ perfectionem. Anima enim secundum se con-
siderata est in potentia ad intelligibilia cognoscen-
da, est enim sicut tabula rasa, in qua nihil scrip-
tum est, & tamen possibile est in ea scribi per in-
tellectum possibilem, qui est in potentia omnia fie-
ri, vt dicit Phil. in 3. de anima. Illud autem quòd
est in potentia est imperfectum, nisi reducatur ad
actum. non autem filius Dei humanam naturam
imperfectam assumpsit, sed perfectam, quia, illa
mediante, totum genus humanum ad perfectum
erat reducendum. Secundò quia cum qualibet
res sit propter suam operationem, frustra habe-
ret Christus animam intellectuam, nisi secundum
illam intelligeret, quod pertinet ad scientiã creatã.

Ter.

Tertiò, quia aliqua scientia creata pertinet ad Naturam animæ humanæ: nihil autem Naturalium Christo defuit, quia totam humanam naturam integram suscepit, ut dictum est. Vnde, oportuit, quòd anima Christi aliquam scientiam, præter Diuinam, haberet, alioquin anima Christi esset imperfectior animabus aliorum hominum.

Vtrum anima Christi comprehenderit Diuinam Naturam.

R E S O L V T I O.

D*icendum est secundum D. Tho. in 3. part. Q. 10. art. 1. q̄ cum in Christo proprietas vtriusque Naturæ, scilicet Diuinæ, & humanæ inconfusa permanferit, ita .s. q̄ increatum manserit increatum, & creatum manserit infra limites creaturæ, impossibile est, quòd anima Christi Diuinam comprehenderit essentiam: ratio est, quia nulla creatura Diuinam Naturam comprehendere potest, (ut dicit Th. in 1. par. Q. 12. art. 7.) eo quòd infinitum non comprehenditur a finito. & ideo concludendum est, quòd anima Christi nullo modo comprehendit Diuinam essentiam.*

Vtrum anima Christi in verbo omnia cognouerit.

R E S O L V T I O.

D*icendum est secundum D. Th. in 3. par. Q. 10. art. 2. quòd anima Christi in verbo omnia*

cognoscere, potest intelligi dupliciter. Vno modo, quod cognoscat omnia .s. quocunque modo sunt, vel erunt, vel fuerunt, vel facta, vel dicta, vel cogitata à quocunque, secundum quodcunque tempus. & sic dicendum est, quod anima Christi in verbo cognoscit omnia. Alio modo, potest intelligi, quod anima Christi cognoscat omnia, non solum scilicet, quæ sunt actu, secundum quodcunque tempus, sed etiam quæcunque sunt in potentia nunquam reducenda, vel reducta ad actum. Horum autem Quædam sunt in sola potentia Diuina, & huiusmodi non omnia cognoscit in verbo anima Christi. hoc enim esset comprehendere omnia, quæ Deus facere potest, quod esset comprehendere Diuinam virtutem, & per consequens Diuinam essentiam. Quædam verò sunt non solum in potentia Diuina, sed etiam in potentia Creaturæ, & huiusmodi omnia scit anima Christi in Verbo. comprehendit enim in Verbo essentiam cuiuslibet creaturæ, & per consequens etiam virtutem, & omnia, quæ in creaturæ potentia sunt.

Vtrum anima Christi videat verbum, siue Diuinam essentiam clarins quolibet alia creatura.

RESPONSTIO.

Dicendum est secundum Tb. in 3. part. Q. 10. art. 4. quod sic, nam cum anima Christi (quæ

(*quæ unita est Verbo in persona*) propinquius Deo coniungatur, quàm quævis alia creatura, necesse est, quòd etiam plenius recipiat influentiam luminis, in quo Deus videtur ab ipso Verbo, quàm quæcunque alia creatura. Vnde præ ceteris creaturis perfectius videt anima Christi ipsam veritatem, quæ est Dei essentia.

Vtrum scientia in Christo fuerit maior scientia Angelorum.

RESOLUTIO.

Dicendum est secundum D. Th. in 3. par. Q. II. art. 4. quòd scientia indita animæ Christi potest considerari dupliciter. Vno modo secundum id, quod habuit ex causa influente. Alio modo secundum illud, quod habuit ex subiecto recipiente. Quantum igitur ad primum, scientia indita animæ Christi, fuit multo excellentior, quàm Angelorum scientia; nam lumen spiritualis gratiæ, quod animæ Christi inditum est, multo est excellentius, quàm lumen, quòd pertinet ad Naturam Angelicam. Quantum autem ad secundum, (scilicet quantum ad modum cognoscendi, qui est naturalis animæ humanæ, per conuersionem ad phantasmata) scientia indita animæ Christi, est infra scientiam Angelorum; nam scientia animæ Christi fuit aliquo modo collatiua, & discursiua, quod non potest dici de scientia Angelica. Vnde, respe-

118 *Quæstionum Theologicarum*
Et diuerſorum, ſcientia in Chriſto fuit maior, &
minor, ſcientia Angelorum.

Vtrum Chriſtus aliquid ab homine didiceret.

R E S O L V T I O.

D*icendum eſt ſecundum Th. in 3. par. Q. 12.*
art. 3. quòd Chriſtus nihil ab homine didi-
cit, nam Chriſtus conſtitutus eſt caput Ec-
cleſiæ à Deo Opt. Max. & omnium hominum, vt
non ſolùm omnes per illum acciperent gratiam, ſed
etiam, vt omnes ab eo doctrinam veritatis recipe-
rent. Vndè, ipſe dicit Ioan. 18. in hoc natus ſum,
& ad hoc veni in mundum, vt Teſtimonium perhi-
beam veritati. & ideò non fuit conueniens eius di-
gnitati, vt à quocunq; homine ſcientiam acciperet.

Vtrum Chriſtus aliquid acceperit ab
Angelis.

R E S O L V T I O.

D*icendum eſt ſecundum Th in 3. par. Q. 12.*
ar. 4. quòd Chriſtus nullo modo aliquam
accepit ſcientiam ab Angelis, nam ſicuti
anima humana media eſt inter ſpirituales ſub-
ſtantias, & res corporales, ita duobus modis na-
ta eſt perfici. Vno quidem modo per ſcientiam ac-
ceptam ex ſenſibilibus. Alio modo per ſcientiam
inditam ex illuminatione ſpiritualium ſubſtan-
tiarum. Vtroque autem modo, anima Chriſti
fuit

fuit perfecta, ex sensibilibus quidem, secundum scientiam experimentalem, ad quam non requiritur lumen Angelicum, sed sufficit lumen intellectus Agentis. ex illuminatione verò superiori, secundum scientiam infusam, quam immediate adeptus est à Deo: non autem mediantibus Angelis, qui etiam ex influëtia Verbi (.s. à Deo rerum scientiam in sui principio acceperunt. patet igitur, quòd Christus nullam accepit scientiam ab Angelis.

Vtrum anima Christi simpliciter habuerit omnipotentiam.

R E S O L V T I O.

Dicendum est secundum D. Tho. in 3. part. Q. 13. art. 1. quòd animæ Christi conuenire omnipotentiam impossibile est. nam in mysterio incarnationis, ita facta est vnio in persona, quòd tamen remansit distinctio Naturarum, vtraq; scilicet Natura retinente id, quod sibi proprium est; sed propriè omnipotentia Deo attribuitur, non animæ Christi, ergo impossibile est, quòd animæ Christi possit omnipotentia conuenire.

Vtrum filius Dei in humana Natura assumere debuerit corporis defectus.

R E S O L V T I O.

Dicendum est secundum Tho. in 3. part. Q. 14. art. 1. & Magist. sent. in 3. distin. 15. quòd
conue-

conueniens fuit, ut filius Dei, in corpore assumpto, humanis infirmitatibus, & defectibus subiaceret. nam ad hoc filius Dei, carne assumpta, venit in mundum, ut pro peccato humani generis satisfaceret. Vnus autem pro peccato alterius satisfacit, dum pœnam pro peccato alterius, debitam in se suscipit; huiusmodi autem defectus corporales, ut fames, sitis, mors, & huiusmodi, sunt peccati pœna, quod est in mundum per Adam introductum, secundum illud Apost. ad Rom. 5. per unum hominem peccatum intrauit in mundum, & per peccatum mors. Vitia verò corporis, & agitudines quamplurimas, peccatum, ignorantiam, & huiusmodi, quæ sunt quidam animi, & corporis defectus, Christus non assumpsit, sed tantum assumpsit illos defectus, quos ad salutem generis humani congruebat assumere, & qui suæ dignitati non derogarent. Ideò ut filius Dei probaretur habere verum corpus, & veram animam, assumpsit humanam Naturam, & ipsius defectus, ut famem, sitim, tristitiam, timorem, & huiusmodi.

Vtrum Christus defectus corporales contraxerit.

R E S O L V T I O.

Dicendum est secundum D. Tho. in 3. part. Q. 14. art. 3. quòd nullo modo, Christus defectus corporales contraxit. nam illud dicitur

dicitur contrahi, quod simul cum sua causa, ex necessitate trahitur: causa autem mortis, & horum defectuum humanorum est peccatum; quia per peccatum mors intrauit in hunc mundum, ut dicitur Rom. 5. & ideo illi propriè dicuntur hos defectus contrahere, qui ex debito peccati hos defectus incurrunt. Christus autem nullo modo peccatum contraxit, neque ex debito huius necessario, sed benè huiusmodi defectus voluntariè assumpsit, non autem ex necessitate contraxit. potuisset enim filius Dei sine dubio, Naturam humanam assumere, absq; pœna, sed liberè voluit pœnam suscipere, propter opus nostræ redemptionis implendū: & ideo habuit huiusmodi defectus, non contrahendo, sed voluntariè assumendo. præterea, secundum Magist. sent. in 3. dist. 16. quatuor dicuntur status hominum, quorum primus fuit status innocentiae, ante peccatum. Secundus post peccatum, & ante gratiam. Tertius post peccatum, & sub gratia. Quartus erit in gloria, expers omnis miseriæ. Undè, Christus dicitur aliquid, de quolibet statu hominis, assumpsisse. de primo enim statu Christus accepit immunitatem peccati; de secundo pœnalitates, & alios defectus. de Tertio vcrò plenitudinem gratiæ. de Quarto non posse peccare, & Deum perfectè contemplari.

Vtrum in Christo fuerit peccatum?

R E S O L V T I O.

Dicendum est secundum D.Th.in 3.par.Q.15.
art.1. quòd in Christo peccatum nullo modo
locum habere potuit. & ratio est ista. quia licet
Christus nostros suscepit defectus, vt pro nobis
satisfaceret, & vt veritatem humane Naturæ
comprobaret, & vt nobis fieret exemplum virtu-
tis; non tamen peccatum aliquo modo assumere
debuit. peccatum enim nihil operatur ad satisfac-
tionem, imò virtutem satisfactionis impedit. præ-
terea, id, quod est naturale, Christus assumpsit, non
autem peccatum, quod est contra naturam, perse-
minationem Diaboli introductum. Vndè, Chri-
stus nullo modo assumpsit defectum peccati, nec
originalis, nec actualis, secundum illud 1. Pet. 2.
qui peccatum non fecit.

Vtrum in Christo fuerit ignorantia.

R E S O L V T I O.

Dicendum est secundum D.Th.in 3.par.Q.15.
art.3. quòd in Christo ignorantia esse non po-
tuit: nam sicut in Christo fuit plenitudo gratiæ,
& virtutis: ita in ipso fuit plenitudo omnis scien-
tiæ, vt superius dictum est. Sicuti autem in Chri-
sto plenitudo gratiæ, & virtutis excludit fomitem
peccati: ita plenitudo scientiæ excludit ignoran-
tiam,

etiam, quæ scientiæ opponitur. Vndè, sicut in Christo non fuit fomes peccati, ita non fuit in eo ignorantia.

Vtrum anima Christi fuerit passibilis.

R E S O L V T I O.

Dicendum est secundum Th. in 3. par. Q. 15. art. 4. quòd cum anima sit forma corporis, consequens est, quòd vnum sit esse animæ, & corporis: & ideo corpore perturbato per aliquam corpoream passionem, necesse est, quòd anima per accidens perturbetur, scilicet quantum ad esse, quod habet in corpore. quia igitur Corpus Christi fuit passibile, & mortale, necesse est, quòd etiam eius anima, hoc modo, passibilis esset.

Vtrum ex necessitate Christus passus fuerit.

R E S O L V T I O.

Dicendum est secundum D. Thom. in 3. part. Q. 15. art. 4. in resp. ad prim. quòd Christus voluntariè passus est. ratio est, quia anima eius poterat, sine dubio resistere passionibus, vt ei non superuenirent, præsertim virtute Diuina, sed propria voluntate passionibus subiacebat, tam corporalibus quàm animalibus. Vndè, non ex necessitate, sed ex liberalitate suæ voluntatis, Christus passus est pro nobis mortem, mortem autem crucis.

Vtrum

Vtrum in Christo fuerit dolor sensibilis.

R E S O L V T I O.

Dicendum est secundum Tho. in 3. part. Q. 15. art. 5. quòd ad veritatem doloris sensibilis, requiritur læso corporis, & sensus læsionis. corpus autem Christi poterat ladi, quia, (vt dictum est) erat passibile, & mortale. nec defuit ei sensus læsionis, cum anima Christi perfectè haberet omnes potentias naturales. Vnde, nulli dubium, esse debet, quin in Christo fuerit verus dolor.

Vtrum in Christo fuerit timor.

R E S O L V T I O.

Dicendum est secundum Tho. in 3. part. Q. 15. art. 7. quòd timor potest considerari dupliciter. Vno modo, quantum ad hoc, quòd appetitus sensitivus naturaliter refugit corporis læsionem, & per tristitiam, si sit præsens, & per timorem, si sit futura. & hoc modo timor fuit in Christo, sicut & tristitia. Alio modo potest considerari timor, secundum incertitudinem futuri euentus, sicuti quando nocte timemus ex aliquo sonitu, quasi ignorantes, quid hoc sit. & quantum ad hoc, timor non fuit in Christo, nam benè sciebat passionem præsentem, & venturam.

Vtrum

Vtrum in Christo fuerit ira.

R E S O L V T I O.

Dicendum est secundum Th. in 3. part. Q. 15. art. 9. quod ira est passio composita ex tristitia, & appetitu vindictæ. in Christo tristitia esse potuit, ut dictum est. Appetitus autem vindictæ, Quandoq; est cum peccato, quando scilicet aliquis vindictam querit, absque ordine rationis. & sic ira in Christo esse non potuit, huiusmodi enim ira, dicitur talis per vitium. Quandoq; verò talis appetitus est sine peccato, imò est laudabilis, puta cum aliquis appetit vindictam, secundum ordinem iustitiæ, & vocatur ira per Zelum: & sic talis ira fuit in Christo.

Vtrum Christus sit creatura.

R E S O L V T I O.

Dicendum est secundum Th. in 3. part. Q. 16. art. 8. quod Christus potest considerari dupliciter, vel secundum humanam naturam: & sic Christus est creatura. vel secundum Diuinam naturam: & sic Christus non creatura, sed Deus, & Creator omnium est. Vnde, in hoc errauerunt Arriani hæretici, qui Christum dixerunt esse creaturam, & minorem patre, non solum ratione humane Naturæ, sed etiam ratione Diuinæ personæ. quod omninò alienum est à fide. Nos autem dicamus,

camus, quòd sicuti ætiops dicitur secundum quid albus, scilicet secundum dentes; absolute verò niger, secundum totum subiectum: similiter respectu diuersorum, Christus dicitur esse, & non esse creatura. Christus enim secundum quid, scilicet quatenus homo, est creatura. absolute verò, scilicet quatenus Deus, est creator; & principium omnium creaturarum. Præterea, secundum humanam Naturam, est minor patre. Secundum Diuinam verò æqualis est patri, qui non solum cum filio, sed etiam cum Spiritu Sancto vna est essentia, & natura Diuina.

Utrum in Christo sint duæ voluntates.

R E S O L V T I O.

Dicendum est secundum Tho. in 3. part. Q. 18. art. 1. quòd sic, nam cum Christus sit Deus, & homo, necesse est, quòd quatenus Deus habeat voluntatem Diuinam: quatenus verò homo habeat voluntatem humanam: alioquin filius Dei non assumpsisset humanam naturam integram; sed quia Christus integraliter factus est homo, similiter ex consequenti dicere debemus, quòd filius Dei assumpserit voluntatem humanam, in humana Natura existentem, per quam quidem humanæ Naturæ assumptionem, nullam diminutionem passus est filius Dei scilicet Christus, in his, quæ pertinent ad Diuinam Naturam, cui competit voluntatem habere,

bere, vt in superioribus dictum fuit. Vndè, neceſſe eſt dicere, quòd in Chriſto duæ ſint voluntates, vna æterna, alia temporalis, ſcilicet Diuina, & humana.

Vtrum humana Chriſti voluntas omninò fuerit conformis Diuinæ voluntati in voluto.

R E S O L V T I O.

Dicendum eſt ſecundum D.Th. in 3. part. Q. 18. art. 5. quòd in Chriſto ſecundum humanam Naturam, multiplex ponitur voluntas, ſcilicet voluntas ſenſualitatis, quæ participatiuè voluntas dicitur: & voluntas rationis, quæ dupliciter conſideratur, vel per modũ Naturæ, vel per modum rationis. Ideò Chriſtus ſecundum voluntatem ſenſualitatis, & ſecundum voluntatem rationis, per modum Naturæ conſideratæ, pati volebat, & conſequenter paſſionem refugiebat: & ſic aliud poterat velle, quàm Deus. Secundum voluntatem verò, quæ eſt per modum rationis, ſemper idem volebat, quod Deus. quòd patet ex hoc ipſo, quod dicit. non ſicuti ego volo, ſed ſicut tu. Vndè manifeſtum eſt, quòd Chriſtus ſecundum voluntatem humanam per modum rationis acceptam, ſemper idem voluit, quod Deus, & per conſequens eius voluntas fuit conformis voluntati Diuinæ in voluto.

Vtrum Christus meruerit solum nobis, &
non sibi.

R E S O L V T I O.

Dicendum est secundum Magist. sent. in 3. dist. 18. & Th. in 3. part. Q. 48. art. 1. & D. Bonau. in 3. sent. dist. 18. art. 1. Q. 2. & 3. quod Christus & sibi, & nobis meruit. sibi quidem corporis immortalitatem, claritatem, & impassibilitatem animæ, & corporis: nam corpus eius, ante ipsius mortem, erat mortale, & anima eius passibilis. nobis verò apertionem Paradisi Cælestis, & redemptionem à Diabolo, à peccato, & à pœna pro ipso debita. Vndè, sciendum est, quod Paradisus est duplex Cælestis, & terrestris, & Adam peccante vtriusq; ianua clausa fuit. Clausio autem ianue Paradisi Terrestris, signum fuit clausionis ianue Paradisi Cælestis. est autem Paradisus Cælestis aperta visio Dei: clausio verò huius ianue, fuit impossibilitas videndi Deum facie ad faciem, quæ quidem impossibilitas, consurgebat ex peccato Adæ, & ex decreto Diuinæ Sententiæ. Vndè per Christum aperta est ianua Regni Cælestis, & per consequens nobis, & sibi meruit, vt dictum est.

Vtrum Christo competat orare.

R E S O L V T I O.

Dicendum est secundum D. Th. in 3. part. Q. 21. art. 1. quod Christus potest considerari dupliciter.

citer. vel quatenus homo, & sic Christo orare competit. vel quatenus Deus, & sic Christo nullo modo orare competit. pro cuius euidencia, sciendum est, quod oratio est quædam explicatio propriæ voluntatis apud Deum, vt eam impleat. si igitur in Christo esset vna tantum voluntas, scilicet Diuina, nullo modo competeret sibi orare; ratio est, quia voluntas Diuina per seipsam est effectiua eorum, quæ vult, secundum illud psal. 134. omnia quacumq; voluit Dominus fecit. Sed quia in Christo est alia voluntas humana, quæ non est per seipsam efficax, ad implendum, quæ vult, nisi per virtutem Diuinam, inde est, quod Christo, quatenus est homo, vt humanam habens voluntatem, competit orare.

Vtrum Deo conueniat filios adoptare.

RESOLVTIO.

Dicendum est secundum Th. in 3. par. Q. 23. art. 1. quod sic. nam ille dicitur adoptare aliquem sibi in filium, qui ex sua bonitate. admittit eum ad participationem suæ hereditatis. Deus autem cum sit infinitæ bonitatis, ad participationem suorum bonorum suas admittit creaturas, & præcipue rationales, quæ in quantum sunt ad imaginem Dei factæ, sunt capaces Beatitudinis Diuinæ, quæ in fruitione visionis Diuinæ consistit. Vnde, Deus, in quantum ex sua

130 Quæstionum Theologicarum
bonitate admittit homines ad Beatitudinis hereditatem, dicitur eos adoptare.

Vtrum adoptare conueniat toti Trinitati.

R E S O L V T I O.

Dicendum est secundum D. Tho. in 3. part. Q. 23. art. 2. quod sic. nam opera Trinitatis ad extra sunt indiuisa, (vt dicit Mag. sent. in 1. dist. 15.) ergo facere quemcunq; effectum in creaturis, est commune toti Trinitati, propter unitatem Naturæ Diuinæ; quia ubi est vna Natura, oportet, quod sit vna operatio: & consequenter dicimus, quod adoptare homines in filios Dei, conuenit toti Trinitati. præterea, sciendum est, quod inter filium Dei adoptiuum, & Naturalem, hæc est differentia, quod filius Dei Naturalis est genitus, non factus: filius autem adoptiuus est factus, secundum illud Ioan. 1. dedit eis potestatem filios Dei fieri. & si quandoque filius adoptiuus dicatur genitus, hoc est propter spirituales regenerationem, quæ est, gratuita, non naturalis. patet igitur, quod adoptare homines in filios Dei, toti conuenit Trinitati.

Vtrum Christus possit dici prædestinatus.

R E S O L V T I O.

Dicendum est secundum D. Th. in 3. par. Q. 24. art. 1. quod sic. nam prædestinatio proprie accepta,

accepta, est quædam Diuina præordinatio ab æterno, de his, quæ per gratiam Dei, in tempore fienda sunt. est autem hoc in tempore factum, per gratiam vnionis à Deo, vt homo esset Deus, & Deus esset homo, igitur Christus dicitur prædestinatus. nec potest dici, quòd Deus ab æterno non præordinauerit hoc se facturum in tempore; quia sequeretur, quòd Diuinæ menti aliquid de nouo accideret. & idè oportet dicere, quòd ipsa vnio naturarum in persona Christi, cadat sub æterna Dei prædestinatione, & ratione huius, Christus dicitur esse prædestinatus.

Vtrum Beata Virgo fuerit concepta in peccato originali.

R E S O L V T I O.

Magna certè est controuersia inter Doctores, de Conceptione Virginis Mariæ disserentes, vtrum fuerit concepta in peccato originali, vel non. Quidam, vt Thomistæ firmiter dicunt, quòd Beata Virgo fuit concepta in peccato originali. Nonnulli verò alij, vt Scotistæ tenent oppositum, quòd scilicet Beata Virgo non fuit concepta in peccato originali. qui quidè Scotistæ, & Thomistæ quamplurimas in medium adducunt rationes, quas ego breuitatis causa omitto, sed tantum vnā vnus, & alteram alterius Sectæ rationem in medium proponam. qui verò

omnia argumenta videre voluerit, is proculdubio tenetur videre D. Th. in 3. part. Q. 27. art. 1. 2. & 3. & 4. sed præcipuè in 2. art. & omnes, huius partis, & Sectæ, Doctores. similiter ex alia parte tenetur videre Scotum, Doctorem subtilissimum in 3. sent. dist. 3. Q. 1. & alios huius sectæ Doctores. pro cuius itaq; Quæstionis evidentia, sciendum est, quòd Conceptio capitur Tripliciter. Vno modo pro Conceptione seminum. Secundo pro formatione membrorum. Tertio pro vnione animæ ad corpus. Conceptio seminum, est quando duo semina. s. viri, & mulieris simul vniuntur; & vocatur mistio seminalis. conceptio verò secundo modo sumpta, est, quando semen est in matrice, in qua formatur corpus, quia secundum Beat. Aug. primò est sub forma lactis per sex dies; & per 10. sub forma sanguinis; & per 12. fit solidatio membrorum: & per 18. fit complementum corporis humani: & sic sunt. 46. dies. Sciendum tamen est, quòd requiruntur. 46. dies ad corpus organizandum Viri, & mulieris 83. Christi autem Natura assumpta non stetit per plures dies, sed in instanti fuit à Verbo Diuino assumpta, & in instanti, corpus eius organizatum fuit. Tertio modo, conceptio est infusio animæ in corpus. & sic in illo instanti, in quo corpus est organizatum, Deus creat animam, & infundit corpori. Vnde in ista Quæstione, queritur de conceptione Tertio modo capta.

pta . Dicunt igitur Thomistæ , quòd si Beata Virgo non fuisset cõcepta in peccato originali , sequeretur , quòd Christus non fuisset vniuersalis redemptor ; sed Christus fuit vniuersalis redemptor , ergo Beata Virgo fuit concepta in peccato originale . Inquiunt Scotistæ , peccatum originale est maius peccato veniali , sed per vestrũ D.Th. in 3. part. Q.27. art.4. Virgo non peccauit venialiter , ergo nec originaliter : ergo non habuit peccatum originale : nam peccato originali debetur pœna æterna , veniali verò temporalis . Ad rationem Thomist. respondent Scotistæ , quòd duplex est modus redimendi . Vnus est præseruatiuus , qui est præseruare aliquem , ne cadat in peccato : & sic Christus redemit Virginem Mariam , quia præseruauit eam . Alius est subleuatiuus , quando scilicet aliquis subleuat aliquem , qui in lutum cecidit , vel in foueam ; & istum modum habuit Christus circa Magdalenam , Petrum , & circa omnes sanctos , qui peccauerunt , & pœnitentiam egerunt , & circa nos modò . & iste modus subleuatiuus est quadruplex , Primus est quando quis incidit in peccatum originale , & postea subleuatur per baptismum ; & sic subleuantur pueri . Secundus est quando quis incidit in idem , & postea subleuatur in ventre , per sanctitatem , sicut Hierem. & Ioan. Bapt. Tertius est à peccato mortali actuali , & iste est in adultis per pœnitentiam . Quartus

est à peccato veniali, à quo subleuamur omnes diuersimodè. Vndè, Scotistæ dicunt, quòd Beata Virgo non fuit redempta hoc modo subleuatiuo, sed præseruatiuo, vt dictum est. Respondent Thomistæ ad rationem Scotistarum, hunc in modum: vos dicitis, quòd per Nostrium D.Th. loco citato, Beata virgo non peccauit venialiter, ergo nec originaliter: negamus consequentiam, quoniam Spiritus Sanctus præueniens Virginem, ipsam ab omni peccato purgauit, & ipsum peccati fomitem, ita vt nihil postmodum esset, quod eam inclinaret ad malum: & hac de causa, Beata Virgo non peccauit nec mortaliter, nec venialiter. Quid autem ego dicam, ignoro. Sed prorsus Sanctæ Matri Ecclesiæ, meliori q; sapientum iudicio me subijcio. vos autem, modò vt dicatis, quòd Beata Virgo fuerit ab omni peccato exclusa, hoc sufficit: siue per subleuationem, siue hoc fuerit per præseruationem. Vndè, benè, & rationabiliter dicunt Thomistæ, cùm dicant Beatam Virginem prorsus ab omni fomite peccati, operatione Spiritus Sancti, fuisse purgatam. Optimè dicunt Scotistæ, cùm dicant Beatam Virginem à peccato originali fuisse specialiter præseruatam. Vos autem eligatis ad libitum hanc, vel illam opinionem. sed id, quod melius est, non dimittatis.

Vtrum

Vtrum Beata Virgo præ cæteris hominibus,
maiolem gratiæ plenitudinem à
Christo obtinuerit.

R E S O L V T I O.

Dicendum est secundum Th. in 3. par. Q. 27.
art. 5. quòd sic. Nam Quanto magis ali-
quid appropinquat suo principio, in quo-
libet genere, tanto plus effectũ illius principij par-
ticipat, vt Angeli, qui sunt Deo propinquiores,
magis participant de Bonitatibus Diuinis, quàm
homines in hac valle miseriæ existentes: Beata au-
tem Virgo propinquissima Christo fuit, secundum
humanitatem, quia ex ea accepit humanam Na-
turam. ergo Beata Virgo præ cæteris hominibus,
maiolem debuit à Christo gratiæ plenitudinem
obtinere.

Vtrum Christus sit principium gratiæ.

R E S O L V T I O.

Dicendum est secundum Tho. in 3. part. Q. &
art. suprâ citatis, quòd secundum vtranque
Naturam, Christus dicitur esse principium gra-
tiæ, secundum diuinitatem quidem essentialiter,
& autoritatiuè: secundum humanitatem verò in-
strumentaliter. Vndè, & Ioan. 1. dicitur, Gra-
tia, & veritas per Iesum Christum facta est.

Vtrum

Vtrum B. Maria fuerit virgo in concipiendo.

R E S O L V T I O.

Dicendum est secundum D. Th. in 3. par. Q. 28.
art. 1. quod Beata mater Christi verè fuit
Virgo in concipiendo, dicitur enim Isa. 7.
Ecce, Virgo concipiet. & hoc confirmatur tali ra-
tione; quia sicuti Virtute Diuina fieri potuit, vt
primus homo de limo terræ formaretur sine viro,
& fœmina: ita etiam fieri potuit, vt Diuina vir-
tute Corpus Christi de Virgine. i. de fœmina, abs-
que viri semine. i. sine viro, formaretur. Quod
autem fuerit conueniens, Christum ex Virgine
fuisse conceptum, quatruplici ratione ostenditur:
primò quidem propter mittentis Dignitatem pa-
tris conseruandam. cum enim Christus sit verus,
& Naturalis Dei filius, non fuit conueniens, qd
alium patrem haberet, quàm Deum, ne dignitas
Dei patris ad alium transferatur. Secundò, hoc
fuit conueniens proprietati ipsius filij, qui est ver-
bum Dei. Verbum autem absque omni corruptio-
ne cordis concipitur. quia ergo caro sic fuit à ver-
bo Dei assumpta, vt esset caro verbi Dei, congruū
fuit, quod etiam ipsa sine corruptione matris con-
ciperetur. Tertiò, hoc fuit conueniens Dignitati
humanitatis ipsius Christi, in qua locum peccatum
habere non debuit; quia per illam Mundi pecca-
tum tollebatur, secundum illud Io. 1. Ecce Agnus
Dei,

Dei, scilicet innocens, qui tollit peccatum mundi. Quartò, & Vltimò fuit conueniens, propter ipsum finem incarnationis Christi, quæ ad hoc fuit, vt homines renascerentur in filios Dei, non ex voluntate carnis, neque ex voluntate viri, sed ex Deo, i. virtute Dei, cuius rei exemplar debuit apparere in ipsa conceptione Christi. Vndè, manifestum est, quòd Beata Mater Christi Virgo in concipiendo fuit.

Vtrum Mater Dei fuerit Virgo in partu, & per manserit post partum.

R E S O L V T I O.

Dicendum est secundum D. Th. in 3. par. Q. 28. art. 2. & 3. quòd realiter Mater Christi in partu fuit Virgo. ait enim Isai. non solum Ecce Virgo concipiet, sed etiam addit, & pariet filium. s. in ipsa virginitate. Vndè simpliciter asserendum est, quòd Mater Dei, sicuti Virgo concepit, & Virgo peperit, itam etiam, & Virgo post partum in æternum permansit.

Vtrum inter Mariam, & Ioseph fuerit verum Matrimonium.

R E S O L V T I O.

Dicendum est secundum D. Th. in 3. part. Q. 29. art. 2. & Magist. sent. in 4. dist. 30. quòd Matrimonium dicitur verum ex hoc,

hoc, quia habet suam perfectionem. Duplex autem est perfectio rei. prima scilicet, & secunda. prima quidem rei perfectio, consistit in actu primo, scilicet in ipsa forma, ex qua res suum esse recipit. Secunda verò perfectio, consistit in actu secundo, scilicet in operatione rei, per quam res aliquammodo suum finem attingit. forma igitur Matrimonij consistit in quadam indivisibili coniunctione animorum, per quam unus coniugum, indivisibiliter alteri fidem servare tenetur. Secunda verò perfectio Matrimonij in duobus consistit, in generatione scilicet, & Educatione. Sic igitur dicendum est, quòd quantum ad primam perfectionem, omnino verum fuit Matrimonium Virginis Dei, & Ioseph; quia uterque consensit in maritalem societatem, non autem expresse in copulam carnalem, nisi sub conditione, si Deo placeret. Quantum verò ad secundam perfectionem possumus considerare Duo, Educationem scilicet, & generationem, si prolis educationem consideremus: sic inter Mariam, & Ioseph verum fuit coniugium: si verò generationem, non fuit ibi verum matrimonium consummatum. patet igitur, quòd inter Mariam Matrem Dei, & Ioseph, verum fuit Matrimonium, quantum ad conjugalem societatem: similiter etiam quantum ad prolis educationem, ut dictum est.

Vtrum caro Christi fuerit sumpta
de Adam.

R E S O L V T I O.

Dicendum est secundum D. Tho. in 3. part.
Q. 31. art. 1. quòd caro Christi fuit sum-
pta de Adam materialiter, non autem for-
maliter, quia non fuit conceptus in peccato ori-
ginali ipse Christus, sicuti ceteri homines. Vnde
Christus humanam Naturam assumpsit, vt eam à
corruptione purgaret; non autem purgatione in-
digeat Natura humana, nisi secundum quod in-
fecta erat per originem vitiatam, quæ ex Adam
descendebat: & ideo conueniens fuit, vt carnem
sumeret ex materia ab Adam deriuata, vt ipsa
Natura per assumptionem curaretur. Vnde, di-
camus, quòd corpus Christi fuit in Adam secun-
dum corpulentam substantiam, quia scilicet ip-
sa materia corporis Christi deriuata est ab Adam.
Non autem fuit ibi secundum seminalem ratio-
nem, quia non est concepta ex virili semine: &
ideo non contraxit originale peccatum, sicut cæ-
teri, qui ab Adam per viam virilis seminis Deri-
uantur, vt dictum est. patet igitur, quòd caro Chri-
sti ex Adam materialiter sumpta fuit, non au-
tem formaliter.

Vtrum

*Vtrum fuerit conueniens Christum nasci
de fœmina.*

R E S O L V T I O.

D*icendum est secundum Th.in 3.par.Q.31.
art. 4. quòd licet filius Dei carnem huma-
nam assumere potuerit, de quacunque ma-
teria voluisset, conuenientissimum tamen fuit, vt
de fœmina carnem acciperet propter tria. Primò
quidem, quia per hoc tota humana Natura no-
bilitata est. Secundo, quia per hoc veritas incar-
nationis astringitur. Tertio, quia per hunc modum
completur omnis diuersitas generationis huma-
næ; nam primus homo productus est ex limo ter-
ræ, sine viro, & fœmina. Eua verò producta est
ex viro, sine fœmina. Alij autem homines na-
ti sunt, & nascuntur ex viro, & fœmina. Vnde
hoc Quartum, quasi Christo proprium, relinque-
batur, vt produceretur ex fœmina sine viro. Con-
ueniens itaq; fuit Christum nasci de fœmina.*

*Vtrum Christus debeat dici conceptus de
Spiritu Sancto.*

R E S O L V T I O.

D*icendum est secundum D.Th.in 3.par.Q.32.
art.2. quòd in Spiritu Sancto duplex Habi-
tudo consideratur respectu Christi. Vna, quæ refer-
tur ad ipsum filium Dei, qui dicitur esse conceptus:
& hæc*

Et hæc vocatur habitudo consubstantialitatis. Alia est, quæ refertur ad corpus ipsius Christi: Et vocatur habitudo causæ efficientis. Vnde, conuenienter dicere possumus, Christum esse conceptum de Spiritu Sancto, hoc modo, quæ efficientia Spiritus Sancti referatur ad corpus assumptum; consubstantialitas verò ad personam assumentem. præterea, (vt dicit D. Th. loco citato art. 1.) sciendum est, quòd conceptionem corporis Christi tota Trinitas operata est; attribuitur tamen specialiter hoc Spiritui Sancto, duplici ratione. primo quidem, quia Spiritus Sanctus est amor patris, & filij. Hoc autem ex maximo Dei amore prouenit, vt filius Dei carnem sibi assumeret in utero virginali. Vnde dicitur Ioan. 3. sic Deus dilexit mundum, vt suum filium vnigenitum daret. Secundo, quia per hoc datur intelligi, quòd humana Natura assumpta est à filio Dei in vnitalem personæ, non ex aliquibus meritis, sed ex sola gratia, & ineffabili Charitate, quæ Spiritui Sancto attribuitur.

Virum Spiritus Sanctus possit dici pater Christi secundum carnem.

R E S O L V T I O.

*D*icendum est secundum Mag. sent. in 3. dist. 4. & D. Bonau. ibidem art. 1. Q. 2. & Th. in 3. part. Q. 32. art. 3. quòd nullo modo Spiritus Sanctus dici potest pater Christi: quia sequeretur maximum

ximum inconueniens, si Christus diceretur natus de Virgine vt de Matre, & de Spiritu Sancto vt de Patre; nam secundum Naturam Diuinam esset filius patris æterni, & secundum humanam esset filius Spiritus Sancti, quòd omninò a fide alienum est, cum Spiritus Sanctus non fuerit Vir Beatæ Virginis. Vndè, Christus conceptus est de Maria Virgine, in similitudinem speciei: & ideò Christus dicitur filius Beatæ Virginis. Christus autem, secundum quod est homo, conceptus est de Spiritu Sancto, sicut de actiuo principio, non tamen secundum similitudinem speciei, sicut homo nascitur de patre suo. Vndè Christus nullo modo dicitur filius Spiritus Sancti, & per consequens Spiritus Sanctus non potest dici pater Christi, nec secundum humanitatem, nec secundum Diuinitatem; quia Christus vnicum habet patrem æternū, vt in superioribus dictum est.

Vtrum conceptio Christi fuerit Naturalis, vel miraculosa.

R E S O L V T I O.

D*icendum est secundum D. Tho. in 3. part. Q. 33. art. 4. quòd conceptio Christi potest dupliciter considerari. Vno modo ex parte materiæ, quā mater ministravit; & sic conceptio Christi fuit Naturalis. Secundo modo potest considerari conceptio Christi, ex parte virtutis actiuæ; & sic*

& sic conceptio Christi omninò Miraculosa fuit: sed quia vnumquodque magis iudicatur secundum formam, quàm secundum materiam, & similiter secundum agens, quàm secundum patiens; inde est, quòd conceptio Christi debet dici simpliciter Miraculosa, & supernaturalis: secundum quid verò, naturalis, s. ex parte materiæ, vt dictum est.

Vtrum Christo sit attribuenda aliqua Natiuitas temporalis.

R E S O L V T I O.

Dicendum est secundum D. Th. in 3. par. Q. 35. art. 2. quòd Christus, quatenus homo verè potest dici temporaliter natus. nam in Christo sunt Duæ Naturæ, Diuina scilicet, & Humana, quarum vnâ accepit ab æterno patre: alteram verò accepit temporaliter à matre. & ideò necesse est attribuere Christo duas Natiuitates, vnâ, quæ æternaliter natus est à patre, aliam, quæ temporaliter natus est à matre.

Vtrum secundum temporalem Christi Natiuitatem, Beata Virgo possit dici mater eius.

R E S O L V T I O.

Dicendum est secundum D. Tho. in 3. part. Q. 35. art. 3. quòd Beata Virgo realiter Christi, quatenus homo est, vera dicitur esse mater.

K Nam

Nam Corpus Christi non est de Cælo allatum, sicut
 Valentinus hæreticus posuit, sed de Virgine
 matre sumptum, & ex purissimis sanguinibus
 eius formatum. & hoc solum requiritur ad ra-
 tionem matris. Vnde, Beata Virgo est vera, &
 naturalis mater Christi.

Vtrum Beata Virgo debeat dici mater Dei.

R E S O L V T I O.

Dicendum est secundum Tho. in 3. part. Q. 35.
 art. 4. quòd, si nomine Dei intelligamus to-
 tam Trinitatem, vel essentiam Diuinam, Beata
 Virgo non potest dici Mater Dei: quia sequeretur,
 quòd Pater, & Filius, & Spiritus sanctus essent
 vnus filius Beatæ Virginis, quòd à fide omninò
 alienum est. Si verò nomine Dei, solam personam
 filij incarnatam intelligamus, sic verè Beata Vir-
 go debet dici mater Dei, quia solus filius incar-
 natus est. Vnde Beata Virgo dicitur mater Dei,
 non quia sit mater Diuinitatis, sed quia personæ
 habentis Diuinitatem, & humanitatem, est mater
 secundum humanitatem.

Vtrum fuerit necessarium Christum pati pro
 liberatione humani generis.

R E S O L V T I O.

Dicendum est secundum D. Th. in 3. par. Q. 46.
 art. 1. quòd necessarium est duplex. Vnum,
 quòd secundū sui Naturam impossibile est aliter
 se ha-

se habere: & hoc vocatur necessarium simpliciter. Aliud est necessarium ex suppositione finis, qd̄ s. conuenienter esse nō potest, nisi tali fine præsupposito. & hoc vocatur necessarium secundū quid, s. ad bene esse. Christum igitur pati non fuit necessarium, necessitate primo modo sumpta, neq; ex parte Dei, qui Christum definiuit pati, neque ex parte ipsius Christi, qui voluntariē passus est. fuit autem necessarium Christum pati, necessitate Secundo modo sumpta, s. ex suppositione finis, qui quidem potest tripliciter intelligi. Primo quidem ex parte Nōstra, quia per eius passionem liberati sumus. Secundo ex parte ipsius Christi, qui per humilitatam passionis meruit gloriam exaltationis, vt dicitur Luc Vlt. Non ne oportuit Christum pati, & sic intrare in gloriam suam? Tertio ex parte Dei, cuius definitionem oportebat impleri, circa passionem Christi prænunciatam in scripturis, & prae figuratam in obseruantia Veteris Testamenti. Vnde, hoc modo, necessarium fuit Christum pati pro liberatione generis humani.

Vtrum possibile fuerit, Deum alio modo liberare genus humanum, quā per Christi mortem.

RESOLVTIO.

Dicendum est secundum D. Th. in 3. par. Q. 46. art. 2. quod aliquid potest dici possibile, vel

46 **Quæstionum Theologicarum**
impossibile dupliciter. Vno modo simpliciter, & absolutè. Alio modo ex suppositione. simpliciter igitur, & absolutè loquendo, possibile fuit, Deum alio modo hominem liberare, quàm per passionem Christi, quia non est impossibile apud Deum omne verbum, vt dicitur Luc. i. sed ex aliqua suppositione facta, fuit impossibile, nam impossibile est Dei præscientiam falli. Supposita enim præscientia, & præordinatione Dei, de passione Christi, non erat simul possibile Christum non pati, vel hominem alio modo, quàm per eius passionem liberari. patet igitur, quòd simpliciter loquendo, fuit possibilis alius modus liberationis humane, quàm per passionem Christi: sed aliqua suppositione facta, impossibile fuit, hominem alio modo, quàm per passionem Christi, liberari.

**Vtrum Deus pater tradiderit Christum
passioni.**

R E S O L V T I O.

D*icendum est secundum Magist. sent. in 3. dist. 20. & D. Th. in 3. part. Q. 47. art. 3. quòd sic, nam vt dicitur Rom. 8. proprio filio suo non pepercit Deus, sed pro nobis omnibus tradidit illum. Vndè secundum tria, Deus pater tradidit Christum passioni. Vno quidem modo, secundum quod sua æterna voluntate præordinauit passionem Christi ad humani generis liberationem.*

nem. Secundo, inquantum inspiravit ei voluntatem patiendi pro nobis, infundendo ei charitatem. Tertio, non protegendo eum à passione, sed exponendo eum persequentibus. Vndè legitur Mat. 27. q̄ pendens in Cruce Christus dicebat, Deus meus, Deus meus, vt quid dereliquisti me, quia. s. potestati eum persequentium exposuit. præterea, sciendum est, quòd Christus Quadrupliciter traditus fuit. (vt dicit Magist. loco citato) primo à Patre. Secundo à seipso. Tertio à Iuda. Quarto à Iudæis. à Patre enim, quia voluntate eius Christus passus est. à seipso, quia voluntariè pati voluit. à Iuda, quia ipsum prodidit. à Iudæis, quia procurauerunt eius mortem. Vndè, omnes in vñ conuenerunt, scilicet in mortem Christi; sed voluntates fuerunt diuersæ, quia voluntas patris, & Christi fuit bona, & ex bona intentione. voluntas verò Iudæ, & Iudæorum fuit mala, & ex mala intentione.

Vtrum Iudæi Bonum fuerint operati, occidendo Christum.

R E S O L V T I O.

D*icendum est secund. Mag. in 3. sen. dist. 20. q̄ opus Iudæ, & Iudæorum potest ad duo referri, vel ad opus operatum, s. ad ipsam passionem, quæ omninò bona, & perfectæ fuit: & sic operati sunt bonum ipse Iudas, & ipsi Iudæi.*

Quæstionem Theologicarum
vel ad opus operans, s. ad intentionem eorum
malam: & sic operati sunt malum.

Vtrum filius Dei mortuus sit.

R E S O L V T I O.

Dicendum est secundum Magist. sent. in 3.
dist. 21. & D. Bonauent. ibidem art. 2. Q. 3.
& D. Th. in 3. par. Q. 50. ar. 1. in resp. ad
prim. quod filius Dei, scilicet Christus potest con-
siderari dupliciter, vel secundum Naturam Diui-
nam, vel secundum Naturam humanā. si secun-
dum Naturam Diuinam: nullo modo filius Dei
mortuus est. Si verò secundum humanam Natu-
ram consideretur: sic verè, & realiter pro nobis
filius Dei mortuus est; nam in morte Christi verè,
& realiter separata fuit anima à corpore, quæ se-
paratio requiritur ad rationem mortis. patet igitur,
quod Christus filius Dei, non quatenus Deus,
sed quatenus homo mortuus est.

Vtrum Christus in triduo Mortis fue-
rit homo.

R E S O L V T I O.

Dicendum est secundum D. Tho. in 3. part.
Q. 50. art. 4. quod Christus in Triduo
mortis suæ Propriè, & naturaliter loquen-
do, non fuit homo. ratio est, quia homo habet vi-
tam, sed homo mortuus non habet vitam, igitur
homo

homo mortuus non est homo : sed Christus in Triduo verè fuit homo mortuus , igitur Christus in Triduo mortis suæ non fuit homo. præterea , si Christus in illo Triduo fuisset homo , vel fuisset mortalis, vel immortalis : non mortalis, quia iam fuerat mortuus : non immortalis, quia tantum post resurrectionem factus fuit immortalis, ergo Christus in illo Triduo non fuit Homo. Magist. sent. in 3. dist. 22. contrariam tenet opinionem, cum dicat, quòd respectu Diuinitatis unitæ cum carne, & anima diuisis , Christus dicebatur verus homo , quia Diuinitas erat unita corpori in sepulcro , & animæ ad inferos. quòd esse non potest , quia ad constituendum verum hominem, requiritur, quòd anima rationalis sit corpori humana vnione unita. Christus autem in Triduo non habuit animam, & corpus sibi unita vnione humanitatis, quia anima realiter erat separata à corpore, sed tantum vnione Diuinitatis, quia anima , & corpus erant verbo unita . Similiter Hugo de Sancto Viêt. dixit Christum in Triduo mortis fuisse hominem, quia animam volebat esse hominem, sed Christus habebat animam sibi unitam, ergo fuit homo. quòd esse non potest , quia realiter anima non est homo. Diu. autem Bonau. in 3. sent. dist. 22. Q. 1. saluat omnes opiniones, dicendo, quòd homo potest considerari tripliter . Vno modo secundum esse eius aptitudinale. & sic salua est opinio Hugonis, quia

quando homo moritur, remanent principia eius, in quibus salua est ordinatio non solum respectu formæ hominis, sed etiam huius hominis: alioquin non esset vera resurrectio. Vndè, quòd Christus in Triduo mortis fuerit homo, non solum est verum de ipso, sed etiam de quocunque alio homine ab ipso, qui mortuus est, loquendo tamen de esse aptitudinali ipsius hominis, vt dictum est. Alio modo consideratur homo secundum esse eius partim actuale, partim aptitudinale. & sic potest concedi de Christo, quòd fuerit homo in Triduo: quia erat persona in actu, quamuis forma humanitatis seruaretur in aptitudine coniunctionis animæ, & carnis: hoc tamen non potest concedi de aliquo alio homine. & ideò per hunc modum dicendi, saluatur opinio Mag. sent. Tertio modo, consideratur homo secundum esse actuale eius. & sic nec de Christo, nec de alio homine, est verum dicere, qd sit homo, quandiu anima est separata à carne: nihil enim facit hominem esse actu, nisi actualis coniunctio animæ, cum carne. Vndè, per hunc modum, vera est opinio D. Th. in 3. par. Q. 50. art. 4. & aliorum Doctorum.

Vtrum fuerit conueniens Christum ad infernum descendere.

RESOLVTIO.

Dicendum est secundum D. Thom. in 3. part. Q. 52. art. 1. & D. Bonauen. in 3. senten. distin.

dist. 22. Q. 4. quòd maximè conueniens fuit Christum ad infernum descendere, vt liberaret illos iustos, qui ibi detinebantur, propter peccatum primi parentis: nam ex peccato, homo incurrerat non solum mortem corporis, sed etiam descensum ad inferos. & idèd sicut fuit conueniens, eum mori, vt nos liberaret à morte, ita fuit conueniens eum descendere ad inferos, vt nos à descensu ad inferos liberaret. qui quidem infernus consuevit, sinus Abraë, & limbus appellari patrum, nam quatenus illi patres certa spe recreabantur possidenda Regni hereditatis, sinus Abraë appellabatur, Quatenus verò aliquid in actu eis requiei deerat appellabatur limbus inferni. ratio autem, quare voluit Christus ad illum locum descendere, fuit duplex, videlicet propter consolationem victorum, & propter confusionem aduersariorum. propter consolationem victorum quidem, quia magna fuit eis consolatio de præsentia ipsius animæ Iesu Christi, & maximè fuit dignationis ostensio in hoc, quòd ipse personaliter voluit ad eos descendere. propter confusionem aduersariorum autem, vt ipsi Demones ex sua præsentia confunderentur, & sicuti Christus vicerat eos in terra in Natura assumpta, sic anima eius de eisdem triumpharet apud inferos, ipsos inuitos expoliando. patet igitur, quòd maximè conueniens fuit Christum ad infernum descendere.

Vtrum Christus descenderit ad infernum
damnatorum.

R E S O L V T I O .

Dicendum est secundum D. Tho. in 3. part.
Q. 52. art. 2. quòd aliquid dicitur esse ali-
cubi dupliciter. Vno modo per effectum.
& hoc modo, Christus in quemlibet infernorum
descendit, diuersimodè tamen; Nam in infernum
Damnatorum habuit hunc effectum, quòd descen-
dens ad inferos, eos de sua incredulitate, & mali-
tia confutauit, (nota, quòd sub inferno damnato-
rum comprehenduntur etiam infantes, quos de so-
la malitia peccati originalis confutauit) illis verò,
qui in purgatorio detinebantur, spem gloriæ con-
sequendæ dedit. Sanctis autem patribus, qui pro
solo peccato originali in inferno detinebantur, lu-
men gloriæ aternæ infudit. Alio modo, dicitur
aliquid esse alicubi per suam essentiam. & hoc
modo, anima Christi descendit solum ad locum in-
ferni, in quo iusti detinebantur, vt & secundum
animam, & secundum Diuinitatem, cui animæ
vnita erat, eos visitaret.

Vtrum Christus fuerit totus in inferno.

R E S O L V T I O .

Dicendum est secundum D. Tho. in 3. part.
Q. 52. art. 3. & Magist. in 3. sent. dist. 22.
quòd Christus fuit totus in inferno. nam
sicut

sicut in Triduo mortis Christi, totus Christus fuit in sepulcro per corpus sibi unitum: similiter & totus Christus fuit in inferno per animam sibi unitam. totus etiam Christus tunc erat ubiq; , ratione Diuinæ Naturæ. Vndè, persona Christi, cum esset aeterna, & indiuisibilis, non erat maior, vel minor, quando erat unita carni, & animæ coniunctis, quam cum erat unita carni, & animæ diuisis: & per consequens dicamus, quod Christus fuit in sepulcro totus, & in inferno totus.

Vtrum Christus descendens ad inferos sanctos patres inde liberauerit.

R E S O L V T I O.

Dicendum est secundum Th. in 3. part. Q. 52. art. 5. quod per passionem Christi liberatum est genus humanum, non solum à peccato, sed etiā à reatu pænæ, vt superius dictum est. dupliciter autem homines, propter reatum pænæ, ibi detinebantur. Vno modo, pro peccato actuali, quod quilibet personaliter commiserat. Alio modo, pro peccato totius humanæ Naturæ, quod à primo parente in omnes originaliter deuenit. Ideò Christus descendens ad inferos, virtute suæ passionis, ab hoc reatu, sanctos absoluit, quo erant à Diuinæ essentiae visione exclusi, in qua quidem visione perfecta hominis Beatitudo consistit. per hoc autē, Sancti Patres in inferno detinebantur, in quo non poterant

terant, propter peccatum primi parentis, Deum
per essentiam videre. & sic Christus descendens
ad inferos, Sanctos patres ab inferis liberavit.

Vtrum statim in Cælum ascenderint.

R E S O L V T I O.

Dicendum est secundum D. Bonauen. in 3. sent.
dist. 22. Q. ult. & Th. in 3. part. Q. 52. art. 4.
in resp. ad primum, q̄ animæ de inferno per Chri-
stum liberatæ non statim in Cælum ascenderunt,
quamuis statim viderint lumen, & beatæ factæ
sint. non enim statim post mortem Christi perdu-
ctæ sunt in cælum, quantum ad locum: sed bene
verum est, quòd statim, post resolutionem animæ
à corpore, in Christi descensu ad inferos, viderunt
Deum per essentiam, & beatæ factæ sunt, vt di-
ctum est: & patefactum est eis Cælum, quantum
ad præmium. Vndè in loco etiam infernali exi-
stentes habuerunt paradisum, & apertam Dei vi-
sionem, quæ non est aliud, quàm Vita æterna.
præterea, ipse Christus debuit in omnibus prima-
tum tenere, vt sit primogenitus (teste Apost. ad
Rom. 8.) in multis fratribus, tanquàm omnium
caput. Resurrectio autem Christi, & eius ascen-
sio differri debuit, propter nostræ fidei confirmatio-
nem. ideò dilata fuit resurrectio, vt ostenderetur,
quòd verè Christus mortuus fuerit, & per conse-
quens etiam ipsius ascensio. Quoniam ergo nulla
anima

anima in cælum debuit ascendere ante Christum, hinc est, quòd non statim animæ illæ in cælesti paradiso fuerunt locatæ, Diuina dispensatione hoc faciente ad nostram salutem. Vndè licet fuerint in paradiso spirituali, in quo dicuntur esse, quicunq; Diuina gloria perfruuntur; non tamen fuerunt in Cælo Empyreo, in quo nunc existunt omnes animæ Sanctorum.

Vtrum Christus in suo descensu liberauerit animas à purgatorio.

R E S O L V T I O.

Dicendum est secundum Tho. in 3. part. Q. 52. art. 8. quòd Christus, in suo descensu non liberauit de purgatorio, nisi illos, qui iam sufficienter purgati erant, vel etiam, qui dum adhuc uiuerent, meruerunt per fidem, & deuotionem ad mortem Christi, ut eo descendente liberarentur à temporali purgatorij pœna.

Vtrum fuerit necessarium Christum resurgere.

R E S O L V T I O.

Dicendum est secundum Tho. in 3. part. Q. 53. art. 1. quòd Christum resurgere necessarium fuit propter quinque. Primò quidem ad commendationem Diuinæ iustitiæ, ad quam pertinet exaltare illos, qui se propter Deum humiliant, secundum

dum illud Luc. 1. deposuit potentes de sede, & exaltauit humiles. quia igitur Christus propter charitatem, & obedientiam Dei, se humiliavit vsque ad mortem crucis, oportebat, quod exaltaretur à Deo vsque ad gloriosam resurrectionem. Secundò, ad fidei nostræ instructionem, quia per eius resurrectionem confirmata est fides nostra circa Diuinitatem Christi. Tertiò, ad subleuationem spei; quia dum videmus Christum resurgere, qui est caput nostrum, speramus & nos resurrecturos. Quartò, ad informationem Vitæ fidelium, secundum illud Apost. ad Rom. 6. Christus resurgens ex mortuis, iam non moritur; ita, & vos existimate mortuos quidem esse peccato, viuentes autem Deo. Quintò, ad complementum nostræ salutis, quia sicut per hoc, quod mala sustinuit (humiliatus est) moriendo, vt nos liberaret à malis, ita glorificatus est resurgendo, vt nos promoueret ad Bona secundum illud Rom. 4. Traditus est propter delicta nostra, & resurrexit propter iustificationem nostram. patet igitur, quod Christum resurgere maxime necessarium fuit.

Vtrum Christus fuerit causa suæ resurrectionis.

R E S O L V T I O.

Dicendum est secundum D. Th. in 3. part. Q. 53. art. 4. quod Christus potest considerari dupliciter.

alter. Vno modo ratione Diuinitatis. Alio modo ratione ipsius Naturæ creatæ. Secundum igitur virtutem Diuinitatis vnita, & corpus resumpsit animam, quam deposuerat, & anima corpus resumpsit, quod dimiserat. & sic Christus propria virtute resurrexit. Si autem consideremus Christum ratione naturæ creatæ, sic non potuerunt corpus, & anima sibi inuicem reuniri, sed oportuit Christum resuscitari à Deo. patet itaque, quòd Christus ppria virtute suæ Diuinitatis resurrexit, & per consequens fuit causa suæ resurrectionis.

Vtrum fuerit conueniens Christum ascendere in Cælum.

RESOLVTIO.

D*icendum est secundum D.Th. in 3. par. Q. 57. art. 1. quòd Christum ascendisse in Cælum, maximè cõueniens fuit. nam locus debet esse proportionatus locato; Christus autem post resurrectionem, vitam immortalem, & incorruptibilem inchoauit; locus autem, in quo nos habitamus est locus corruptionis; & ideo non fuit conueniens, quòd Christus post resurrectionem remaneret in terris, sed conueniens fuit, quòd ascenderet in Cælum.*

Vtrum

Vtrum Christus ascenderit in Cælum secundum Diuinam Naturam.

R E S O L V T I O.

Dicendum est secundum D.Th. in 3. par. Q. 57. art. 2. quòd Christus potest considerari dupliciter. Vno modo, secundum Diuinam Naturam. & sic nullo modo ascendere in Cælum potest conuenire Christo, tum, quia nihil est Diuinitate altius, quo possit ascendere, tum etiam, quia ascensio est motus localis, qui Diuinæ Naturæ non cõpetit, quæ est immobilis, & illocalis. Secundo modo, Christus potest considerari secundum humanam Naturam, quæ continetur loco, & motui subijci potest, & sic Christus ascendit in Cælum quatenus homo, non in quantum Deus, vt dictum est. Sed notandum est pulcherrimè, quòd si ascensio Christi consideretur respectu causæ efficientis, tunc Christus ascendit in Cælum, non quatenus homo, sed quatenus Deus; quia virtute Diuinitatis, in Cælum ascendisse dicitur, non autem ex virtute humanæ Naturæ. Vndè, manifestum est, quòd simpliciter, Christus ascendit in Cælum secundum humanam Naturam. Secundum quid verò, scilicet effectiue, virtute Diuinitatis in Cælum ascendisse dicitur, vt dictum est.

Vtrum

Vtrum Christo conueniat propriè sedere ad
dextram Dei patris.

RESOLVTIO.

Dicendum est secundum D.Th. in 3.par.Q.58.
art. 1.2.3. & 4. quòd Christus potest consi-
derari dupliciter. Vno modo secundum Diuinam
Naturam; & sic Christo propriè conuenit sedere
ad dexteram Dei Patris, quod quidem sedere ad
dexteram Patris, nihil aliud est, quàm simul cum
patre habere gloriam Diuinitatis, & Beatitudi-
nem, & iudiciariam potestatem, immutabiliter,
atque regaliter. Alio modo Christus potest consi-
derari secundum humanam Naturam; & sic non
eodem modo, quod Deus, sed sedet ad dexteram
Patris .i. in bonis paternis potioribus, præ cæteris
creaturis. Vndè Christus, quatenus Deus, dicitur
sedere ad dexteram Patris, scilicet esse in æquali-
tate patris: Quatenus verò homo, (cùm sit minor
ipso patre) dicitur sedere ad dexteram Patris,
scilicet in excellenti possessione Diuinorum
bonorum præ cæteris alijs creaturis.

& ideò nulli alijs, nec Angelo,

nec homini conuenit se-

dere ad dextram

Patris, nisi

soli

Christo.

DE SACRAMENTIS.

Vtrum ex necessitate, Sacramenta fuerint instituta ad humanam salutem.

R E S O L V T I O.

Dicendum est secundum Magist. sent. in 4. dist. 1. & Tho. in 3. part. Q. 61. art. 1. & D. Bonavent. in 4. dist. eadem 1. art. 1. Q. 1. quod necessitas duplex est. Vna est necessitas inenitabilitatis. Altera est necessitas congruitatis, ideò ex necessitate congruitatis sacramenta instituta sunt: non autem ex necessitate inenitabilitatis, quia Deus potentiam suam Sacramentis non alligauit. Vnde propter tria, principaliter sacramenta instituta sunt. primò quidem, propter humiliationem, vt dum homo rebus corporalibus subiicitur, per Sacramenta fieret humilis, & sic placeret Deo. Secundò, propter eruditionem, vt scilicet mens hominis, per rem visibilem, erudiretur ad cognoscendam virtutem inuisibilem, quæ intus est. Tertiò, propter exercitationem, vt homo præseruetur à noxijs actionibus per salubria exercitia Sacramentorum. non enim facile capitur à tentatore, qui bono vacat exercitio. Vnde, Beatus Hier. nos monet, dum dicit: semper, aliquid operis facito, vt te occupatum Diabolus inueniat.

Vtrum

Vtrum Sacramenta sint causa gratiæ .

R E S O L V T I O .

Dicendum est secundum D.Th. in 3. par. Q. 62. art. 1. quòd per aliquem modum , Sacramenta sunt causa gratiæ . & ideò sciendum est , quòd duplex est causa agens ; principalis , scilicet , & instrumentalis . principalis quidē operatur per virtutem suæ formæ , cui assimilatur effectus , sicuti ignis suo calore calefacit . & hoc modo nullus potest causare gratiam nisi Deus . Alia est causa instrumentalis , quæ non agit per virtutem suæ Naturæ , sed solum per motum , quo mouetur à principali agente : Vndè effectus non assimilatur instrumento , sed principali agenti : sicuti scamnum non assimilatur securi , sed arti , quæ est in mente artificis . & hoc modo , (scilicet instrumentaliter) Sacramenta sunt causa gratiæ .

Vtrum sacramenta nouæ legis habeant virtutem ex passione Christi .

R E S O L V T I O .

Dicendum est secundum Th. in 3. part. Q. 62. art. 5. quòd per modum instrumenti , (vt dictum est) Sacramenta nouæ legis sunt causa gratiæ . est autem duplex instrumentum . Vnum quidem separatum , vt baculus . Aliud autem coniunctum , vt manus . per instrumentum autem coniun-

Etum mouetur instrumentum separatum, sicut baculus per manum. Vndè, dicamus quòd principalis causa efficiens gratiæ, est ipse Deus, ad quem comparatur humanitas Christi sicuti instrumentum coniunctum, Sacramentum verò, sicut instrumentum separatum: & ideò oportet, quòd virtus salutifera à Diuinitate Christi per eius humanitatem in ipsa Sacramenta deriuetur. Vndè, Sacramenta Ecclesiæ specialiter habent virtutem ex passione Christi, cuius virtus quodammodo nobis copulatur per susceptionem Sacramentorum, in cuius signum, de latere Christi pendentis, in Cruce, fluxerunt aqua, & sanguis, quorum vnum pertinet ad Baptismum, aliud verò ad Eucharistiam, quæ principalia, & potissima Sacramenta sunt.

Vtrum solus Deus operetur interiorem effectum Sacramenti.

R E S O L V T I O.

D*icendum est secundum D.Th. in 3. part. Q. 64. art. 1. quòd operari aliquem effectum contingit dupliciter, Vno modo per modum principalis agentis, Alio modo per modum instrumenti. Primo igitur modo, solus Deus operatur interiorem effectum Sacramenti, tùm quia solus Deus illabitur animæ, in qua Sacramenti effectus existit, vbi non est, tùm quia gratia, quæ est interior effectus Sacramenti, à solo Deo est. Secundo verò modo,*
homo

homo potest operari interiorem effectum Sacramenti, quatenus scilicet operatur per modum ministri, nam eadem est ratio ministri, & instrumenti; utriusque enim actio exterius adhibetur. patet igitur, quod solus Deus, tanquam agens principale operatur interiorem effectum Sacramenti.

Vtrum Christus potestatem Sacramentalem potuerit ministris communicare.

R E S O L V T I O.

Dicendum est secundum D.Th. in 3. par. Q. 64. art. 4. quod (ut dictum est) Christus in Sacramentis habuit duplicem potestatem, Vnam auctoritatis, quæ competit ei secundum quod Deus: & sic talem potestatem nulli creaturæ potuit communicare, sicut nec Diuinam essentiam. Aliam habuit ipse Christus potestatem excellentiæ, quæ competit ei secundum quod homo; & sic talem potestatem potuit ministris communicare.

Vtrum mali ministri possint conferre Sacramenta.

R E S O L V T I O.

Dicendum est secundum Tho. in 3. part. Q. 64. art. 5. & Bonau in 4. sent. dist. 5. art. 2. Q. 1. quod mali sacerdotes non tantum Sacramentum, sed etiam rem Sacramenti conferre possunt, nam non ipsi, (nisi instrumentaliter, ut dictum est) sed

Deus, cuius Sacramenta bona, imò optima sunt, interius operatur. ideò D. Th. loco citato, in resp. ad prim. dicit, quòd ministri Ecclesiæ neq; à peccatis mundant homines ad Sacramenta accedentes, neque gratiam conferunt sua virtute, sed hoc facit Christus sua potestate per eos, sicuti per quædam instrumenta, quæ siue sint argentea, siue sint plumbea, hoc nihil interest: nam effectus consequitur, in suscipientibus Sacramenta, non secundum similitudinem ministrorum, sed secundum configurationem ad Christum. præterea, secundum Dominic. Sot. in 4. sent. distin. 1. Q. 5. art. 5. minister dupliciter considerari potest. Vno modo, quatenus ei deest id, quod est de essentia Sacramenti: & hic est illegitimus, vt si non sacerdos consecrare præsumeret, aut absolueret: aut si quis absq; legitima intentione Ecclesiæ, aut sine forma, aut vera materia baptizare tentaret. & sic hunc, planum est, non perficere Sacramentum. Alio modo Consideratur Minister, non quatenus minister, sed quatenus homo: & sic licet sacerdos, quatenus homo sit malus, hoc tamen non tollit potestatem instrumentalem ipsius sacerdotis conferendi Sacramenta: nam dicit Arist. in 2. Ethic. posse quempiam esse bonum artificem, vt potè pictorem, aut argentarium, licet non sit bonus homo. patet igitur, quòd mali ministri possunt conferre Sacramenta.

Vtrum Angeli possint Sacramenta ministrare.

RESOLVTIO.

Dicendum est secundum D.Tho. in 3. part. Q. 64. art. 7. quòd sic. nam sicuti Deus virtutem suam non alligauit Sacramentis, quin possit sine Sacramentis effectum Sacramentorum conferre: ita etiam virtutem suam non alligauit ministris Ecclesiæ, quin etiam Angelis possit virtutem tribuere ministrandi in Sacramentis: & præcipue quia boni Angeli sunt nuncij veritatis. Vnde, si aliquod sacramentale ministerium à bonis Angelis perficeretur, ratum habendum esset, quia manifestum est hoc fieri voluntate Diuina. si verò Dæmones, qui sunt spiritus mendacij, aliquod sacramentale ministerium exhiberent, non esset ratum habendum. Sed sciendum est, quòd tota virtus Sacramentorum à passione Christi deriuatur, secundum quod est homo, cui in natura propriè conformantur homines, non autem Angeli, sed potius secundum passionem suam dicitur secundum quid ab Angelis minoratus, vt dicitur Heb. 2. & ideo propriè ad homines pertinet dispensare Sacramenta, & in eis ministrare, non autem ad Angelos, nisi Diuina dispensatione hoc fieret.

Vtrum debeant esse septem Sacramenta
Ecclesiæ.

R E S O L U T I O.

Dicendum est secundum D. Tho. in 3. part. Q. 65. art. 1. quod conuenienter septem esse debent Sacramenta Ecclesiæ, vt medicina, & remedia contra peccatum. Nam Baptismus institutus est contra carentiam vitæ spiritualis, quæ insurgit ex peccato originali. Confirmatio verò contra infirmitatem, & imbecilitatem animi, quæ in nuper natis inuenitur. Eucharistia contra labilitatem animi ad peccandum. Pœnitentia contra peccatum actuale post baptismum commissum. Extrema vnctio contra reliquias peccatorum, nempe contra corruptos habitus, & inclinationes, quæ nobis vsu peccandi relinquuntur. Ordo contra dissolutionem multitudinis. Matrimonium autem in remedium contra concupiscentiam personalem, & contra defectum multitudinis, qui per mortem accidit. præterea, Sacramenta correspondent etiam virtutibus. Nam fidei respondet Baptismus, contra culpam originalem. Spei verò Extrema vnctio, contra venialem. Charitati autem Eucharistia, contra malitiæ pœnalitatem charitati contrariam. Ordo deinde coaptatur prudentiæ, contra pœnam ignorantie. Iustitiæ verò pœnitentia contra peccatum mortale. Temperantiæ
autem

autem matrimonium, contra pœnam concupiscen-
tiæ. Vltimò, Fortitudini correspondet Confirma-
tio contra infirmitatem. Patet igitur, quòd con-
uenienter septem esse debent Sacramenta Ecclesiæ,
ad salutem animæ ordinata.

Vtrum omnia Sacramenta sint de neces-
sitate salutis.

R E S O L V T I O.

Dicendum est secundum D. Tho. in 3. part.
Q. 65. art. 4. quòd necessarium est duplex;
Vnum sine quo finis haberi non potest, si-
cut cibus est necessarius Vitæ humanæ, & hoc, est
simpliciter necessarium ad finem. Aliud est neces-
sarium, sine quo finis non habetur ita conuenien-
ter, sicut equus necessarius est ad iter, & hoc vo-
catur necessarium secundum quid, loquendo igi-
tur de prima necessitate, sunt tria Sacramēta, quo-
rum vnum simpliciter, & absolutè est necessariū
Vitæ humanæ spirituali; & hoc est Sacramentum
Baptismi. Duo verò alia sunt necessaria ex sup-
positione, ad esse similiter vitæ spiritualis: & ta-
lia sunt Sacramentum pœnitentiæ, supposito sci-
licet peccato mortali post Baptismum, & Sacra-
mentum ordinis, supposita gubernatione Ecclesiæ,
nam vt dicitur prouerb. 11. vbi non est governa-
tor, populus corruet. Si verò loquamur de secun-
da ne-

168 Quæstionum Theologicarum
da necessitate, sic cætera Sacramenta ad salutem
Vitæ humanæ necessaria sunt.

DE BAPTISMO.

Vtrum Baptismus sit ipsa ablutio.

RESOLVTIO.

Dicendum est secundum D. Th. in 3. part.
Q. 66. art. 1. quod in Sacramento Baptis-
mi tria consideranda sunt. Aliquid scili-
cet, quod est sacramentum tantum. Aliquid au-
tem, quod est res, & sacramentum. Aliquid ter-
tiò, quod est res tantum sacramenti. Sacramen-
tum tantum est aliquid visibile, exterius existens,
quod scilicet est signum interioris effectus, cuius-
modi est ipsa aqua, & eius vsus, qui est ablutio.
res autem, & Sacramentum, est character Baptis-
malis, qui est res per externam abluitionem signi-
ficata. gratia verò ipsa iustificans, seu iustificatio,
quæ per ipsam fit, est res tantum Sacramenti. Vn-
de, quantum ad Sacramentum tantum, Baptismus
est ipsa ablutio exterior, quæ est signum abluitionis
interioris animæ. & ideò Magist. in 4 sent. dist. 3.
dicit, quod Baptismus est ablutio corporis exterior
facta sub præscripta verborum forma.

Vtrum

Vtrum ad Baptismum requiratur aqua simplex.

R E S O L V T I O.

Dicendum est secundum D. Th. in 3. part. Q. 66. art. 4. quod ad Baptismum requiritur aqua simplex. Vnde, qualitercunque transmutetur aqua, dummodo non solvatur species aquæ, potest fieri baptismus, si verò solvatur species aquæ, non potest fieri Baptismus; ratio est, quia propria materia Baptismi est aqua: ergo ubique servatur aqua, est Baptismus, ubicunque verò non servatur, non erit Baptismus. Nomine autem aquæ intelligitur simplex, & pura: hoc est, ubi servatur species aquæ. patet igitur, quod ad Baptismum requiritur aqua simplex.

Vtrum hæc sit conueniens forma Baptismi, ego te baptizo in nomine Patris, & Filij, & Spiritus sancti.

R E S O L V T I O.

Dicendum est secundum D. Th. in 3. part. Q. 66. art. 5. quod in forma Baptismi exprimitur eius causa, quæ quidem causa duplex est. Vna scilicet principalis, à qua virtutem habet, quæ est Sancta Trinitas. Alia autem instrumentalis, scilicet minister, qui exterius tradit Sacramentum. & ideo oportet, in forma Baptismi, de utraque fieri mentionem. tangitur causa instru-

170 Quæstionum Theologicarum
instrumentalis, cum dicitur, ego te Baptizo, cau-
sa autem principalis, cum dicitur, in nomine Pa-
tris, & Filij, & Spiritus Sancti. Unde, hæc est con-
ueniens forma Baptismi. ego te Baptizo, in no-
mine Patris, & Filij, & Spiritus Sancti.

Vtrum vnū tantum, vel plura sint Baptismata

R E S O L V T I O.

Dicendum est secundum. D. Th. in 3. part.
Q. 66. art. 11. & 12. & Dominic. Sot. in 4.
sent. dist. 3. art. 11. quod simpliciter, & ab-
solutè vnum est Baptisma: sicuti vna fides, & v-
nus Deus, ut dicit Apost. ad Ephe. 4. secundum
quid verò, alia duo reperiuntur Baptismata, quæ
tamen includuntur in Baptismo aquæ, qui effica-
ciam habet, & ex passione Christi, & ex Spiritu
Sancto; & ideo animaduertendum est, quod per
hoc non tollitur vnitas Baptismatis. Dicamus ita-
que, quod tria sunt peccati remedia, quæ vocan-
tur baptismata: nempe Baptismus aquæ, Marti-
rium, & pœnitentia, seu fluminis, sanguinis, &
flaminis. Baptismus aquæ, nomen fluminis, sumit
à sua materia. Martiriū quidem nuncupatur Bap-
tismus sanguinis ab effectu effusionis eius. pœni-
tentia verò. s. motus cordis interior, appellatur
Baptismus flaminis, à causa, qua flamine Spiri-
tus Sancti inspiratur. præterea, sciendum est, quod
Baptismus tam sanguinis, quam flaminis, ob id
nomina-

nominatur Baptismus, quia uterque supplet vicem Baptismi aquæ. Unde, solus Baptismus aquæ absolutè, & simpliciter debet censeri Baptismus, & consequenter sacramentum; Baptisma verò fluminis, & sanguinis, ita dicuntur, quia suppleant vicem Baptismi fluminis: & ideò Baptismus fluminis, vel sanguinis sufficit ad salutem, dum tamen ille, qui huiusmodi Baptismum recipit, habeat propositum recipiendi Baptismum fluminis, si potuerit. alioquin, si quis, neglecto Baptismo aquæ, alium susciperet Baptismum, scilicet, vel sanguinis, vel fluminis, illum ad iudicium sumeret. præterea, Baptismo fluminis, & sanguinis, Baptizantur tantum boni. Baptismo verò fluminis, tam boni, quam mali, sed boni ad suam salutem, mali verò ad suum iudicium. boni similiter sacramentum recipiunt, & rem sacramenti: mali verò sacramentum tantum. Boni autem, qui baptizantur fluminis, vel sanguinis Baptismo, rem Sacramenti recipiunt, non autem Sacramentum. Unde, Baptismus aquæ est necessarius ex præcepto, Baptismus verò sanguinis, & fluminis necessarius est ex voto, non habita scilicet fluminis Baptismi copia, ut dictum est.

Vtrum soli præbyteri possint Baptizare.

R E S O L U T I O .

D*icendum est secundum D.Th. in 3. par. Q. 67. art. 2. 3. & 4. quòd simpliciter loquendo, solus*

solus Sacerdos baptizare potest. nam sicuti propriè ad Sacerdotem pertinet consecrare Eucharistiam: (ad quod principaliter Sacerdotium ordinatur) ita ad proprium officium Sacerdotis pertinet baptizare. Secundum quid verò loquendo, scilicet causa necessitatis, etiam quilibet laicus, & qualibet mulier (servata tamen forma baptismi) baptizare potest. nam inter omnia alia sacramenta maxima necessitatis est baptismus, qui est regeneratio hominis in vitam spiritualem. Sciendum tamen est, quòd non debet mulier baptizare, si adsit copia viri, nec laicus homo, præsente clerico, nec clericus, præsente Sacerdote, qui tamen potest baptizare præsente Episcopo, eo quòd hoc pertinet ad officium Sacerdotis. & sic manifestum est, quòd non soli præsbyteri, sed etiam quilibet alius, in articulo necessitatis, baptizare potest, servata tamen forma baptismi, vt dictum est.

Vtrum peccatores sint baptizandi.

R E S O L V T I O.

Sciendum est secundum Th. in 3. par. Q. 68. art. 4. quòd aliquis potest dici peccator dupliciter. Vno modo propter maculam, & reatum præteritum. & sic peccatoribus est Sacramentum Baptismi conferendum, quia est ad hoc specialiter institutum, vt per ipsum peccatorum sordes mudentur. Alio modo potest dici quis peccator

cator ex voluntate peccandi, & proposito persi-
stendi in peccato. & sic huiusmodi peccatoribus
nullo modo est Sacramentum baptismi conferen-
dum. ratio est, quia per baptismum homines Chri-
sto incorporantur secundum illud Gal. 3. quicumq;
in Christo baptizati estis, Christum induistis: quam-
diu autem aliquis habet voluntatem peccandi, non
potest esse Christo coniunctus: ergo tales peccatores
non sunt baptizandi. patet igitur, quod peccator
primo modo acceptus, baptizari potest: secundo
verò modo sumptus, nequaquã est baptizandus.

Vtrum inuitis parentibus pueri Iudæo-
rum, vel aliorum infidelium sint
Baptizandi.

R E S O L V T I O.

Dicendum est secundum Th. in 3. part. Q. 68.
art. 10. quod pueri Iudæorum & infidelium,
vel sunt adulti, vel non: si sunt adulti, habentes
usum rationis, tunc sunt in sua potestate, & con-
sequenter propria voluntate, inuitis parentibus,
possunt baptizari. & ideo tales licitè moneri pos-
sunt, & induci ad suscipiendum baptismum. Si
verò non dum habent usum liberi arbitrij, natura-
liter sunt sub cura parentum, quandiu ipsi sibi
providere non possunt. Vnde etiam & de pueris an-
tiquorum dicitur in 4. sent. dist. 1. quod saluaban-
tur in fide parentum; & ideo contra iniustitiam na-
turalem

turalem esset, si tales pueri inuitis parentibus baptizarentur, & maximè periculosum esset filios infidelium baptizare, quia de facili ad infidelitatem redirent, propter naturalem affectum ad parentes. Vnde, (vt dicitur dist. 45. c. de Iudæis) non sunt Iudæi ad fidem cogendi, nam cui vult Deus miseretur; & quem vult indurat.

Vtrum paruulus existens in vtero matris possit baptizari.

R E S O L V T I O.

Dicendum est secundum Scotum in 4. sent. dist. 4. Q. 3. & Th. in 3. part. Q. 68. art. 11. Quòd puer existens in vtero matris potest dupliciter se habere. Vno modo, quòd sit sic in vtero matris, q̄ nulla pars pueri emineat, neque appareat extra vterum matris: & sic huiusmodi paruulus nullo modo potest baptizari baptismo fluminis: ratio est, quia tali baptismo nullus potest baptizari, nisi fiat ablutio; sed non potest fieri ablutio in puerum totaliter existentem in vtero matris; ergo huiusmodi paruulus nulla via potest baptizari baptismo fluminis. nam nemo renascitur, nisi prius nascatur. Alio modo puer existens in vtero matris potest cōsiderari secundum aliquā partem corporis exterius apparentem, & hoc dupliciter, uel enim illa pars pueri, quæ apparet extra est membrum principale: sicut caput; & sic potest

potest verè baptizari, & si sic baptizaretur, nullo modo esset rebaptizandus, idèd caueant sacerdotes: si dicatur contra, eo quòd Baptismus est ablutio corporis: sed corpus non abluatur per aquam; sed solum caput: ergo nō est ibi verus Baptismus. respondeo, quòd ad Baptismum non requiritur, q̃ totum corpus abluatur: sed sufficit, quòd aliqua pars abluatur, & maximè pars principalis: cuiusmodi est caput, in quo sunt omnes sensus. vel apparet pars minus principalis extra vterum: puta, pes, vel manus, & tunc dicitur, quòd debet baptizari aspergendo aquam, quia anima, secundum Arist. in 2. de anima, est tota in toto, & tota in qualibet parte corporis, idest anima sic est in toto, quòd extra totum nihil animæ est, quia non habet partes. Similiter anima est in qualibet parte: sic q̃ nihil animæ est extra illam partem. illa ergo pars debet baptizari, quia est corpus animatum, & hoc in articulo necessitatis. Si autem vltèrius quis dicat, an si sic baptizatus nascatur, debeat iterum rebaptizari: dicendum est, quòd sic: sub conditione tamen, dicendo: si tu es baptizatus, ego non te baptizo: sed si tu non es baptizatus, ego te baptizo:
in nomine patris, & filij,
& Spiritus sancti.

Vtrum aliquis posset in articulo necessitatis proijcere puerum intra puteum, dicendo verba: ego te baptizo, &c. ad hunc finem, vt paruulus ille esset baptizatus.

R E S O L V T I O.

Dicendum est, quod nemo potest proijcere puerum intra puteum, ad hoc vt puer ille baptizetur; quia esset causa mortis illius pueri; & licet etiam proijceret illum puerum, aliquis vel Sacerdos, vel laicus intra puteum, adhuc non esset baptizatus, quia baptismus est quodammodo ordinatus ad vitam: sed ista proiectio paruuli est magis ad mortem: ergo non esset baptismus. præterea, secundum Apost. ad Rom. 3. non sunt facienda mala, vt inde veniant bona; non debet ergo Sacerdos, vel aliquis alius proijcere paruulum aliquem, etiā imminente periculo mortis, intra puteum, vt ipsum baptizet: quia mortaliter peccaret. patet igitur, quod nemo debet proijcere aliquem puerum intra puteum, ad hoc, vt paruulus ille baptizetur.

Vtrum aliquis similiter debeat occidere matrem, vt baptizet puerum.

R E S O L V T I O.

Dicendum est secundum D.Th. in 3. part. Q. 68. art. 11. in resp. ad 3. quod non sunt facienda mala,

mala, vt veniant bona, & ideò non debet homo occidere matrem, vt baptizet puerum, quia peccat mortaliter. si tamen mater mortua fuerit, viuente prole in vtero, debet aperiri, vt puer baptizetur.

Vtrum per Baptismum tollantur omnia peccata,

R E S O L V T I O.

Dicendum est secundum D.Tho. in 3. part. Q. 69. art. 1. quòd per baptismum omnia delentur peccata. quòd probatur, primò authoritate Ezech. 36. dicentis, Effundam super vos aquam mundam, & mundabimini ab omnibus inquinamentis vestris. deinde testimonio Pauli Rom. 6. quicunq; baptizati estis in Christo Iesu, in morte ipsius baptizati estis. & postea concludit. ita & vos existimate fratres, mortuos quidem esse peccato, viuentes autem Deo, in Christo Iesu Domino nostro. mori autem peccato, & viuere Deo est, omni peccato relicto, in gratiam innocentiae resurgere apud Deum, ergo per baptismum tollitur omne peccatum, tam actuale quàm originale, dummodo suscipiens non ponat obicem; vt habetur de consec. dist. 4. c. Regenerante.

Vtrum per baptismum homo liberetur ab omni reatu peccati.

R E S O L V T I O.

Dicendum est secundum D.Th. in 3. part. Q. 69.

*art. 2. quòd sic . nam per baptismum aliquis incor-
poratur passioni, & morti Christi, secundum illud
Rom. 6. si mortui sumus cum Christo, credimus,
quia simul etiam viuemus cum eo; igitur omni
baptizato communicatur passio Christi ad reme-
dium, ac si ipse passus, & mortuus esset. passio
autem Christi, vt dictum est, est sufficiens satisfa-
ctio pro omnibus peccatis omnium hominum, &
ideò ille, qui baptizatur, liberatur à reatu totius
pœnæ sibi debitæ pro peccatis, ac si ipse sufficien-
ter pro omnibus peccatis suis satisfecisset. Vnde,
manifestum est, quòd per baptismum homo libe-
ratur ab omni reatu peccati.*

*Vtrum effectus baptismi sit apertio ianuæ
Regni Cœlestis.*

R E S O L V T I O.

D*icendum est secundum D. Tho. in 3. part.
Q. 69. art. 7. q̄ sic. nam aperire ianuam
Regni Cœlestis, nihil aliud est, quàm amo-
uere impedimentum, quo quis impeditur Regnum
Cœleste introire. hoc autem impedimentum est cul-
pa, & reatus pœnæ; sed cùm per baptismum om-
nis culpa, & omnis reatus pœnæ tollatur, (vt di-
ctum est) consequens etiam est, quòd effectus ba-
ptismi sit apertio ianuæ Regni Cœlestis. Sed no-
tandum est, quòd propriè loquendo, apertio ianuæ
Regni Cœlestis, per se primò est effectus mortis
Christi,*

Christi, attribuitur autem baptismo, eo quod in sui institutione Cœli, aperti leguntur, ut dicitur Mat. 3. Unde, baptismus in tantum aperit baptizato ianuam Regni Cœlestis, in quantum incorporat eum passioni Christi, virtutem eius homini applicando.

Vtrum baptismus sit iterabilis.

R E S O L V T I O.

Dicendum est secundum Th. in 3. par. Q. 66. art. 9. & Scotum in 4. sent. dist. 6. Q. 7. ¶ Sacramētum baptismi nullo modo est reiterabile, immò reiterans peccaret, & Dans, & recipiens. & in hoc conueniunt omnes Doctores, dato etiam, quod quis esset hæreticus, & faceret omnia mala, non propter hoc deberet rebaptizari, & ratio est ista, quia Christus mortuus est tantum semel: ergo baptismus solum debet dari semel. patet consequentia, quia Sacramentum baptismi habet suam virtutem ex passione Christi. igitur si Christus, (ut dictum est) semel mortuus est, semel etiam debet baptismus dari. præterea, per baptismum deletur peccatum originale, quod peccatum postquã est deletum, nunquã cōtrahimus, nec reuertimur in illud, ergo nec baptismus iterari debet; alia ratio est, quia per baptismum remittuntur omnia peccata, & omnis pœna dummodo non sit obex ergo congruū est, quod baptismus sit irreiterabilis.

Vtrum paruulus expositus sit baptizandus.

R E S O L V T I O.

Dicendum est secundum Scotum in 4. sent. dist. 4. Q. 8. quòd paruulus ille, vel inuenitur cum aliquo signo significante, quòd non sit baptizatus, vel sine aliquo signo. si inueniatur cum aliquo signo, quòd non sit baptizatus, puta, cum scriptura dicente, quòd non sit baptizatus paruulus ille; tunc dicitur, quòd talis sine aliqua conditione est baptizandus. si autem talis inueniatur sine signo, & non appareat, vtrum sit baptizatus, vel non. in tali casu respondet Scotus, quòd duo debent fieri, primò debet curatus inuestigare per vicinas, vtrum aliqua sciat si sit baptizatus, vel non, si autem curatus nō habeat certitudinem, tunc secundariò debet illum baptizare sub conditione, puta dicendo sic. si non es baptizatus ego te baptizo, si es baptizatus ego non te baptizo &c. tamen si aliquam coniecturam inuenit per vicinas, quòd ille sit baptizatus, talis non est baptizandus. præterea, sciendum est, quòd paruulus expositus est ille, qui in aliquo loco dimittitur, ac si patrem, & matrem non haberet, vt sunt isti, qui ponuntur ad portas Ecclesiarū. Vnde, de istis habuimus sermonem.

Vtrum.

Vtrum in quocunq; statu vię post lapsum fuerit aliquod Sacramentum institutum .

R E S O L V T I O .

Dicendum est secundum Scotum in 4. sent. dist. 1. Q. 3. & Pet. Tat. ibidem Q. 3. quod Sacramentum potest considerari dupliciter. Vno modo propriè. Alio modo impropriè. propriè Sacramentum est signum sensibile, gratiæ Dei, vel effectum eius gratuitum, ex institutione Diuina, efficaciter significans, ordinatum ad salutem hominis viatoris. & sic habemus septem Sacramenta propriè dicta, scilicet baptismum, pœnitentiam &c. Sacramentum verò impropriè dictum est signum rei sacræ largo modo: & istud non est Sacramentum. non enim sequitur: istud est Sacramentum impropriè dictum, ergo est Sacramentum, committitur enim fallacia secundum quid ad simpliciter. Sed tu velles scire, quæ sunt Sacramenta impropriè dicta. dico, quod omnes cerimoniæ, quas habebant in veteri lege, erant Sacramenta impropriè dicta: sicut purgationes de actibus immundis, omnes oblationes, omnia sacrificia, vocantur Sacramenta impropriè dicta; & nunc in lege nostra, genuflexiones, & pectorum percussiones, vocantur Sacramenta impropriè dicta. Vndè, ceremoniæ, quas habebant antiqui, habebantur per modum præcepti, & non per modum Sacramenti:

sic quòd, quando omittebant vnā, peccabant mortaliter. Et ideò Notandum est, quòd Sacramenta propriè dicta, conferunt gratiam tanquā signa efficacia, Et certa: sed Sacramenta impropriè dicta non conferunt gratiam per modum signorum efficacium: sed per modum meriti, Et virtute boni motus interioris, quem faciebant. Vndè dicendum est, quòd fuerunt tres status viæ, post lapsum Adæ. Primus est status Naturæ ab Adam vsque ad Moysen. Secundus est status legis scriptæ à Moyse vsq; ad Christum. Tertius est status legis Christi, vel euangelicæ, Et est à Christo vsque ad finem mundi. Ideò ante circumcisionem (quæ fuit primò data Abraæ, Et consequenter semini eius) habuerunt Sacrificium, vel aliquid aliud loco Sacrificij, Et Circumcisionis, quod esset in remedium peccati originalis. Quidam enim, vt paruuli saluabantur in fide parentum, parentes verò virtute sacrificiorum; mulieres verò ante Circumcisionem, Et post, per fidem, Et operationem bonam, vel suam, si erant adultæ, vel parentum, si erant paruulæ, saluabantur. qui verò ex stirpe Abraæ descendebant per Circumcisionem iustificabantur, quæ Circumcisio durauit ab Abraam vsq; ad promulgationem baptismi per Apostolos Christi. Vndè, (vt dicit Th. in 3. part. Q. 70. art. 3. in resp. ad. 1.) circumcisio fiebat in membro generationis, propter tria. Primò, quia signum erat fidei, quæ Abraam credidit

credidit Christum ex suo semine nasciturum. Secundo, quia erat in remedium peccati originalis, quod per actum generationis traducitur. Tertiò, quia ordinabatur ad diminutionem carnalis concupiscentiæ, quæ præcipuè in membris illis viger, propter abundantiam delectationis venereorum. patet igitur, quòd in quocunq; statu viæ, post peccatum Adæ, fuit aliquod remedium institutum.

DE CONFIRMATIONE.

Vtrum Confirmatio sit Sacramentum.

RESOLUTIO.

Dicendum est secundum Th. in 3. par. Q. 72. art. 1. quòd sic. nam sacramenta nouæ legis ad speciales gratiæ effectus ordinantur: ergo ubi aliquis occurrit specialis effectus gratiæ, reperitur speciale sacramentum; manifestum est autem, quòd in hoc sacramento plenitudo gratiæ, & robur confertur, igitur Catholicè affirmare debemus Confirmationem esse Sacramentum nouæ legis. præterea, sicuti vitam spiritualem homo accipit per baptismum, similiter in confirmatione homo baptizatus quasi quandam perfectam etatē spiritualis vitæ accipere dicitur. & ideò in c. Spiritus sanctus de consec. dist. 5. dicitur, quòd quamuis peccata in baptismo remittantur, quoad culpā, & poenā; in confirmatione tamen, homo recipit
augmen-

augmentum gratiæ : & quamuis baptismus sufficiat ad salutem statim morituris , confirmatio tamen victuris est necessaria , vt confirmentur , & corroborentur contra vitia , & peccata , vt possint Diabolo resistere. Vndè, manifestum est, quòd victuris necessaria sunt confirmationis auxilia, quæ confirmatio armat , & instruit , ad agones mundi huius , & prælia reseruandos .

Vtrum Chrisma sit conueniens materia huius Sacramenti .

R E S O L V T I O .

Dicendum est secundum Th. in 3. par. Q. 72. art. 2. quòd Chrisma est conueniens materia huius Sacramenti. nam, vt dictum est, in hoc Sacramento datur plenitudo Spiritus sancti ad robur spirituale, quòd perfectæ ætati competit: gratia autem Spiritus sancti in oleo designatur, Vndè Christus dicitur esse vnctus oleo lætitiæ propter plenitudinem Spiritus sancti, quam habuit ; & ideo oleum competit materiæ huius Sacramenti , admiscetur autem balsamum propter fragrantiam odoris , & incorruptionem, quam præstat. Chrisma itaque ex oleo , & balsamo consecratum , est conueniens materia huius sacramenti, forma verò, sunt verba, quæ dicit Episcopus , nēpè ego signo te signo Sanctæ Crucis, cōfirmo te Chrismate Salutis, in nomine Patris, & Filij, & Spiritus sancti. Amē.

Vtrum

Vtrum Sacramentum confirmationis imprimat Characterem.

R E S O L V T I O.

Dicendum est secundum Th. in 3. part. Q. 72. art. 5. quod sic. nam Character est quædam spiritualis potestas ad aliquas sacras actiones ordinata; ideò sicut baptismus est quædam spiritualis regeneratio in vitam Christianam, ita etiam confirmatio est quoddam spirituale augmentum, promouens hominem in spiritualem ætatem perfectam; & ideò per Sacramentum confirmationis datur homini potestas spiritualis, ad quasdam alias actiones sacras, præter illas, ad quas datur ei potestas in baptismo. nã in baptismo accipit homo potestatem ad ea agenda, quæ ad propriam salutem pertinent, pro vt s. secundum seipsum viuit; sed in confirmatione accipit homo potestatem ad agendum ea, quæ pertinent ad pugnam spirituales, contra hostes fidei, & ad hoc vt bene viuat. Vnde manifestum est, quod sicuti in baptismo, similiter etiam in confirmatione, Character imprimitur.

Vtrum confirmatio possit conferri ab alio, quam ab Episcopo.

R E S O L V T I O.

Dicendum est secundum D. Th. in 3. par. Q. 72. ar. 11. & D. Bonauent. in 4. sent. dist. 7. quod
soli

soli Episcopi debent confirmare, & si alius confirmauerit, sacramentum non tenebit, vt habetur de consec. dist. 5. c. Manus impositionis; & ratio huius est, quia Episcopi, & eorum successores sunt prælati in Ecclesia principales: nec tempore Apostolorum ab alijs, quàm ab ipsis Apostolis, legitur, aut scitur hoc Sacramentum esse peractum. & si quærat, unde habet hoc Episcopus, respondet Bonau. loco cirato, in resp. ad Vlt. quòd nec à iurisdictione, nec ab ordine Sacerdotali, sed ab auctoritate, & dignitate Episcopali, & est quædam eminentia, quæ confertur Episcopo, cum consecratur. patet igitur, quòd confirmatio conferri non potest ab alio, quàm ab Episcopo.

Vtrum istud Sacramentum Confirmationis sit necessarium ad salutem.

R E S O L V T I O.

Dicendum est secundum Scotum in 4. sent. dist. 7. Q. 2. & D. Bonau. ibidem art. 3. Q. 2. quòd sacramentum confirmationis esse nobis necessarium potest dupliciter intelligi. Vno modo, quòd sit simpliciter necessarium ad salutem: & sic non est necessarium, quia multi sunt salui, qui nunquam receperunt hoc Sacramentum. Alio modo dicitur necessarium secundum quid, sic videlicet, quòd non debet contemni opportunitate concurrente, & ab adulto, immò si adultus hoc Sacramentum contem-

contemneret, peccaret mortaliter; & hoc modo, Sacramentum istud est necessarium, & tenemur recipere illud ad nostram salutem.

Vtrum Sacramentum confirmationis sit dignius Sacramento baptismi.

R E S O L V T I O.

Dicendum est secundum Scotum in 4. sent. dist. 7. Q. 3. quod Baptismus, & confirmatio possunt adinuicem comparari dupliciter. Vno modo explicitè, scilicet ratione sui effectus per se considerati. Alio modo implicitè, scilicet ratione effectus, qui aliud maiorem præsupponit. Si primo modo confirmatio, & baptismus considerentur, sic sacramentum baptismi perfectius, & dignius est Sacramento Confirmationis: ratio est, quia per baptismum deletur peccatum originale, & omne peccatum actuale, dummodo suscipiens non ponat obicem: similiter per baptismum datur gratia maior, quam per confirmationem, ergo respectu huius primæ comparationis, baptismus dignior est confirmatione. Si verò secundo modo adinuicem comparentur confirmatio, & baptismus, tunc, quia confirmatio præsupponit baptismum, proculdubio debemus dicere, quod Sacramentum confirmationis sit dignius, & perfectius solo Sacramento baptismi; ratio est, quia per Sacramentum Confirmationis, aliquis non solum dicitur vivere, sed etiam

benè

benè viuere, & perfectè. per baptismum verò homo solum vixit. præterea, duobona perfectiora sunt vno bono: ergo gratia, quæ datur in confirmatione, & gratia baptismi antehabita, est perfectior, quàm gratia baptismalis solum: ideo præsupponendo primū Sacramentum: secundum perfectius est solo primo. Vltèrius. secundum Magist. in 4. sent. dist. 7. alia datur distinctio, quæ est ista, Sacramentum confirmationis, & baptismi possunt considerari dupliciter. Vno modo ratione effectus. Alio modo ratione Ministri. primo modo. baptismus dignior est confirmatione, quia, vti dictum est, baptismus plus valet ad remissionem peccatorum. Secundo modo autem, confirmatio dignior est ipso baptismo, eo quòd à digniori datur, nempe ab Episcopo. omnia itaque clara sunt.

DE SACRAMENTO

Eucharistiæ.

Vtrum Eucharistia sit Sacramentum.

RESOLVTIO.

Dicendum est secundum Mag. sent. in 4. dist. 8. quòd in Eucharistia tria sunt distinguenda. Vnum, quod est Sacramentum, vt species visibilis, s. forma panis, & vini. Aliud, quod est Sacramentum, & res, vt est caro Christi vera, quam de Virgine traxit, & sanguis verus, quem

quem pro nobis in cruce effudit. Tertium verò quod est res, & non Sacramentum, ut corpus Christi mysticum. Sacramentum est inuisibilis gratiae, visibile signum, cuiusmodi sunt species panis, & vini. res verò huius Sacramenti est duplex, una contenta, & significata; & haec est caro Christi vera, & sanguis verus. res verò significata, & non contenta, est corpus Christi mysticum, quod est vnitas Ecclesiae. Eucharistia ergo (ut dicit Scotus in 4. Sent. dist. 8. Q. 1.) est Sacramentum corporis, ut Sanguinis Christi, veraciter contenti sub speciebus panis, & vini, post consecrationem factam à sacerdote, sub verbis certis, cum debita intentione prolatis, ex institutione diuina, veraciter significans Corpus Christi, & sanguinem sub illis speciebus realiter contineri. Vnde in hoc Sacramento non solum confertur gratiae, & virtutis augmentum, sed etiam ille totus sumitur, qui est fons, & origo totius gratiae. praeterea, sacramenta Ecclesiae ordinantur ad subueniendum homini in vita Spirituali, (ut dicit Th. in 3. part. Q. 73. art. 1.) vita autem spiritualis quodammodo vitae corporali conformatur, eo quod corporalia spiritualium similitudinem gerunt, manifestum est autem, quod sicut ad vitam corporalem requiritur generatio, per quam, homo vitam accipit, & augmentum, quo homo ad perfectionem vitae perducitur: ita etiam requiritur alimentum, quo homo con-

190 Quæstionum Theologicarum
mo conseruatur in vita. & idè similiter dicere
debemus, quòd sicut ad vitam spiritualem oportet
esse baptismum, qui est spiritualis generatio,
& Confirmationem, quæ est spirituale augmentũ:
ita oportet esse sacramentum Eucharistiæ, quod
est spirituale alimentum.

Vtrum totus Christus contineatur sub
hoc Sacramento.

R E S O L V T I O.

Dicendum est secundum D. Thom. in 3. part.
Q. 76. art. 1. quòd omninò necesse est con-
fiteri, secundum fidem Catholicam, quòd
totus Christus sit in hoc Sacramento, scilicet in
Diuina, & humana natura. sed sciendum est qd
aliquid Christi est in hoc Sacramento dupliciter.
Vno modo directè, & ex vi Sacramenti. Alio
modo indirectè, & ex naturali concomitantia. ex
vi quidem Sacramenti, existit sub speciebus id, in
quod directè substantia panis, & vini præexistens
conuertitur, pro vt verbis formæ significatur hoc
est corpus meum, & hic est sanguis meus. Vndè,
sub speciebus panis tantum est corpus, & sub spe-
ciebus vini tantum est sanguis. ex naturali verò
concomitantia est in hoc Sacramento quicquid ei
coniunctum est, in quod cōuersio terminatur. pro-
batur, quia si duo sunt realiter coniuncta, vbi-
que est vnum, ibi etiam est alterum: sola enim ra-
tione

tionem mentis potest unum sine altero considerari. Unde, consequens est, ut tam sub speciebus panis, quam sub speciebus vini totus contineatur Christus.

Vtrum totus Christus contineatur sub utraque specie huius Sacramenti.

R E S O L U T I O.

Dicendum est secundum D. Th. in 3. part. Q. 76. art. 2. quod certissime tenendum est, sub utraque specie huius Sacramenti, totum esse Christum, aliter tamen, & aliter. nam sub speciebus panis est quidem corpus Christi ex vi Sacramenti, sanguis autem ex naturali concomitantia, sicut anima, & Diuinitas; ratio est, quia Diuinitas corpus assumptum nunquam deposuit, & anima Christi semper est realiter corpori eius unita, secundum illud Apost. ad Rom. 6. Christus resurgens ex mortuis iam non moritur. & ideo ubicunque est corpus Christi, necesse est etiam concomitatur ei animam, & Diuinitatem esse. Sub speciebus vero vini, est è conuerso sanguis quidem ex vi consecrationis, & corpus ex naturali concomitantia, sicut anima, & Diuinitas; eo quod nunc sanguis Christi non est à corpore separatus, sicut fuit in triduo. Unde, D. Th. infert, quod si tunc, hoc Sacramentum fuisset celebratum, sub speciebus panis fuisset corpus Christi sine sanguine, & sub speciebus vini sanguis sine corpore; anima ve-

non nec ex vi Sacramenti, neque ex naturali concomitantia in hoc Sacramento fuisset, ratio est ista, quia anima Christi realiter separata fuit à corpore, sicuti & sanguis. patet igitur, quòd verè totus Christus cõtinetur sub vtraq; specie huius Sacramenti, diuersimodè tamen, vt dictum est.

Vtrum Corpus Christi sit in hoc Sacramento, sicut in loco.

R E S O L V T I O.

Dicendum est secundũ D.Th. in 3. part. Q. 76. art. 5. quòd, Corpus Christi esse in hoc Sacramento potest intelligi dupliciter. Vno modo, quòd sit in hoc Sacramento secundum proprium modum quantitatis dimensiue; & sic, hoc esse non potest, quia locus debet esse æqualis locato, vt dicit philosophus in 4. Phisic. sed locus, vbi est hoc Sacramentum, est multo minor, quàm Corpus Christi; ergo Corpus Christi, non est in hoc Sacramento, sicut in loco. Alio modo, Corpus Christi potest considerari secundum modum substantiæ, & sic hoc modo, Corpus Christi est in hoc Sacramento. eo enim modo, quo substantia à dimensionibus continetur, Corpus Christi dicitur esse in hoc Sacramento. Vnde, nullo modo, Corpus Christi est in hoc Sacramento localiter, sed per modũ substantiæ, vt dictum est. præterea, D. Bonau. in 4. sent. dist. 10. art. 1. Q. 3. dicit, quòd sicut filius Dei secundum

secundum Diuinitatem, habet triplicem modum essendi, in omnibus per essentiam, in iustis per gratiam, in Christo per unionē, similiter Corpus Christi localiter est in Cælo, personaliter in verbo, Sacramentaliter in altari. Vnde, possumus dicere, quod Corpus Christi sit Sacramentaliter in altari; non autem in hoc Sacramento sicut in loco, sed (ut ait D.Tho.) per modum substantiæ.

Vtrum accidentia remaneant sine subiecto
in hoc Sacramento.

R E S O L V T I O.

Dicendum est secundum Mag. sent. in 4. dist. 12. & D.Th. in 3. part. Q. 77. art. 1. & D. Bonau. in 4. similiter, dist. 12. art. 1. Q. 3. quod sic. nam sicuti Deus animā rationalem ex nihilo creat: similiter etiam virtute sua facere potest, quod accidentia maneant in hoc Sacramento sine subiecto: cum enim effectus magis dependeant à causa prima, quàm à causa secunda, Deus qui est prima causa substantiæ, & accidentis, per suam infinitam virtutem conseruare potest in esse accidens, subtrahē substantia, per quam conseruabatur in esse, sicut per propriam causam; sicut etiam alios effectus causarum naturalium potest producere, sine naturalibus causis, sicut primum hominem sine semine produxit, ut humanum corpus formauit in utero Virginis sine virili semine. Vnde, con-

194 *Quæstionum Theologicarum*
cludere debemus quòd virtute Diuina accidentiæ
remanent sine subiecto in hoc Sacramento Eucha-
ristiæ ad ministerij ritum, & suffragium fidei.

Vtrum duo sint modi manducandi.

R E S O L V T I O.

D*icendum est secundum D.Th.in 3.part.Q.80.*
art.1.& Mag.in 4.sent.dist.9.& D.Bonau.
ibidem art.1.Q.1. quòd, secundum duas res huius
Sacramenti, sunt duo modi manducandi. Vnus
Sacramentalis, qui consistit in sumptione ipsius sub
visibili specie panis, & vini. Alius autem spiri-
tualis, qui consistit in vnione ad Christum in Sa-
cramento. Vndè, ille spiritualiter manducat, qui
in vnitate Christi, & Ecclesiæ manet: & ideò soli
boni manducant spiritualiter; Sacramentum verò
manducare possunt tam boni, quàm mali, sed ma-
li ad suam condemnationem sumunt, boni verò
ad suam salutem. præterea, quidam accedunt ma-
lè dispositi; & hi manducant Sacramentaliter.
Quidam verò benè; & hi spiritualiter. quidam
suscipiunt ore corporis: & hi Sacramentaliter.
Quidam verò ore cordis, & hi spiritualiter man-
ducant. patet itaque, quòd duo sunt modi man-
ducandi, vnus. s. Sacramentalis, alter verò spiri-
tualis, vt dictum est:

Vtrum

Utrum Sacerdos debeat denegare Corpus Christi peccatori petenti.

R E S O L V T I O.

Dicendum est secundum D.Th. in 3. part. Q. 80. art. 6. quod peccator duplex est, occultus scilicet, & manifestus. peccator occultus est, qui extrinsecus apud alios viros bonos, videri vult bonus, cum tamen sit malus. Manifestus verò, qui publicè manet in peccato mortali, cuiusmodi sunt publici usurarij, publici raptores, & huiusmodi. Ideò manifestis peccatoribus non debet Sacerdos, quamvis petant, Sacram Communionem concedere. si verò non fuerint manifesti peccatores, sed occulti, non potest Sacerdos eis petentibus, Sacram Communionem denegare; ratio est, quia quilibet Christianus, ex hoc ipso, quod est baptizatus ius habet ad petenda omnia Sacramenta, nec potest, nisi ob manifestam causam, illo spoliari iure. potest tamen Sacerdos, qui est conscius criminis occultè monere peccatorem occultum, vel etiam in publico generaliter omnes, ne ad mensam domini accedant, antequàm de peccatis pœniteant, & Ecclesiæ reconcilientur. & sic patet, quod occultus peccator ad communionem admitti debet, non autem manifestus, ut dictum fuit.

Quare Corpus Christi sub aliena specie
sumitur?

RESOLVTIO.

Respondetur secundum Magist. in 4. sent. distin. II. tripliciter; primò, hoc fit ad augendum meritum fidei, quæ est de his, quæ non videntur: nam fides non habet meritum, ubi humana ratio præbet experimentum. Secundo, ad vitandum horrorem, nam non habemus in vsu carnem crudam comedere, & sanguinem bibere. Tercio, ne detur infidelibus occasio irridendi. sumitur etiam hoc Sacramentum sub duplici specie, quia Christus dupilem naturam assumpsit, animam, scilicet, & carnem, & hoc Sacramentum est ad tuitionem vtriusque. & quamuis sit duplex species, vnum tamen est Sacramentum, & sub vtraq; specie vnus Christus, vt superius dictum fuit.

DE POENITENTIA.

Vtrum pœnitentia sit Sacramentum.

RESOLVTIO.

Dicendum est secundum D. Tho. in 3. part. Q. 84. art. I. quod pœnitentia, quæ in Ecclesia agitur, est sacramentum. nam sicuti baptismus adhibetur ad purificandum ab originali

nali peccato, ita & pœnitentia, quæ in Ecclesia agitur, ad remittendum peccatum actuale, sed baptismus est sacramentum, ergo similiter & pœnitentia. præterea, sacramentum in aliqua celebratione consistit, cum res gesta ita fit, ut aliquid significatiuè sanctè accipiamus, quod sanctè accipiendum est, manifestum est autem, quòd in pœnitentia ita res gesta fit, quòd aliquid Sanctum significatur, tam ex parte peccatoris pœnitentis, quàm ex parte Sacerdotis absoluentis; nam peccator pœnitens per ea, quæ facit, & dicit, ostendit cor suum à peccato recessisse: similiter Sacerdos per ea, quæ agit, & dicit circa pœnitentem, significat opus Dei remittentis peccatum, ergo pœnitentia est Sacramentum, per quod remittuntur peccata, quæ post baptismum committuntur.

Vtrum pœnitentia sit de necessitate salutis.

R E S O L V T I O.

Dicendum est secundum D.Th. in 3. part. Q. 84. art. 5. quòd aliquid est necessarium ad salutem dupliciter. Vno modo absolute. Alio modo ex suppositione. absolute quidem, ad salutem necessarium est illud, sine quo nullus salutem consequi potest, sicut Sacramentum baptismi, per quod aliquis in Christo renascitur. Necessarium verò ex suppositione est sacramentum pœnitentiæ, quod quidem est necessarium non omnibus, sed peccato-

subiacentibus; supposito enim peccato mortali, necessariò requiritur pœnitentia ad illud delendum. & sic manifestum est, quòd pœnitentia est necessaria ex suppositione ad salutem, post peccatum, sicut medicatio corporalis, postquã homo in morbum periculosum inciderit.

Vtrum pœnitentia debeat durare vsque ad finem Vitæ.

R E S O L V T I O.

Dicendum est secundum D.Th. in 3. part. Q. 84. art. 8. quòd duplex est pœnitentia, interior scilicet, & exterior. interior quidem pœnitentia est, qua quis de peccato commisso dolet. exterior verò est, qua quis exteriora signa doloris ostendit, & ad extra peccata sua cõfitetur Sacerdoti absolventi, & iuxta eius arbitrium satisfacit. ideò pœnitentia interior debet durare vsque ad finem Vitæ: semper enim homini displicere debet, quod peccauit; nam si ei placeret peccasse, ex hoc ipso peccatum incurreret, & fructum veniæ perderet. Vnde, displicentia parit dolorem in eo, qui doloris est capax, qualis est homo in hac vita: in patria verò, ubi dolor locum non habet, displicebunt beatis peccata præterita, sine omni tristitia, secundum illud Isai. 65. obliuioni traditæ sunt angustie priores. pœnitentia autem exterior non oportet, quòd duret vsq; ad finem vitæ, sed vsque ad determinatum

tum tempus, secundum mensuram peccati. Vnde, sciendum est, quod vera pœnitentia non solum remouet peccata præterita, sed etiam præseruat hominem à peccatis futuris. quamuis igitur homo in primo instanti veræ pœnitentiæ, remissionē consequatur præteritorum peccatorum, oportet tamen in homine perseuerare pœnitentiam, ne iterum in peccatum incidat.

Vtrum remissa culpa per pœnitentiam remaneat reatus pœnæ.

R E S O L V T I O.

Dicendum est secundum D.Th. in 3. part. Q. 86. art. 4. & Dom. Sot. in 4. sent. distin. 15. Q. 1. art. 4. q̄ in peccato mortali sunt duo, scilicet auersio à Deo, qui est incommutabile bonum, & conuersio inordinata ad bonum commutabile. idè ex parte auersionis à Deo consequitur peccatum mortale reatus pœnæ æternæ, vt qui contra æternum bonum peccauit, in æternum puniatur. Ex parte verò conuersionis ad bonum Commutabile, (in quantum est contra ordinem rationis) consequitur etiam peccatū mortale reatus alicuius pœnæ; nam inordinatio culpæ non reducitur ad ordinem iustitiæ, nisi per pœnam, vt etiam civilis nos res publica docet. iustum est enim, vt qui voluntati suæ plus indulget, quàm debuit, contra voluntatem suā aliquid patiatur; sed quia conuersio ad commu-
tabile

tabile bonum est finita, non habet ex hac parte peccatum, quòd debeatur ei pœna æterna. Vndè, si sit inordinata conuersio ad bonum commutabile, sine auersione à Deo, sicuti est in peccatis venialibus, non debetur peccato pœna æterna, sed temporalis. ex his ergo colligitur, quòd per pœnitentiam simul cum culpa remittitur etiã reatus pœnæ æternæ. probatur, quia cùm per gratiam pœnitentiæ remittatur culpa, fiatq; conuersio in Deum, tollitur auersio, atq; adeò reatus pœnæ, quæ auersioni respondebat: potest tamen, remissa culpa per pœnitentiã, manere reatus alicuius pœnæ temporalis.

Vtrum peccata dimissa redeant per subsequens peccatum.

R E S O L V T I O.

D*icendum est secundum D.Th. in 3.par.Q.88. art.1. & Dom.Sot. in 4. sent. distin.16.Q.1. art.1. quòd (vt diximus) in peccato duo considerantur auersio scilicet à Deo, & conuersio ad bonum creatum. idè ex parte conuersionis, peccatum mortale subsequens non facit redire peccata mortalia prius abolita, alioquin sequeretur, quòd homo per peccatum prodigalitatis reduceretur in habitum, vel dispositionem auaritiæ prius extinctæ, & sic cõtrarium esset causa sui contrarij, quod est impossibile. atque adeò nec redit reatus pœnæ sensus, qui, illis dimissis, debebatur. Ex altera verò parte,*

ro parte, si consideremus in peccatis mortalibus absolutè, id quod est ex parte auersionis, tunc per peccatum mortale subsequens redit illud, quod fuerat in prioribus peccatis, ante eorum remissionem, in quantum scilicet per peccatū mortale sequens, homo priuatur gratia Dei, & fit reus pænæ æternæ, sicuti & prius erat. in quo sensu ait Iacob. c.2. qui offendit in vno, factus est omnium reus. & sic manifestum est, quod peccatum mortale, semel per pœnitentiā dimissum, non dicitur redire ex parte conuersionis, per subsequens peccatum, sed solum ex parte auersionis, quia per quodlibet peccatum mortale, homo auertitur à Deo, & priuatur gratia Dei, vt dictum est.

Vtrum contritio, confessio, & satisfactio sint tres partes pœnitentiæ.

R E S O L V T I O.

Dicendum est secundum Mag. in 4. sent. dist. 16. & D. Th. in 3. part. Q. 90. art. 2. & 3. quod pœnitentia dupliciter considerari potest. Vno modo, pro virtute. Alio modo pro Sacramento. si loquamur de pœnitentia, prout est virtus, sic dicendum est, quod contritio, confessio, & satisfactio non sunt partes eius, sed contritio est actus interior ab ea elicitus, vt dicit Dur. si verò loquamur de pœnitentia, pro vt Sacramentum, sic communiter tres assignantur partes pœnitentiæ, nempe

nempè contritio, confessio, & Satisfactio, nam sicuti peccatum corde, ore, & opere perpetratur, similiter per contritionem, confessionem, & satisfactionem, per claves Ecclesiæ deletur. fit ergo vte partes pœnitentiæ, nec plures sint, nec pauciores his tribus præassignatis.

Vtrum confessio Sacramentalis soli Sacerdoti sit facienda.

R E S O L V T I O.

D Icendum est secundum Th. in 4. sent. dist. 17. Q. 3. art. 3. & Domin. Sot. in 4. similiter dist. 18. Q. 4. art. 1. & D. Bonau. ibidem, dist. 17. art. 5. Q. 1. quòd solus Sacerdos est Sacramenti pœnitentiæ minister, cui necessariò facienda est confessio. & ratio est ista. Sacramentum pœnitentiæ est iudicium, quo homines virtute clauicum ad Regnum Cœlorum admittuntur, aut inde excludunt: eiusmodi aut clauces eius Apostolis, ac subinde eorum successoribus Sacerdotibus collatæ sunt, ergo illi sunt soli ministri. probatur minor: quia Mat. 16. Petro singulariter dictum fuit, tibi dabo clauces regni Cœlorum, quodcunque Solueris, &c. & Mat. 18. Apost. idem verbum repetitum est, Quæcunque solueritis super terram, erunt soluta & in Cœlo &c. præterea, gratia, quæ per Sacramenta confertur, à Christi capite descendit in membra; & ideò solus est ille minister sacramen-

cramentorum, in quibus gratia datur, qui habet potestatem super corpus Christi verum, quod solius Sacrdotis est, qui consecrare Eucharistiam potest: Vnde, cum in Sacramento pœnitentiæ gratia conferatur, consequens est, quod solus Sacerdos sit minister huius Sacramenti. & ideo, illi soli est facienda Sacramentalis confessio.

Vtrum aliquis in extremo vitæ suæ pœnitere possit.

R E S O L V T I O.

D*icendum est secundum Th. in 4. sent. dist. 20. Q. 1. art. 1. quod sic. nam quādiu homohabet vsum liberi arbitrij in hac vita, in qua non dum est confirmatum ad malum, potest præparare se ad gratiam, de peccatis dolendo, & sic gratiam remissionis peccatorum consequi potest. ideo pœnitentia facta sufficiens, siue sit in extremis, siue non, siue interior, siue exterior valet ad deletionem peccati, sed interior displicentia vel pœnitentia, si ista fiat, vel in extremis, vel in infirmitate delet peccatum; exterior verò, quæ sit cum confessione, & absolutione, si sit sufficiens delet peccatum, præsupposita tamen cōtritione interiori. præterea, Deus non est minus potens circa infirmum, quàm circa sanum, sed si sanus haberet istam pœnitentiam, dimitterentur sibi peccata; igitur sic erit, si est infirmus, & in extre-*
mo

mo vitæ, & habeat illam pœnitentiam, Deus potest ipsi delere peccata. Sciendum tamen est, (ut dicit Mag. sent. in 4. dist. 20.) quòd, omnibus illis, qui in fine pœnitentiam agunt, succurrere debemus, certitudinem tamen illorum scire non possumus. ideò ut unusquisque habeat vitam aternā, agat pœnitentiam, dum sanus est: quia si sic agit, dico illum esse securum, quia pœnitentiam egit eo tempore, quo peccare potuit. si autem quis velit agere pœnitentiam, quando iam peccare non potest, tunc non ille peccata dimittit, sed peccata illum dimittunt. & Ideò sanus peccata dimittit, & infirmum peccata dimittunt. consulendum est ergo sanis, ut pœnitentiam in sanitate agant: Vnde, pulcherimum elicimus Documentum, scilicet qualiter agere debeamus circa hominem, qui est in extremis, inducendo eum ad pœnitentiam. debemus, auditores, persuadere infirmo, quòd non plus recordetur de rebus mundanis, sed de Deo, & habeat displicentiam de peccatis: cogitet de magna misericordia Dei, & quomodo pepercit latroni, sic ut ei diceret. Hodie mecum eris in Paradiso. temporibus autem nostris, hoc non servatur, imò sæpè, uxores, filij, fratres, amici, & huiusmodi sunt causa damnationis multorum hominum in extremis morientium. clamat enim filius, pater mi, sine mihi tuam pecuniam, quam in arca habes, non autem fratri meo. clamat vxor, ò socie-

*tas mea, fac sic, ut ego possim bonis tuis uti, dum
vino, & possim permanere in domo tua. clamant
nonnulli alij, amicè dona nobis illum agrum, non
ne scis, quia, & nos benefecimus tibi, dum eras
iuuenis. & sic de cæteris omnibus dico, qui infir-
mos semper tentant de bonis temporalibus, non e-
nim quarunt eorum salutem, sed damnationem:
haberent autem curam de eorum salute, si dicerēt,
age pœnitentiam, noli cogitare de hoc mundo, nec
de bonis tuis temporalibus, sed de Deo, qui te crea-
uit, & nos omnes ad imaginem, & similitudinē
suam, & dicas, Domine, parce mihi peccatori, &
ne tradas bestijs animas confitentes tibi, & huius-
modi verba consolatoria. Vndè, manifestum est,
quòd quilibet habens vsum liberi arbitrij, potest
etiam in fine vitæ suæ agere pœnitentiam, nec de-
bet aliquis desperare de misericordia Dei, quia in-
finita est. verum tamen est, quòd difficile saluatur
homo in fine vitæ suæ. dum tempus ergo habemus
operemur bonum, s. agamus pœnitentiā, dum tem-
pus est pœnitentiæ. & sic non daemones, neq; ignē
æternum, sed Deū per essentiam videbimus æternū.*

*Vtrum in aliquo casu liceat alijs, quàm Sacer-
dotibus confiteri.*

R E S O L V T I O.

D*Icendum est secundum Th. in 4 sent. dist. 17.
Q. 3. art. 3. quòd sic. nam sicuti baptismus
est*

est sacramentum necessitatis, ita & pœnitentia, (quãuis primũ, necessarium sit necessitate simpliciter sumpta, secundum autem, s. Sacramentũ pœnitentiæ, necessarium sit necessitate conditionata, vt superius dictum fuit.) baptizatus autem duplicem habet ministrum: vnum, cui ex officio baptizare incumbit, scilicet sacerdotem: alium verò, cui ratione necessitatis dispensatio baptismi committitur: similiter igitur minister pœnitentiæ, cui confessio est facienda ex officio, est ipse Sacerdos: sed in necessitate etiam Laicus vicem supplet Sacerdotis, vt ei confessio fieri possit. & sic patet, qd in articulo necessitatis, scilicet quando haberi non potest copia Sacerdotis, quilibet etiam Laico confiteri potest.

Vtrum purgatorium sit post hanc vitam.

R E S O L V T I O.

Dicendum est secundum. D. Th. in 4. sent. dist. 21. Q. 1. art. 1. & D. Bonau. in 4. sent. dist. 20. art. 1. Q. 1. quòd ex necessitate, post hanc vitam reperitur locus, in quo animæ purgantur à pœnis, quæ ex remissis mortalibus relictæ sunt, vel venialibus sunt annexæ, neque in hac vita fuerunt satisfactione deletæ, nam pœna Purgatorijs solùm est ad soluendum debitum. & iustitia Dei hoc exigit, vt peccatum per debitam pœnam ordinetur. purgatorium ergo non est nisi ad abster-
gandos

gendos reatus, aut pœnæ, aut venialis culpæ. Quòd autem verum sit purgatorium, ex necessitate, post hanc vitam reperiri, probatur per illud, dicitur 2. Math. 12. Sancta, & salubris est cogitatio pro defunctis exorare, ut à peccatis solvantur, quod nec de damnatis, nec de beatis intelligi potest, non de beatis, quia illi nullo indigent auxilio; minus potest intelligi de Damnatis, quia in igne æterno cruciantur, in quo nulla est redemptio, immò dicam, quòd nec Deus ipse potest de potentia ordinata aliquem de igne æternoliberare: ergo illud dictum debet intelligi de illis, qui in igne purgantur à reatu alicuius pœnæ, aut venialis culpæ, quæ stat cum gratia. Sciendum tamen est, quòd multorum animæ hinc sine reatu alicuius pœnæ proficiuntur; ut sacro fonte abluti, ante usum rationis defuncti, & Apostoli, & Martires, & multi alij Sancti, qui gloriam æternam immediatè consecuti sunt. si verò quis quærat, quis nam locus, & quis ignis sit ipsius purgatorij, dicendum est secundum Theologos præassignatos, quòd locus purgatorij duplex est, Vnus est vniuersalis, scilicet secundum legem communem; & sic locus purgatorij est locus inferior, inferno coniunctus, ita & idem sit ignis, qui damnatos cruciat in loco profundiori, & qui electos, & iustos purgat in purgatorio, qui est locus supra infernum damnatorum. Unde ignis inferni damnatorum distinguitur ab

igne purgatorij solum in æternitate, nam damnatorum ignis est æternus, purgatorij verò ignis, quantum ad effectum purgationis, est temporalis, & solubilis. Alius est locus purgatorij particularis, s. secundum dispensationem Diuinam; & huiusmodi locus variabilis, & multiplex est, in quantum Deus diuersis diuersa loca, secundum suum tributum iudicium. & hoc facit Deus, vel propter eorum celeriores liberationem, vt possint alijs suam indigentiam reuelare, (sicut docet exemplum de Pascafio, quem Cyprianus Episcopus vir Sanctus in quibusdam balneis inuenit, ad quæ iuerat ipse Episcopus consilio medicorum, & Pascafius iam pridem mortuus, ibi puniebatur, & postmodum eius adiutorio liberatus est, signo dato eidem, si post trigessimū diem inueniretur ibidem) vel propter nostram instructionem, vt aliquando recogitemus magnam, post hanc vitam, pœnam peccantibus infligi; & vt, per hanc purgationem particularem, credamus purgatorium vniuersale reperiri, & ibi electos per purgari, qui in hoc mundo non satisfecerunt, sed de hoc mundo cum aliquo reatu, vel veniali culpa decesserunt. Vnde, manifestum est, qd post hanc vitam verè, & realiter reperitur purgatorium, in quo anima iustorum, debitum, per illum ignem, Soluunt, vt possint Deum per essentiam videre, in quâ quidem Dei visione, perfecta hominis beatitudo consistit, vt in superioribus dictum fuit.

Vtrum

Vtrum pœna purgatorij sit maior quacunque
pœna huius vitæ.

R E S O L V T I O.

Dicendum est secundum Th. in 4. sent. dist.
21. Q. 1. art. 1. quod pœna purgatorij est
duplex. Vna damni, in quantum scilicet a-
nimæ illæ retardantur via à diuina visione. Alia
sensus, secundum quod ab igne corporali puniun-
tur; & quantum ad vtrunque, pœna purgatorij
omnem huius vitæ pœnā excedit. Sed prius scien-
dum est, quod quantum ad pœnam damni, animæ
in purgatorio puniuntur, non quia ibi sit priuatio
gloriæ, quæ tollat actum, & potentiam, quam
habent damnati in inferno: sed quia ibi est priua-
tio gloriæ, quæ tollit solum actum, & non poten-
tiam, quia sperant futuram gloriam habere,
quamprimum satisfecerint purgationi. quod autē
hec sit maxima pœna, probatur. Quanto aliquid
magis desideratur, tātō eius absentia est molestior,
sed illud, quod desiderant animæ illæ existentes in
purgatorio, est summū bonum, s. Deus Opt. Max.
ergo absentia actualis Dei nimis erit molesta ani-
mabus illis in purgatorio existentibus. & ideò de
tardatione maximè dolent, quia terminus fruendi
summo bono iam aduenisset, nisi aliquid impedi-
ret. Quantum autem ad pœnam sensus, simili-
ter grauiter, & realiter punitur anima illa, quæ

igni purgatorij est annexa, super naturaliter tamen, quia Deus, tanquam instrumento suæ Divinae iustitiæ, igne per propriam eius actionem, ad purgandas animas, utitur: sicuti etiam aqua baptismi est causa instrumentalis gratiæ. præterea, notandum est, quod anima è corpore non potest pati, nisi ei uniatur modo aliquo, Vnde, quia anima unitur corpori nostro patitur ab eo: afficitur enim lætitiis, & merore ex corpore. sicut ergo anima unitur corpori, tanquam actus ipsum vivificans: ita supranaturaliter anima in inferno inferiori damnatorum & in purgatorio unitur igni, non quod ipsum vivificet, sed quod ab ipso patiatur, & hoc loco detineatur, quod naturaliter ab igne fieri non posset. nonnulli verò alij dicunt, quod ignis potest considerari dupliciter. Vno modo ut res corporea, & hoc modo secundum suam naturam, nullam potest actionem in animam exercere. Alio modo quatenus est instrumentum Dei supranaturaliter operantis, & hoc modo potest agere in spiritum, quemadmodum aqua baptismi causa instrumentalis est gratiæ. Vnde dicendum est, quod quamvis anima in purgatorio realiter pœnam sensus patiatur ab igne, per propriam eius actionem, tamen modo supra naturali, Deus illo utitur igne ad animas electorum purgandas. Si quæratur ulterius, an animæ illæ deducantur ad illum locum pœnarum, ab Angelis, vel à Deo immediate, re-

spōdet

respondet Sanct. Th. quod possibile est, quod eas Angeli boni ad loca pœnarum deducant. dicit possibile, quia potest Deus sua omnipotentia animas immediate tales traducere in purgatorium: sed multo certius, & conuenientius est, quod transferantur per Angelos bonos, per quos subleuantur in Cælum, vt dicit Dom. Sot. in 4. sent. dist. 19. Q. 3. art. 2. quāuis D. Th. dicat probabiliter, quod etiā demones animas deducunt ad pœnarum locum, de quarum visu lætantur. sed dicamus secundum D. Bonau. in 4. sent. dist. 20. art. 1. Q. 5. quod pie credendum est, licet non temere asserendum, quod in egressu animæ à corpore, assistunt & spiritus bonus, & spiritus malus, vnus, vel plures: & si bona est, per ministerium boni Angeli, vel adducitur in Cælum, vel in purgatorium, quousque, postquam purgata fuerit, per eius ministerium educatur, ita quod ipse Angelus solum sit deductor, & non tortor. si verò sit anima mala, per ministerium Demonum deducitur ad infernum, scilicet ad pœnas ignis æterni patiendas. & sic ex prædictis patet, quod pœna purgatorij maior est quacunque pœna huius vitæ, & quod magis rationabile est, animas deduci ad purgatorium per Angelos bonos, quàm per Demones, quia anima viri iusti de illis in hac vita triumphauit.

DE EXTREMA VNCTIONE.

Vtrum extrema vnctio sit Sacramentum.

R E S O L V T I O .

Discendum est secundum D.Th. in 4. sent. distin. 23. Q. 1. art. 1. quòd sic. nam sacramenta Ecclesiæ sufficienter subueniunt defectibus hominum in quocunque eorum statu, sed exeuntibus non subuenit aliud quam extrema vnctio, ergo ipsa est sacramentum. præterea, omnis spiritalis medicina valens ad remissionem peccatorum, est sacramentum, sed extrema vnctio est quadam spiritalis medicina, quæ valet ad remissionem peccatorum, ergo extrema vnctio est sacramentum. minor patet. dicitur enim Iacob. 5. infirmatur aliquis in vobis inducat præbiteros Ecclesiæ, & orent super eum, vngentes eum oleo in nomine Domini, & alleuiabit eum Dominus, & si in peccato fuerit dimittetur ei. in quo etiã ostenditur, duplici ex causa, hoc Sacramentum à Christo fuisse institutum (promulgatum verò à Iacobo, & ab alijs Apostolis) scilicet ad peccatorum remissionem, & ad corporalis infirmitatis alleuiationem. Vnde, constat eum, qui hanc vnctionem fideliter deuoteq; percipit, & in corpore, & in anima alleuiari, in anima quidem per se, in corpore verò per accidens, scilicet si expedit, vt infirmus

in cor-

in corpore alleuietur . patet itaque , quòd extrema vnctio est Sacramentum .

Vtrum hoc Sacramentum debeat iterari .

RESOLVTIO.

Dicendum est secundum D.Th. in 4. sent. dist. 23. Q. 2. art. 4. & Magist. ibidem dist. 23. quòd sic . nam sicuti sacramentum altaris , pœnitentiæ , & coniugij sæpè iterantur : quia sæpè sacramentum corporis percipitur , frequenter pœnitentia agitur , coniugium sæpè contrahitur : similiter etiam extrema vnctio iterari potest , quia sæpè morbus reuertitur . Sacramentum verò baptismi , confirmationis , & ordinationis nullatenus sunt repetenda : quia semel tantum , & non sæpius datur baptismus , confirmatio , & ordinatio . præterea sacramentum , quod habet effectum non perpetuum , potest , sine sui iniuria , iterari : sed sanitas corporis , & mentis , quæ sunt effectus huius sacramenti , possunt amitti , postquam fuerunt per sacramentum effecta , igitur hoc sacramentum sine sui iniuria iterari potest . & sic , omnia clara , & manifesta sunt .

DE ORDINE.

Vtrum ordo sit Sacramentum .

RESOLVTIO.

Dicendum est secundum D.Thom. in 4. sent. distin. 24. Q. 1. art. 1. quòd sic . nam propter

214 **Quæstionum Theologicarum**
quod vnumquodque tale, & illud magis, teste
Philosopho in 1. post. sed propter ordinem fit ho-
mo dispensator aliorum Sacramentorum, ergo or-
do congruentius dicitur sacramentum, quàm alia.
præterea, sacramentum nihil aliud est quàm quæ-
dam sanctificatio homini exhibita, cum aliquo si-
gno visibili: Vndè, cùm in susceptione ordinis,
quædam sanctificatio homini, per visibilia signa,
exhibeatur, constat ordinem esse Sacramentum. &
sic omnia plana sunt.

Vtrum septem sint ordines.

R E S O L V T I O.

Dicendum est secundum Magist. sent. in 4. di-
stin. 24. quòd septem sunt spiritualium offi-
ciorum gradus, siue ordines Ecclesiastici, scilicet
ostiarij, Lectores, Exorcistæ, Acolithi, Subdiacono-
ni, Diaconi, & Sacerdotes, quorum omnia officia,
Christus in semetipso ostendit, & corpori suo, (sci-
licet Ecclesiæ) eosdè ordines observandos reliquit.
Sunt autem septem propter septiformem gratiam
Spiritus sancti, cuius qui non sunt participes in-
dignè ad gradus Ecclesiasticos accedunt: qui verò
priusquàm ad hos ordines accedant, hanc gratiam
habent, in ipsa promotione, ampliorem recipiunt
gratiam. Septem igitur, (vt dictum est) sunt or-
dines Ecclesiastici, quorum figuras, officia, modos
ordinandi, & institutiones facile diligens lector in
4. sent.

4. sent. dist. 24. videre poterit : nam ego huiusmodi rationes, breuitatis causa omitto. Ostiarij enim dicuntur, eo quòd præsunt ostijs Templi, vt dignos recipiant, & indignos excludant. Lectores verò dicuntur à legendo, qui etiam pronuntiatores vocantur, quia tam debet esse clara eorum vox, vt etiam longe positorum aures adimpleat. Exorcistæ autem adiurantes, vel increpantes vocantur : adiurant enim illum, qui spiritum habet immundum, vt in nomine Domini Egrediatur ab illo. Acolythi verò ceroferarij dicuntur, à deportandis Cereis, quando legendum est Euangelium, vel sacrificium offerendum. Subdiaconi autem ideò ita dicuntur, quia subiacent præceptis, & officijs Diaconorum : Diaconi verò dicuntur Ministri, quia sicut in Sacerdote consecratio, ita in Diacono ministerij dispensatio habetur; ad eos enim pertinet assistere Sacerdotibus, & ministrare in omnibus, quæ aguntur in Sacramentis Christi, & eis competit prædicare Euangelium Christi. Presbyter senior dicitur, non modò pro ætate, vel decrepita senectute, sed propter honorem, & dignitatem, quam acceperunt, presbyteri nominantur, qui morum prudentia, & maturitate conuersationis præcellere dicuntur in populo. Præsbyteri etiam Sacerdotes vocantur, quia Sacra dant, vel Sacri duces dicuntur. Sicuti enim Rex à regendo, ita Sacerdos à sanctificando dictus est, consecrat enim, & sanctificat

ficat Corpus Christi. Vnde ad Sacerdotem pertinet Sacramentum Corporis, & Sanguinis Domini Nostri Iesu Christi in altari conficere, orationes dicere, & Dona Dei benedicere. & sic manifestum est, quod septem sunt ordines Ecclesiæ, & non plures, nec pauciores, de quibus, plenior cognitionem habuerit diligens lector in 4. sent. dist. 24. ut dictum est, nam omnia singulariter ibi à Magistro pertractantur.

DE MATRIMONIO.

Vtrum Matrimonium sit Sacramentum.

RESOLUTIO.

Dicendum est secundum D. Tho. in 4. sent. dist. 26. Q. 2. art. 1. quod sic. nam omne remedium contra peccatum institutum est Sacramentum, sed Matrimonium est remedium institutum contra peccatum, ut dicit Apost. 1. ad Cor. 7. propter fornicationem unusquisque suam uxorem habeat, ergo est Sacramentum. præterea, Matrimonio competit generalis ratio sacramenti, quæ est, quod sacramentum est sacræ rei signum, ut dicit Magist. in 1. dist. 4. libri sent. matrimonium enim significat coniunctionem Christi, & Ecclesiæ: Vnde, Apostolus loquens de matrimonio Eph. 5. dicit Sacramentum hoc magnum est, ego autem di-

eo in Christo, & in Ecclesia, ergo Matrimonium verè, & realiter est Sacramentum nouæ legis.

Vtrum matrimonium fuerit ante, vel post peccatum institutum.

R E S O L V T I O.

Dicendum est Secundum Magist. in 4. sent. dist. 26. & Bonau. ibidem, quòd duplex est institutio. Vna ante peccatum ad officium, & hæc facta est in paradiso, vbi erat Thorus immaculatus, & nuptiæ honorabiles, ex quibus sine ardore conciperent, & sine dolore parerent. Altera facta est post peccatum extra paradysum, propter illicitum motum deuittandum. Prima ad effectum naturæ multiplicandæ. Secunda ad remedium concupiscentiæ. item prima fuit in præceptum necessitatis. Secunda fuit voluntaria à tempore multiplicationis generis humani, & est accipienda secundum indulgentiam: indulgentia autem tripliciter accipitur quandoque pro remissione, quandoque pro confessione, quandoq; pro permissione, hic autem pro permissione accipitur: permittitur enim coniugium, non quasi malum, sed quasi minus bonum. Præterea, D. Th. in 4. sent. dist. 26. Q. 2. art. 2. inquit, quòd Matrimonium, in quantum ordinatur ad procreationem prolis, quæ erat necessaria etiam peccato non existente, institutum fuit ante peccatum. Quatenus autem remedium præbet

præbet contra vulnus peccati, institutum fuit post peccatum, tempore legis naturæ. Secundū autem determinationem personarū, institutum fuit tempore legis Mosaycæ. Sed secundum quod representat mysterium coniunctionis Christi, & Ecclesiæ, habuit institutionem in noua lege; & ideo, secundum hoc dicitur Sacramentum nouæ Legis. Unde, manifestum est, quod & ante, post peccatum, Matrimonium institutum fuit, diuersimodè tamen, vt dictum est.

Vtrum consensus per verba de præsentī expressus, sit causa efficiens matrimonij.

R E S O L V T I O.

Dicendum est secundum Magist. in 4. sent. dist. 27. & D. Th. ibidem Q. 1. art. 2. & Dur. ibidem. Q. 1. quod solus consensus per verba de presenti expressus matrimonium facit, vt ego accipio te in virum, & ego te in uxorem. Si verò consentiant mente, & non exprimant verbis, vel alijs certis signis, tunc talis consensus occultus non facit matrimonium. quod autem hoc verum sit, probatur sic: Matrimonium Sacramentum quoddam est; sed in omni Sacramento requiritur aliquod sensibile signum, ergo & in matrimonio, & ita oportet ibi saltem esse verba, consensum sensibilibiter exprimentia. Unde, (vt etiam dicitur 27. Q. 2. c. sufficiat) manifestum est, quod
solus

Solus consensus per verba de presenti expressus matrimonium facit. quod quidem matrimonium, secundum Mag. est viri, & mulieris maritalis coniunctio inter legitimas personas indiuiduam vite consuetudinem retinens.

Vtrum Matrimonium per verba de futuro, sit verum, & ratum Matrimonium.

R E S O L V T I O.

D*icendum est secundum Magist. in 4. sent. dist. 28. & D. Bonau. ibidem art. 1. Q. 1. quod consensus non facit matrimonium, nisi exprimatur per verba de presenti, vt dictum est. si enim exprimatur per verba de futuro, in rei veritate non est consensus sed promissio de consentiendo: ideò qui dicit se consentire, non dum consentit, sed se consensurum promittit: Vnde, cum ibi non sit consensus, ergo nec matrimonium, sed vel obligatio, vel sponsalia dici debent. præterea, extra de sponsalibus. c. si inter virum, habetur, qd si inter aliquos verba interuenerint de futuro, utroque dicente alteri: ego accipiam te in meam, & ego accipiam te in meum, vel similia verba: si alter postmodum cum altera per verba de presenti contraxerit, non debent separari, etiam si inter ipsam, & primum iuramentum interuenerit, sed de fide mentita ei est pœnitentia iniungenda. & ideò hinc elicimus, quod iuramentum non est de sub-*

220 *Quæstionum Theologicarum*
substantia matrimonij, vt etiam dicitur à Magist.
loco citato. patet igitur, quòd Matrimonium per
verba de futuro non valet, nisi subsequatur con-
sensus de præsentì.

Vtrum fides, proles, & sacramentum sint
tria bona coniungij.

R E S O L V T I O.

D*icendum est secundum Magist. in 4. sent.*
dist. 31. & D. Th. ibidem Q. 1. art. 2. &
Bonau. ibidem art. 1. Q. 1. q. fides proles,
& sacramentum sunt verè tria bona matrimonij.
in fide enim attenditur, ne post vinculum coniu-
gale cum alio, vel cum alia coeatur. in prole, vt aman-
ter suscipiatur, & religiosè educetur. in Sacramen-
to autem, vt coniugium non separetur, nam ex a-
liqua causa separatur corporaliter, nunquam ta-
men Sacramentaliter. & sic patet, quòd fides,
proles, & Sacramentum sunt tria bona coniugij.

Vtrum error impediat matrimonium.

R E S O L V T I O.

D*icendum est secundum Magist. in 4. sent.*
dist. 30. & D. Th. ibidem Q. 1. art. 2. quòd
error est quadruplex, primus est error personæ,
quando s. hic putatur esse Antonius, & est Pau-
lus. secundus est error conditionis, quando s. puta-
tur esse liber, qui seruus est. Tertius est error fortu-
ne,

na, quando scilicet putatur hic esse diues, qui pauper est, vel è conuerso. Quartus verò est error qualitatis, quando. s. creditur esse bonus, qui malus est, vel pulcher, qui deformis. & ideò non omnis error impedit matrimonium, sed tantum primi duo, s. personæ, & conditionis. ratio est, quia matrimonium duo includit, scilicet personas, quæ coniunguntur, & mutuam potestatem ad inuicem, in qua matrimonium consistit: primum igitur tollitur per errorem personæ: secundum verò per errorem conditionis, quia seruus non potest potestatem sui corporis alteri tradere sine consensu Domini sui: & propter hoc, hi duo errores matrimonium impediunt, & non alij.

Vtrum post consensum legitimum de præfenti, licitum sit alteri, altero inuito, eligere monasterium.

RESOLVTIO.

D*icendum est secundum D. Th. in 4. sent. dist. 27. Q. 1. art. 3. & Dom. Sot. ibidem Q. 1. art. 4. quòd ante matrimonij consummationem utriusque coniugum altero inuito, licitum est ad religionem transire; ratio huius est, quia ante copulam carnalem est inter coniuges tantum vinculum spirituale, sed postmodum est inter eos etiam vinculum carnale: & ideò sicut post carnalem copulam, matrimonium per carnalem soluitur morte:*

ita similiter per ingressum religionis, ante copulã
 carnalem, matrimonium per spirituales soluitur
 mortem, nam religio est mors quædam spiritualis,
 qua aliquis sæculo moriens, viuit Deo. & hoc cõ-
 firmatur per D. Bonau. in 4. sent. dist. 27. art. 3.
 Q. 2. & per capit. Verum, de conuers. coniug.
 quo in loco habetur, quòd si aliqui per consensum
 mutuum de præsentì matrimonium contraxerint,
 antequam sint carnaliter coniuncti, potest alter
 religionem intrare, altero inuito: & ille qui re-
 mansit in sæculo poterit matrimonium contrahe-
 re, cùm non dum sint vna caro effecti. sed posset
 quispiam in contrarium opponere per illud Diui-
 num præceptum, Quos Deus coniunxit homo non
 separet, ergo post consensum legitimum de præ-
 senti, matrimonium solui non potest: ad quod re-
 spondetur, quòd illud dictum Diuinum, scilicet
 Quos Deus coniunxit homo non separet, commu-
 niter debet intelligi de matrimonio consumato,
 eo quòd per copulam fiunt duo in carne vna. sed
 melius dicendum est, quòd per ingressum religio-
 nis matrimonium non separatur ab homine, sed à
 Deo, per internam inspirationem, nam etiam re-
 ligio est quodammodo quoddam spirituale vincu-
 lum coniugale. Vnde, quamuis ante consuma-
 tionem sit verum matrimonium Sacramentale,
 & indissolubile per homines, est tamen solubile Dei
 instinctu, nam propter maius bonum potest quili-
 bet

bet minus bonum derelinquere. patet igitur, q̄ ante matrimonium consummatum, potest alter coniugum, etiam altero inuito, religionem ingredi, & remanens in seculo poterit matrimonium contrahere, vt dictum est.

Vtrum alter coniugum, etiam post carnalem copulam, possit ingredi religionem.

R E S O L V T I O.

D*Icendum est secundum D. Tho. in 4. sent. distin. 27. Q. 1. art. itidem. 3. quod sic, sed de mutuo consensu. nam nullus potest facere obligationem Deo de alieno: sed cum per matrimoniū consummatum iam sit corpus viri factum uxoris, non potest, absque consensu ipsius, Deo ipsum offerre per votum continentie: nam, (vt dicit Apost. 1. ad Cor. 7.) Mulier sui corporis potestatem non habet: sed Vir. similiter autem & vir, sui corporis potestatem non habet: sed mulier. præterea, extra de conuers. coniug. c. cum sis, habetur similiter, q̄ post consensum, & copulam carnalem nec vir, nec uxor potest religionem ingredi, nisi ambo Deo seruire velint, si autem mulier fuerit senex, & castitatē promiserit, poterit vir ad religionem transire, uxore in seculo remanente. patet itaque, quod alter coniugum, simpliciter loquendo, post carnalem copulam, sine reliquo ad religionem transire non potest.*

Quæstionum Theologicarum
DE RESURRECTIONIS, ET IV-
DICII CONDITIONE.

Vtrum resurrectio generalis omnium homi-
num sit futura.

R E S O L V T I O.

Dicendum est secundum Mag. sent. in 4. di-
stin. 43. & D. Th. ibidem. Q. I. art. I. & Bo-
nauent. ibidem art. itidem. I. Q. I. & Sco-
tum, loco citato. Q. I. quod, resurrectionem carnis
generalem esse futuram omnium quicumque nati
sunt, atq; nascentur, & mortui sunt, & morien-
tur, nullatenus ambigere debet Christianus. ait. n.
Apost. I. ad Cor. 15. omnes resurgemus. & supra
in eodem capit. Sicut in Adam omnes moriuntur:
ita & in Christo omnes viuificabuntur. & I. ad
Thessalonic. 4. Nolumus vos ignorare, fratres, de
dormientibus, ut non contristemini, sicut & cete-
ri, qui spem non habent, scilicet resurrectionis. si
enim credimus, quod Iesus mortuus est, & resur-
rexit, ita & Deus, eos, qui dormierunt per Iesum
adducet cum eo. Vnde sicuti credimus, qd Chri-
stus, qui est caput, tertia die resurrexit, similiter
credere, & affirmare debemus, quod, & nos, qui
sumus membra ipsius Christi, resurgemus. præte-
rea, membra debent esse capiti conformia, sed ca-
put nostrum viuit, & in æternum viuet, in corpo-
re, &

re, & anima, quia Christus resurgens ex mortuis, iam non moritur, vt pat. Rom. 6. ergo etiam homines, qui sunt eius membra in corpore, & anima viuent, & aeternaliter manebunt. & per consequens, oportet generalem carnis resurrectionem esse futuram, vt dictum est.

Vtrum possit idem homo resurgere.

R E S O L V T I O.

Dicendum est secundū Dur. in 4. sent. dist. 43. Q. 1. quod non solum possibile est, quod homo idem numero resurgat, sed etiam hoc erit in rei veritate; (vt in alia Quaestione ostendam, quæ erit de facto, nam impræsentiarum tantum loquor de possibili, quia hoc videtur esse præter ordinem naturæ) quod igitur hoc sit possibile, probatur sic. manentibus principijs essentialibus rei corruptæ, scilicet materia, & forma eisdem secundum numerum, & agente, quod potest illa vnire, possibile est rem corruptam eandem numero reparari, sed corrupto homine remanent principia essentialia eiusdem hominis eadem, scilicet materia, & forma, & Deus, qui potest illa vnire, ergo Homo corruptus potest idem in numero reparari. præterea, Deus potest omne, quod non implicat contradictionem, formam autem vniri materiæ non implicat contradictionem, imò habet magnā aptitudinem, cū forma sit de se nata perficere materiam, &

materia sit de se nata perfici à forma, ergo Deus Opt. Max. potest eundem hominem in eadem anima, eodemq; corpore viuificare, & per consequens idem homo resurgere potest. minor primæ rationis probatur, quia corrupto homine remanet materia, quæ (vt dicit Arist) est ingenerabilis, & incorruptibilis, & anima rationalis, quæ est incorruptibilis, & sola forma hominis substantialis, ergo &c. Secunda ratio de se manifestissima est. quòd autem anima nostra rationalis sit incorruptibilis, & immortalis, patet, quoniam differt ab animabus brutorum, & ab alijs formis corporalibus. Anima enim nostra non generatur ad generationem hominis, sed creatur, quia non educitur de potentia materiæ; reliquæ verò cùm educantur de potentia materiæ, licet non generentur, tamen congenerantur ad generationem suppositi, & pariter corrumpuntur ad corruptionem illius. quòd animæ brutorum educantur de potentia materiæ, patet per illud gen. producat terra animam viuentem. quòd nostra similiter non educatur de potentia materiæ patet similiter per illud gen. & inspirauit in faciem eius spiraculum vitæ. patet igitur, quòd potest idem homo resurgere, & per consequens resurget, vt infra patebit.

Vtrum resurrectio sit naturalis, vel supernaturalis.

R E S O L V T I O.

Dicendum est secundum D. Bonau. in 4. sent. dist. 43. art. 1. Q. 5. quod in resurrectione tria considerata sunt. primum est corporis ex pulueribus reformatio. secundum, animæ unio ipsi corpori reformato. Tertium verò est animæ, & corporis inseparabilis colligatio. primum est contra naturam, id est contra solitū cursum naturæ, quæ potest perfecta destruere, non autem destructa reparare. secundum est secundum naturam, quod anima scilicet corpori sibi organizato, cui desiderabat uniri, uniatur. Tertium est supra naturam, scilicet quod compositum corruptibile fiat immortale, & incorruptibile, & inseparabile. sed quia primum, & ultimum est supra naturam, secundum verò naturale, dicendum est, quod simpliciter resurrectio erit supernaturalis, secundum quid verò naturalis. vel dicamus secundum Scotum in 4. sent. dist. 43. Q. 4. quod resurrectio potest considerari dupliciter. Vno modo ex parte passi, vel recipientis. & sic resurrectio erit naturalis, quia materia naturalem habet inclinationem ad recipiendam quamcunq; formam: Vnde nota, quod naturale tripliciter capitur. Vno modo, scilicet ut contradistinguitur ab agente supernaturali. Secun-

do, ut distinguitur contra agens secundum propositum, id est contra agens liberum, quod agit secundum voluntatem. Tertio modo capitur naturale, ut distinguitur contra violentum, & sic respicit passum, puta ipsam materiam. natandum est ulterius; quod omne agens supernaturale est etiam agens secundum propositum, cuiusmodi est Deus, sed non è contra omne agens secundum propositum est agens supernaturale, quia homo est agens liberum, non tamen supernaturale: Quando igitur dicebatur quod resurrectio est naturalis, accipiebatur naturale tertio modo, scilicet ut opponitur violento, quia tale passum ad talem formam naturaliter inclinatur. Alio modo considerari potest resurrectio ex parte agentis. & sic simpliciter erit supernaturalis, quia fiet ab agente supernaturali, & libero nempe à Deo Opt. Max. qui vivificabit mortalia corpora nostra. patet igitur, quod resurrectio simpliciter erit supernaturalis, secundum quid autem erit naturalis, ut dictum est.

Vtrum omnes mortui resoluantur in cineres, antequàm resurgant.

R E S O L V T I O.

Dicendum est secundum D. Tho. in 4. sent. distin. 43. Q. 1. art. 4. & Dom. Sot. ibidem. Q. 2. art. 5. quod cuncta humana corpora omnino vsq; ad elementa resolventur. Ad cuius probationem præsup-

præsupponere debemus hominem constare ex anima, & corpore. corpus verò ex ossib⁹, nervis, &c. quæ sunt partes diuersarum rationum, ac demum partes illæ constant ex elementorum commixtione; & cum hoc verum sit. debemus primò dicere, qd homo moritur, iuxta illud Apost. Statutum est hominibus semel mori, qui quidem homo moritur per separationem animæ à corpore, quod restat, vt cadauer, mox per plurimas transmutationes, tandem resoluitur in elementa, quia, vt 3. physic. habetur, quicquid ex contrarijs constat, in ea tandem reducitur. confirmatur etiam hoc, per illud gen. terra es, & in terram ibis: omnes ergo mortui resoluentur in cineres, antequam resurgant. Vndè, colligitur, quòd ex debito iustitiæ, in pœnam originalis culpæ, non tantum mors nobis decreta est, quæ est animæ à corpore separatio, verum & corporis resolutio vsq; ad terram, & alia elementa, ex quibus commixtum est. præterea, in 8. physic. habetur, quòd motus Cæli est vt vita quædam omnibus natura existentibus, sicuti etiam motus cordis totius corporis quædam vita est; Vndè sicut cessante motu cordis omnia membra mortificantur, ita cessante motu Cæli, non potest aliquid viuum remanere in illa vita, quæ ex influentia illius motus conseruabatur: & ideo oportet quòd ex hac vita discedant, qui post motum Cæli quiescentem victuri sunt. Resoluentur ergo omnes in præia-

centem materiam, præter Christum, qui ut nullo fuit attactus peccato, ita nec ulli fuit peccati legi obnoxius: & præter illos, qui illo privilegio dotati sunt, ut non incinerarentur, cuiusmodi Enoch, & Elia indultum fuit, & Deiparæ virgini pie creditur etiam concessum, quæ nec veniale, nec mortale peccatum habuit ex speciali privilegio, nec originale contraxit, ut volunt Scotistæ, qui dicunt ipsam fuisse speciali privilegio præservatam; quamvis aliter sentiant Thomistæ, qui dicunt ipsam virginem, operatione Spiritus Sancti, ab originali culpa fuisse mundatâ. Sed posset quis (non recedendo à Quæst.) dubitare de illis, qui viui reperiuntur in fine mundi, an in pulveres resoluantur, ad quod respondeo secundum D.Th. loco citato in respons. ad 3. secundæ Quæst. quod ille ignis, qui faciem mundi purgabit, poterit statim corpora illorum, qui viui inuenientur, usque ad cineres resolvere, sicuti etiam alia mista resolvet in præiacentem materiam; ratio debet esse ista, quoniam secundum sacram scripturam omnes debent resurgere, resurrectio autem propriè non est nisi eius, quod cecidit, & dissolutum est, ergo dicendum est, quod omnes resoluendi sunt in cineres, antequam in iudicium resurgant.

Quæritur

Quæritur quomodo intelligatur Christus Index viuorum, & mortuorum.

R E S O L V T I O.

Dicendum est secundum Magist. in 4. senten. 43. quòd hoc dupliciter intelligi potest, vel corporaliter, vel spiritualiter: si corporaliter, tunc viui accipiuntur qui in aduentu eius viui reperiuntur, quamuis in raptu moriantur. & mortui accipiuntur, qui ante decesserant: si autem spiritualiter intelligatur, tunc per viuos, & mortuos debemus intelligere iustos, & iniustos. & meo iudicio, puto, quòd illud dictum debeat hoc secundo modo intelligi. s. spiritualiter: ratio potest esse ista, quia, (vt dictum est) omnes morientur, antequàm in iudicium resurgant, ergo non iudicabuntur viui, antequàm moriantur, & iterum resurgant. per viuos igitur debemus intelligere illos, qui iudicabuntur ad vitam æternam; isti enim propriè dicuntur viuere. per mortuos verò similiter debemus intelligere illos, qui s. in ignem æternum iudicabuntur, quia verè erunt mortui æterna morte, quæ quidem mors nihil aliud est, nisi priuatio luminis gloriæ æternæ, quam peccatores in igne æterno æternaliter habebunt.

Vtrum

Vtrum idem prorsus homo in eodemq; corpore, quo vixerat, sit resurrecturus.

R E S O L V T I O.

Dicendum est secundum. D.Th.in 4.sent.dist.
 ipse 44. Q.I. art.I. & Dom. Sot. ibidē. Q.I.
 art.I. q. idē homo, qui per mortem cecidit est in vi-
 tam resurrecturus. Hæc conclusio, non tantum sco-
 lastica est, sed tanquam articulus fidei constitui-
 tur. idem enim articulus, quem de resurrectione
 confitemur, intelligitur de resurrectione eiusdem
 hominis. si enim non idem Lazarus, qui obierat,
 resurrexisset, illa non fuisset Lazari resurrectio,
 sed substitutio vnius pro alio, quod omnino fal-
 sum est. dicit enim Iob 19. Scio quod Redemptor
 meus viuit, & in nouissimo die de terra resurre-
 cturus sum, & rursum circumdabor pelle mea, &
 in carne mea videbo Deum. Quo circa, (vt dicit
 Th.) qui eundem hominem resurrecturum negat
 hæreticus est censendus, ac si resurrectionem diffi-
 teretur. præterea, si ad finem, ad quem homo fa-
 ctus est, peruenire non posset, frustra esset homo
 factus; Deus autem nihil frustra facit: igitur o-
 portet quod idem homo numero resurgat, & con-
 sequenter ad finem perueniat, propter quem fa-
 ctus est: & hoc quidem fit dum eadem anima nu-
 mero eidem corpori numero coniungitur, aliàs e-
 nim non esset propriè resurrectio, nisi idem homo
 repara-

repararetur. Vndè, penitus, & ex necessitate dicere debemus, & firmiter credere, quòd idem prorsus homo numero, in eodem s. corpore numero & anima eadem numero resurrecturus sit.

Vtrum omnes in ætate Iuuenili resurgent.

R E S O L V T I O.

Dicendum est secundum Magist. in 4. sent. dist. 44. & D. Thom. ibidem Q. 1. art. 3. & Dom. Sot. ibidem art. 4 quòd omnes in eadem ætate resurgent, in qua Christus mortuus est, & resurrexit, scilicet in ætate iuuenili, ad quam Christus peruenit. Triginta enim trium annorum, & trium mensium erat ætas Christi. Mensuram verò corporis suam recipiet vnusquisque, quam vel habuit in iuuentute, etiam si senex obiit, vel fuerat habiturus, si ante est defunctus. Vndè, homo resurget absque omni defectu humanæ naturæ: quia sicut Deus humanam naturam absque omni defectu instituit, similiter sine defectu reparabit. deficit autem humana Natura dupliciter. Vno modo, quia non dum perfectionem ultimam est consecuta. Alio modo, quia ab ultima perfectione iam recessit. primo modo deficit in pueris. Secundo verò modo deficit in senibus: & idè in vtrisque reducetur humana natura, per resurrectionem, ad statum ultimæ perfectionis, qui est in iuuenili ætate, iuxta illud Apost. ad Ephes.

ad Ephes. 4. Donet occurramus omnes in virū perfectum in mensuram ætatis plenitudinis Christi. & sic patet, q̄ omnes in ætate iuuenili resurgent.

Vtrum animabus, post mortem, receptacula sint assignanda.

R E S O L V T I O.

Dicendum est secundum D. Th. in 4. sent. dist. 45. Q. 1. art. 1. 2. & 3. & Dom. Sot. ibidē Q. 1. art. 1. & 2. quod Quinque ab orbe condito fuerunt animarum receptacula: scilicet Cælū Empyreū, infernus, purgatorium, limbus puerorum, & limbus patrum. in primo receptaculo, reperitur summa fœlicitas, & summa beatitudo. in secundo, æterna pœna ignis, & Damni. in Tertio verò, pœna ignis temporalis, & damni, sed solubilis. in Quarto autem reperitur pœna Damni æterna, scilicet priuatio visionis Diuinæ, quæ ibi tollit actū, & potentiam. in Quinto, & vltimo receptaculo, reperiatur tantū pœna Damni solubilis. primum ergo receptaculum, quod est Cælum Empyreum, fuit, est, & erit post iudicium vniuersale. Secundum verò, quod est infernus Damnatorum, fuit similiter, est, & erit post iudicium. Tertium, quod est purgatorium etiam fuit, est, sed non erit post iudicium vniuersale. Quartum autem, quod est limbus puerorum, similiter fuit, est, & erit post diem iudicij. Quintum verò receptaculum, quod

quod est limbus patrum, fuit ante aduentū Christi, sed non est, nec erit amplius, quoniam per Christi descensum ad inferos, solutum fuit. Si autem nos finem, ad quem Angeli, & homines creati sunt, contemblemur, non nisi vnicum receptaculū omnibus proposuit: nempe Cælum: Nam has duas creaturas eo fine condidit, vt suam ipsius fælicitatem eis in Cælo impertiret, sed tamen per occasionem si fortè à sua lege, & voluntate deniarent, infernum præparauit, in quo mali igne puniuntur æterno. & quoniam Angelus primus fuit transgressor, ideò Deus ignem æternum, ab initio mundi, paratum esse voluit Diabolo, & Angelis eius: (eo quòd peccatum Angelorum irremediabile fuit, vt dicit Magist. in 2. sent. dist. 21.) Homines verò adulti si sine pænitentia decedunt, etiam ipsi in illum ignem æternum descendunt. Sed si homines peccauerint, & egerint pænitentiam, poterunt sine dubio illum cauere locum. Duo ergo hac sunt extrema receptacula, alterum summa fælicitas, alterum verò summa miseria plenum. peccatum verò primorum parentum tria nobis ostendit alia receptacula media. nam cum post illam prauaricationem cuncti mortales cum peccato originali nascantur, neque vlli vnquam, nisi per fidem Christi, patuerit salus, necesse est, vt paruuli extra vsum. s. rationis existentes, neque in consortium filiorum Dei admittantur, neque
verò

verò, cum nullum actuale crimen commiserint, inter summos eius inimicos deputentur; sed si olim moriebantur sine fide, ut in statu naturæ, vel sine circumcissione, ut in statu legis, vel sine baptismo, ut in statu præsentis, ad limbum determinati sunt. in quo limbo (ut dictum est) reperitur privatio luminis gloriæ æternæ, quæ alio modo vocatur pœna Damni, non autem reperitur ibi pœna sensus, scilicet ignis inferni: & hoc rationabiliter, cum parvuli non habeant peccatum ex se, sed à primis parentibus decisum, s. ex necessitate in ipsis (licet in primis parentibus fuerit voluntarium) non autem ex voluntate eorum libera, cum careant liberi arbitrij usu. Rursus, quia ingressus Cœli nemini conceditur, nisi purgata sit quacunque macula, vel reatus pœnæ, vel venialis culpæ, sit, ut non solum inimici Dei ab introitu Cœli prorsus excludantur: verum & amici, dum per purgantur, remorentur; quibus ideo purgatorij locus assignatus est, in quo quidem purgatorio tantum pœna sensibilis reperitur, cum spe videndi Deum. Tandem cum ante peractam per Christum redemptionem, nemini apertum esse potuerit Cælum, adhibitum est Quintum receptaculum, in quo, Patres olim, qui saluabantur, recipiebantur, quod quidem receptaculum. & sinus Abrahæ, & limbus patrum appellabatur; nam quatenus Sancti patres certa spe recreabantur possidendæ regni hæreditatis,

zis, sinus Abrahæ appellabantur; inquantum verò aliquid eis actu requiei deerat, (quia nondum visione Dei fruebantur) dicebatur limbus inferni. post Christi verò mortē, resurrectionē, & ascensionē sinus Abrahæ Cælestis Paradisus est. præterea, notandum est q̃ patres fuerunt in parte superiori, & paruuli sunt in parte inferiori: nam limbus puerorum est inferior locus subterraneus, limbus verò patrum erat locus superior; & ratio huius est, quia paruuli habent carentiam visionis Diuinæ sine expectatione, patres verò habebant illam cum expectatione, & ideò debuit ille esse limbus in parte superiori. patet igitur, quòd infernus Damnatorum infimus omnium est, in quo adest & pœna sensus, scilicet ignis æternus, & pœna damni, scilicet priuatio gloriæ æternæ. purgatorium verò est superius illi coniunctum, in quo adest pœna sensus temporalis, sed non pœna damni simpliciter, sed solum secundum quid, inquantum. s. animæ illæ, in purgatorio existentes, retardantur à Diuina visione, propter aliquem reatū, qui per illum ignem soluitur. Vndè, notandum est, quòd idem est ignis, qui peccatores æternaliter cruciat, & qui electos temporaliter purgat, ut supradictum est. limbus autem puerorum, proximè superior est, & iste includit tantum pœnam damni æternam, sed non sensus. limbus verò patrum fuit locus supremus, in quo reperiebatur pœ-

na Damni, scilicet carentia visionis Diuinæ cum expectatione, sed non pœna sensus, nempe ignis corporalis. & sic, de receptaculis animarum dicta sint satis.

Vtrum statim post mortem, animæ deducantur ad Cœlum, vel ad infernum.

R E S O L V T I O.

D*icendum est secundum D. Th. in 4. sent. dist. 45. Q. 1. art. 1. quòd sic. nam sicuti in corporibus est gravitas, vel leuitas, qua feruntur in locum suum, qui est finis motus ipsorum: ita etiã similiter est in animabus nostris meritum, vel demeritum, quibus animæ perueniunt ad præmium, vel ad pœnam, quæ sunt finis actionum ipsarum: Vnde sicuti corpus per gravitatem, vel leuitatem, statim fertur in locum suum, nisi prohibeatur; ita statim animæ, soluto vinculo carnis, per quod in statu viæ detinebantur, præmium consecuntur, vel pœnam, nisi aliquod impedimentum reperia-
tur: sicuti interdum impedit cōsecutionem præmij, peccatum veniale, vel aliquis reatus, qui prius purgari debet in igne purgatorij, ex quo sequitur quòd præmium differatur. & quia locus deputatur animabus secundum congruentiam præmij, vel pœnæ, statim vt anima à corpore absoluitur, vel in infernum demergitur per culpam mortalem, vel in Cœlum euolat per gratiam, nisi impediatur ali-
quo*

quo reatu, quo oportuit euolutionem differri, ut prius anima purgetur. & sic manifestum est, quod finaliter post mortem, animæ deducuntur ad Cælum, vel ad infernum.

Vtrum ignis inferni sit corporeus.

R E S O L V T I O.

D Icendum est secundum Magist. in 4. sent. dist. 44. & Th. ibidem Q. 3. art. 2. & D. Bonauent. ibidem, & Dur. loco citato, quod ignis inferni est corporeus, nam ut dicitur Sap. II. per quæ quis peccat, per hæc & torquetur: sed omnes homines peccant per res corporeas, & sensibiles huius mundi, ergo iustum est, ut per easdem puniantur. præterea, pæna reproborum debet proportionabiliter respondere præmio bonorum, sed beati non solum præmiabuntur in anima, sed etiam in corpore; ergo mali non solum in anima, sed etiam in corpore punientur; sed ignis nisi esset corporeus, non affligeret corpora Damnatorum: ex quo ergo ignis necessario ponitur per auctoritatem scripturæ, qui cruciabit damnatos, conuenientius est ponere ipsum esse corporeum, (cùm talis ignis ex se habeat corpus sensitivum affligere) quàm fingere nouum ignem incorporeum, & nouam afflictionem. Vltèrius, oppositorum eadem est scientia, sicuti ergo illud Mat. 25. Venite benedicti patris mei & c. ad literam intelligitur; ergo similiter illud, quod

sequitur, nempe *Ite maledicti in ignē aternū, &c.* debet ad literam intelligi; igitur ignis inferni est corporeus; & secundum quod dicit Dom. Sot. in 4. Sent. dist. 45. Q. 1. art. 1. ille ignis non est purè elementarius, sed sulphure mistus multoque ardentior nostro, propter terram, qua vndique cingitur, nec nutritur consumptibili esca, quoniam nec animas nunc, nec corpora tunc consumet. & ibi manet non per naturam, sed diuinitus per ordinem diuinæ iustitiæ tenetur. patet itaq; qd ignis inferni est corporeus. & eiusdem speciei cum isto quem videmus: quamuis materia sit fortè diuersa, vt dictum est; qui quidem ignis est aternus, i. perpetuò crucians, Vndè nulla est redemptio.

Vtrum animæ separatae igne illo inferni torqueantur.

RESOLVTIO.

Dicendum est secundum D. Th. in 4. sent. dist. 44. Q. 3. art. 3. & Dominic. Sot. ibidem dist. 50. Q. vnic. art. 2. quòd sic nam eadem est de animabus ratio, quæ de dæmonibus, demones autem ab illo igne patiuntur, à quo sunt passura Damnatorum corpora post resurrectionem, iuxta illud Mat. 25. *Ite in ignem aeternum, qui paratus est Diabolo, & Angelis eius*, ergo & animæ patiuntur ab illo. præterea, pœna debet respondere culpæ: sed anima per culpam, corpori se subiecit per

per prauam concupiscentiam, ergo iustum est, ut in pœna, rei corporeæ. s. igni inferni subiiciatur per passionem. Sed Quæritur hic quomodo anima vniatur igni. dicamus, quod anima vnitur illi igni corporeo nõ tanquàm actus primus. s. non tanquàm forma ipsum viuificans, ut ex ambobus fiat vnum viuens, quo pacto neque demon, neque humanus spiritus corporeo igni vniri valet, sed ut mouens mobili; Vndè ille ignis inferni hoc virtute Dei habet, cuius est instrumentum, ut perinde velut ergastulum animas teneat, & coerceat, quamuis ab eis non informetur, ut corpus tenet animam, qua animatur. & hoc modo anima cruciatur ab illo igne per propriam eius actionem. supernaturaliter tamen, quia Deus tanquàm instrumento suæ Diuinæ iustitiæ, illo vtitur igne ad cruciandos Demones, & animas impiorũ. patet itaq; qd sicuti anima vnitur corpori tanquàm actus ipsum viuificans: ita supernaturaliter anima in inferno vnitur igni, non quod ipsum viuificet, (ut dictum est) sed quod ab ipso patiat, & hoc loco detineatur, quod naturaliter ab igne fieri non posset: nam licet spiritus definiatur loco, non tamen naturaliter ei subditur, ut vi detineatur ab illo, sed patitur ab illo igne, tanquàm instrumento Dei, & similiter ibi diuinitus detinetur, ne exire possit. Vndè manifestum est quod in igne infernali detinentur animæ damnatæ, & Angeli damnati, quæ

ti, quæ animæ, & qui Angeli ab illo igne corporeo realiter cruciantur, qui ignis essentialiter est detentus, & conseruatus à Deo in Centrum terræ, vt superius dictum fuit.

Vtrum iudicium vniuersale sit futurum.

R E S O L V T I O .

Dicendum est secundum Tho. in 4. sent. dist. 47. Q. 1. art. 1. & Scotum ibidem Q. 1. & alios Doctores, quòd Catholicè, & firmiter tenendum est, in seculi consumatione venturū esse Christum, qui generali iudicio iudicaturus est viuos, & mortuos: & qui hoc negat hæreticus est censendus. dicitur enim Ioan. 5. procedent, qui bona fecerunt, in resurrectionem Vitæ, qui verò mala egerunt, in resurrectionem iudicij. & Matt. 25. congregabuntur ante eum omnes gentes, & separabit eos ab inuicem, sicut pastor segregat oves ab hædis: & Statuet oves quidem à dextris suis, hædos autem à sinistris, s. bonos à dextris, malos autem à sinistris. & Isaia 3. Dominus ad iudicandum veniet cum senioribus populi sui. & Ioel. 3. congregabo omnes gentes, & deducam eos in vallem Iosaphat, & disceptabo ibi cum eis. pro cuius euidentia sciendum est, quòd duplex est iudicium, quo homo iudicatur. Vnum s. particulare, in quo iudicatur secundum opera sua. de quo, Apocalyp. 14. opera illorū sequuntur illos. Aliud est

est vniuersale, de quo fit mentio in Ioel. 3. congregabo omnes gentes, &c. Si quis verò vestrum obijceret, dicendo, quòd Deus non iudicat bis in idipsum, vt dicitur Naum. 1. respondeo, quòd omnipotens Deus in iudicio bis non iudicat hominem: si enim punit animam in morte, non punit totum hominem; quia anima non est homo, sed pars hominis. ideò cùm totus peccauerit corpore, & anima, totus puniendus est, aut præmiandus, quòd erit in iudicio vniuersali. & dicitur vniuersale, quia bonos, & malos iudicabit, corpus & animã simul. nunc autem dicitur particulare, quia animæ particularium hominum iudicantur solùm secundum animam, non autem secundum corpus: nec tamen (vt dictum fuit) Deus bis iudicat in idipsum, quia, (vt ait Th.) non duas pœnas pro vno peccato infert, sed pœna, quæ ante iudicium completè inflicta non fuerat, in iudicio vltimo, & vniuersali complebitur. & sic impij in illa Die iudicabuntur, & peribunt quo ad corpus, & animam simul: boni verò præmiabuntur similiter in corpore, & anima simul. Vnde, boni audient illam sententiam dulcissimam. Venite benedicti patris mei percipite Regnum &c. Mali verò illam amarissimam. Ite maledicti in ignem æternum. Iudicio tamen discussionis neq; omnes electos, neque verò cunctos reprobos opus erit iudicare. præterea, cùm duæ sint iudicandorum partes electorum scilicet,

& reproborum, bini ordines in singulis continentur, vt quatuor resultent ordines. Alij enim iudicantur, & pereunt, nempe iniqui Christiani, quibus dicitur. Esuriui, & non dedistis mihi manducare, &c. Alij iudicantur, & Regnant, vt boni Christiani, quibus dicitur. Esuriui, & dedistis mihi manducare, &c. Alij non iudicantur, & pereunt, nempe infideles, quibus ait Christus. qui non credit, iam iudicatus est. Alij verò non iudicantur, & regnant, vt qui non solum, quòd Lex præcipit, implere contenti sunt, sed, & quòd ad perfectionem consulitur, adhibere student. De quibus Proph. ait. Dominus ad iudicandum veniet cū senatoribus populi sui. Iudicium autem vniuersale, in valle Iosaphat futurum existimatur; ait enim Propheta Iohel. 3. congregabo omnes gentes, & deducam eos in vallem Iosaphat, &c. Unde Dominus apparebit ad iudicandum in forma humana, sed tamen dotibus gloriæ fulgentissima. & boni formam serui, & formam Dei conspiciēt. iniqui verò formam serui tantum; ratio est, quia mali non sunt mundi corde. patet igitur, quòd iudicium vniuersale futurum verè est.

Vtrum mundus sit innouandus.

R E S O L V T I O.

Dicendum est secundum. D. Tho. in 4. sent. dist. 48. Q. 2. art. 1. quòd mundus sine dubio

bio innouandus est, vt perpetuò maneat innouatus.
& hoc probatur autoritate, & ratione. primò aut.
Isa. 65. dicentis. Ecce ego creo nouos Caelos, &
terram nouam, & non erunt in memoria priora.
& Apocalyp. 21. Vidi Cælum nouum. & terram
nouam: primum enim Cælum, & prima terra a-
biit. Secundò ratione, quæ est ista, Habitatio debet
habitatori congruere: sed homo, qui huius mundi
est habitator, innouabitur, ergo & mundus, qui
est factus, vt sit habitatio hominis, innouandus
est. cùm igitur mundus, (vt dictum est) propter
homines fuerit conditus, congruum est, diuinæq;
sapientiæ condecens, vt secundum varios humani
generi status, variè disponatur: quandiu autem
vita hæc humana mortalis durat, duplicem uti-
litatem nobis exhibet mundus: seruit enim nobis
primò ad alendum, propagandumq; genus nostrū,
per terræ nascentia, & animalium auxilia: Secun-
dò, ad habendam cognitionem per hæc, Dei Opt.
Max. inferiora; per hæc enim visibilia, (vt Apost.
dicit) sempiternam Dei virtutem contemplamur:
ergo his transactis necessitatibus, humanoque ge-
nere innouato, congruit, vt mundus quoq; innoue-
tur. iam enim inde à resurrectione carnis, neque
homo mundo indigebit ad viuendum, (quoniam
erit tunc immortalis, impassibilis, cibis non egens,
& impeccabilis:) neq; ad Deum contemplandum,
quippe cùm, in illa æternitate, Deum facie ad fa-

246 Quæstionum Theologicarum
ciem contemplabitur. Vnde, manifestum est,
quod mundus innouabitur, & perpetuò manebit
innouatus.

Vtrum motus corporum celestium per illam
innouationem sit cessaturus.

R E S O L V T I O.

Dicendum est secundum D. Thom. in 4. sent.
dist. 48. Q. 2. art. 2. & Dom. Sot. ibidem.
Q. itidem. 2. art. 2. quod, motus cæli, in
illa mundi innouatione, cessare, potest considera-
ri dupliciter. Vno modo, quod ille motus debeat
cessare ex aliqua causa naturali. & sic motus cæ-
li non cessabit, quia, vt volunt philosophi, motus
cæli est æternus. Alio modo, quod ille motus ces-
set in illa innouatione, ex aliqua causa superna-
turali, scilicet Diuina voluntate faciente. & sic,
sine dubio, secundum Catholicam fidem, dicen-
dum est, quod motus corporum cælestium cessabit
in illa mundi innouatione; ratio est, quia cum à
Deo sit præfinitus, & certus numerus electorum,
oportet, quod generatio hominum non in perpe-
tuum duret; similiter nec alia, quæ ad generatio-
nem hominis ordinantur, sicut est motus cæli, &
variationes elementorum. præterea, cessante tem-
pore, debet etiam cessare motus cæli, sed tempus
cessabit tunc, scilicet in illa mundi innouatione, er-
go & motus cæli cessabit sine dubio; Antecedens
patet.

patet: probatur cōsequens per illud *Apocalyp. 10.* iuravit *Angelus* per viuentē in secula, quōd postquam septimus *Angelus* tuba cecinerit: scilicet vt mortui resurgant, tempus amplius non erit, si non tempus, ergo nec motus. vltcrius, corpora cœlestia facta sunt propter hominem, in quantum ei deseruiunt ad sustentationem corporalis vitæ. Hoc autem modo, corpus cœleste seruit ei per motum, in quantum per motum Cœli, multiplicatur genus humanum, & generantur plantæ, & alia animalia, quæ vsui hominum sunt neecessaria, & temperies in aere efficitur conseruans sanitatem; Vndē, homine glorificato, motus cœli cessabit; quia homo, illo motu non indigebit amplius, sed omnes perfectiones, in Dei visione habebit. patet igitur, quōd motus corporum Cœlestium, per illam mundi innouationem, cessaturus est.

Vtrum mundus sit purgandus per ignem.

R E S O L V T I O.

Dicendum est secundum *D. Tho.* in 4. sent. distin. 47. Q. 2. art. 1. quōd mundus debet purgari per ignem, quæ purgatio vocatur innouatio mundi, qui circa tempus iudiciij innouabitur, vt superius dictum est, & illud magis tenetur auctoritate scripturæ, & sanctorum, quā ratione. Vndē, in *Psal. 49.* dicitur ignis in conspectu eius ardebit &c. & 2. pet. Vlt. Cœli ardent

248 Quæstionum Theologicarum
tes soluentur, & elementa ignis ardore tabescunt.
& ideo purgatio illa per ignem fiet, qui quidem
ignis creditur esse eiusdem speciei cum igne nostro.
Quod persuadetur sic, futura purgatio mundi erit
per ignem, sicut prima fuit per aquam, sed aqua
illa fuit eiusdem speciei cum aqua elementari, er-
go ille ignis erit eiusdem speciei cum igne nostro.
præterea, si quærat, an illa purgatio præcedat
iudiciū Dei, an sequatur; dicendum est quod præ-
cedet, secundum illud Psal. ignis ante ipsum præ-
cedet. & hoc etiam patet sic: Resurrectio mortuo-
rum præcedet iudicium, simul autem erit resur-
rectio mortuorum, & glorificatio corporum San-
ctorum: resurgent enim cum corporibus gloriosis,
simul etiam glorificabuntur corpora sanctorum &
renouabuntur elementa: cum ergo purgatio mun-
di per ignem sit dispositio vel actio ad prædictam
renouationem, manifestè sequitur, quod hæc pur-
gatio præcedit iudicium. & sic manifestum est,
quod mundus per ignem purgandus est.

Vtrum beatitudo sanctorum sit maior futura
post iudicium, quàm ante.

R E S O L V T I O.

Dicendum est secundum D. Tho. in 1.2. Q. 4.
art. 5. & Dur. in 4. sent. distin. 49. Q. 7.
quod, sine dubio maior erit gloria bea-
torum post iudicium, quàm ante, ratio est ista,
quia

quia beatitudo tunc erit non solum in anima, sed etiam in corpore: in anima simpliciter: in corpore autem secundum quid. & ideo ipsius anime beatitudo augebitur extensiuè, in quantum anima non solum gaudebit de bono proprio, sed etiam de bono corporis, cui vnita erit. præterea, sicuti bonis beatitudo redditur pro præmio, ita & malis miseria: sed miseria malorum, post resurrectionem corporum, erit maior, quàm antè; quia non solum in anima, (vt suprà dictum est) sed etiam in corpore punientur, scilicet non solum in anima quo ad intellectum, & voluntatem, sed etiam in corpore, quo ad sensualitatem; ergo & beatitudo Sanctorum erit maior, post resurrectionem corporum, quàm ante. & sic patet, quòd beatitudo Sanctorum erit maior post, quàm ante iudicium.

Vtrum beatitudo solum sit in patria.

R E S O L V T I O.

Dicendum est, quòd duplex est beatitudo: una vera, & altera apparens. vel una essentialis, & altera accidentalis. Vera beatitudo non potest esse nisi in patria, scilicet in Regno Cælorum, in quo Deum facie ad faciem videbunt omnes boni. Beatitudo verò apparens, siue accidentalis, est omne illud, quòd extra visionem Dei reperitur. Vera igitur beatitudo solum consistit

sit in visione Diuinæ essentiae. Apparens verò,
 non nisi in hoc mundo, scilicet in pecunia, delecta-
 tione corporali, & in cæteris huius mundi rebus
 temporalibus consistit. quòd autem beatitudo so-
 lum sit in patria scilicet in Regno Cælorum. pro-
 batur sic, vbi cor nostrum quiescit, & appetitus
 noster satiatur, ibi est vera beatitudo. sed cor no-
 strum non quiescit, & appetitus noster satiari non
 potest nisi in patria, scilicet in visione Diuinæ essen-
 tiæ, ergo vera beatitudo solum in patria reperitur.
 maior patet, quia vbi reperiuntur omnes perfectio-
 nes, ibi etiam vera reperitur beatitudo; sed vbi
 cor hominis quiescit, & voluntas illius satiatur,
 reperiuntur omnes perfectiones: igitur vbi cor ho-
 minis quiescit, & appetitus illius satiatur, vera re-
 peritur beatitudo. minor probatur aut. Beati Au-
 gust. dicentis, fecisti nos Domine ad te, & semper
 inquietum est cor nostrum, donec requiescat in te,
 & exemplo Davidis altera minoris pars proba-
 tur. Vna vice, disposuit Deus inuenire hominem
 secundum cor suum; sed inter homines vnum re-
 perit scilicet David: quo inuento, dixit ei Deus,
 pete à me quod vis, & dabo tibi. à quo quinque
 petijt. primò petijt nobilitatem. qua habita, dixit
 ei Deus. es ne contentus? non Domine. Da mihi
 secundum, scilicet uxorem pulchram. cui dedit
 Michol. Dedit & tertium, quia fecit eum capita-
 neum. dedit & quartum, scilicet victoriam con-

tra Philisteos. dedit & quintum, scilicet Regiam dignitatem. cui Deus dixit, es ne adhuc contentus? Respondit non Domine, sed satiabor cum apparuerit gloria tua. quòd autem hæc voluptas mundana sit apparens beatitudo, patet; quia non est delectatio corporis nostri, & mundi huius, quæ diu durare possit, imò statim transit. & dicam ulterius, quòd non solum voluptas transit, sed etiam ipse homo, & totus mundus iste, (qui propter hominem, ut ipso uteretur, factus est) pertransibit: illud autem, quod non durat, non est verum bonum, & vera beatitudo. quid enim habet homo in hac valle miseriæ, nisi calidum, frigidum, famem, sitim, infirmitatem, & denique ipsam mortem; & cui est similis homo, nisi cuidam aceruo niuis, qui sicut à calore resoluitur, sic homo putredine terræ, cinis efficitur. patet itaque ex superioribus, quòd beatitudo vera solum in patria reperitur, scilicet in visione Diuinæ essentiæ.

Vtrum damnati vellent plus non esse, quàm esse in miseria pœnæ.

R E S O L V T I O.

Dicendum est secundum D. Tho. in 4. sent. dist. 50. Q. 2. art. 1. & Dur. ibidem. Q. 2. quòd voluntas potest considerari dupliciter. Vno modo ut est natura quædam. Alio modo, ut est deliberativa voluntas. si consideretur primo modo,

modo, ut scilicet est natura quædam, sic nullo modo potest appetere non esse, quoniam non esse priuat totum bonum, malum verò pœnæ non priuat nisi vnum oppositum; non enim negat nisi gaudium, vel delectationem. & ideo naturali desiderio nullus potest appetere non esse, ad vitandum quodcunque malum, & pœnale esse, quia natura non odit pœnale esse nisi propter desiderium quietis ab illa pœna. Vnde, si quis diceret vellem non esse magis, quàm miserum esse. respondebo, mentiris: quia cùm esse miserum nolis, esse tamen vis. Si verò voluntas consideretur secundo modo, ut deliberans; tunc aut sequitur rationem rectā, aut rationem falso errore deceptam: si sequitur rationem rectam, tunc dicendum est, quod miserum esse quacunque miseria pœnæ magis est eligibile, quàm omninò non esse. nam non esse simpliciter est maius malum, cùm tollat esse totale, esse verò pœnale non tollit nisi esse partiale. Vnde, dicimus, quod esse in miseria pœnæ est minus malum: sed de duobus malis maius est magis fugiendum c. Duo mala dist. 13. ergo nullus simpliciter potest appetere non esse, quod est maius malum, ad fugiendam ipsam pœnam: ut dolorem, & tristitiam, quæ est minus malum. Si autem voluntas sequitur rationem erroneam; sic potest appetere magis non esse, quàm miserum esse: quoniam voluntas veluti Damnantorum credit, quod per non esse excludatur pœna eorum:

eorum: & idè appetunt damnati cōtra rationem non esse ad fugiendam pœnam. Vnde, hinc elicere possumus, quòd nullus debet se interficere ad fugiendum peccatum, nec minùs debet aliquod membrum, puta virile, abscindere, ad hoc vt fugiat fornicationem: vt faciunt nonnulli stulti, qui infligunt sibi mortem, vel virilia abscindunt, vel linguam, vel manum, ad hoc, vt fugiant peccata, quæ per illa membra instrumentaliter committuntur; & idè illi qui se totaliter interficiunt, credunt se habere quoddam esse occultum, in quo non possint peccare, sed hoc omninò bestiale, ac diabolicum est; quoniam qui vult dare sibi mortem, & non esse, vt fugiat peccatum, incidit in aliud graue peccatum mortale. sed benè debet vnusquisque sustinere mortem ab alio inflictam, & non à se, quàm mortaliter peccare. quoniam melius est mori, quàm contra bonum virtutis facere, & turpiter viuere. & sic patet, quòd nec homines Dam-nati, neq; demones possunt secundum rectam rationem appetere non esse, ad fugiendum malum pœnæ, quoniam obiectum voluntatis est bonum, sed non esse non habet aliquid boni, neq; veri: igitur illud appeti non potest. præterea, quandocunque aliquid appetitur propter aliud, vel habendū, vel fugiendum, tunc tale, vel est bonum verum, vel apparens bonum: idè si demones, & damnati appetunt non esse, non appetunt non esse verum, sed

sed appetunt nō esse apparens. credunt enim quod per non esse excludatur omne malum, sed non aduertunt, quod per non esse excludimur ab omni bono, ut dictum est. & sic manifestum est, q̄ Dam-nati non possunt secundum rectam rationem appetere non esse, sed benè secundum rationem erroneam, secundum quam intelligitur illud Apoc. 9. in diebus illis desiderabunt homines mortem, & fugiet mors ab eis.

Vtrum damnati nolint se peccasse.

R E S O L V T I O.

Dicendum est secundum D. Bonau. in 4. sent. dist. ult. art. 1. Q. 1. quod damnati nollent se peccasse, non cum displicentia peccati, sed cum displicentia pænæ; viuentē adhuc in eis peccandi voluntate. ideò sic intelligendum est in damnatis, quod dolor pænalis aufert ab ipsorum voluntate actum volendi peccare: quia damnati non appetunt luxuriari propter pœnas, quas ex illis actibus sentiunt se incurrisse: habent tamen habitum malæ voluntatis, per quam appeterent peccare, si non crederent se ex hoc puniri. cum ergo quæritur, an damnati nolint se peccasse, dicendum est, quod nolunt, non propter hoc, quod peccatum eis displiceat, quia iniustum: sed quia eis displicet pœna iusta: & ideò malam habent voluntatem hoc volendo: & sic adhuc viuit in eis voluntas

luntas peccandi, licet dolore pœnarum impediatur, ne exeat in actum suum. Vnde, manifestum est, quod damnati nollent se peccasse ratione pœnæ æternæ, quam patiuntur.

Vtrum damnati gloriam beatorum videant, & beati eorum pœnam.

R E S O L V T I O.

Dicendum est secundum D. Thom. in 4. sent. dist. ult. Q. 2. art. 4. & Dur. ibidem. Q. 3. & Scotum loco citato. Q. 3. quod damnati ante diem iudicij, videbunt Beatos in gloria existentes, visione intellectuâli, non tamen hoc modo, quod gloriam eorum, qualis sit cognoscant, sed solum perpendent intellectuâliter eos esse in gloria quadam inestimabili, & ex hoc turbabuntur, tum propter inuidiam, dolentes de felicitate eorum, tum propter hoc, quod ipsi talem gloriam amiserunt, ut dicitur Sap. 5. de impijs. Videntes turbabuntur timore horribili. post diem verò iudicij, omninò beatorum visione priuabuntur, nec tamen ex hoc eorum pœna minuetur, sed augebitur; quia recordabuntur gloriæ tam corporis, quàm animæ, quam in eis viderunt, & cognouerunt, & hoc erit eis in tormentum magnū. Si autem loquamur de Beatīs, tunc dicendum est secundum Scotum, loco citato, quod beati possunt cognoscere aliquid dupliciter. Vno modo in pro-

prio genere, seu cognitione sensibili. *Alio modo in verbo, siue in speculo essentia Diuina. & nota, quòd cognoscere aliquid in verbo, idest in essentia Diuina, nihil aliud est, quàm per cognitionem, qua cognosco essentiam Diuinam, & per illam cognoscere aliquam creaturã: tunc illa creatura, quæ cognoscitur, dicitur cognosci in verbo. Quantum igitur attinet ad primum modum, sine dubio beati in paradiso existentes non possunt pœnas damnatorum, ob indebitam, & improporcionatam inter obiectum, & potentiam, distantiam, videre. nam nimis distat Cælum à terra, gloria beatorum à pœna damnatorum. Quantum verò spectat ad secundum modum, distinguendum est de ipsis pœnis; vel enim loquimur de pœna damni, & sic à beatis huiusmodi pœna cognosci in verbo non potest, quia cùm priuatio Diuinæ beatitudinis, (sicut etiã culpa) non sit ens, non habet in Deo ideam, seu representatiuum quodpiam, sed talis priuatio cognoscitur per aliud, scilicet per habitum, vt dicit Philosophus. vel loquimur de pœna sensus, cuiusmodi est pœna ignis, remorsus conscientia tristitia, & huiusmodi: & sic beati in Cælo Empyreo existentes, possunt in verbo, omnem pœnam sensus damnatorum existentium in inferno videre; ratio est ista, quia pœna sensus est ens positium, quod suam habet ideam in verbo, idest potest cognosci in verbo, scilicet in notitia*

titia habita de Diuina essentia, per quam cognoscitur verbum, vel essentia. Quod autem congruum sit, quod beati pœnas damnatorum cognoscant, patet per D. Tho. & Dur. locis citatis. in-
quiunt enim isti, nihil quod est perfectionis sub-
trahendum est beatis, & maximè si ordinatur ad
laudem Dei; sed quod beati cognoscant pœnas ma-
lorum, hoc pertinet ad perfectionem gloriæ eo-
rum, est enim materia laudis Diuinæ, dum san-
cti per gratiam Dei euaserunt pœnas, quas mise-
ri peccatores incurrerunt; ergo vt beatitudo San-
ctorum eis magis placeat, & vt de eis vberiores
gratias Deo agant, rationabile est, & congruum,
quod pœnas malorum cognoscant. & sic patet,
quod beati ante, & post iudicium (vt etiam dicit
Magist. sent.) videbunt pœnas damnatorum sen-
sibiles. mali autem ante iudicium, in generali, co-
gnitione intellectuâli videbunt bonos in patria exi-
stentes & post iudicium verò minimè, sed tantum me-
moriâ habebunt gloriæ eorum; & hoc eis ad ma-
gnum erit tormentum, vt dictum est.

Vtrum beati lætentur de pœnis dam-
natorum.

R E S O L V T I O.

Dicendum est secundum D. Tho. in 4. sent. dist.
vlt. Q. 2. art. vlt. quod aliquid potest esse
materia gaudiij dupliciter. Vno modo per se, sci-

R 2 licet

licet quando de aliquo gaudetur in quantum huiusmodi : & sic Sancti , & beati non latabuntur de pœnis impiorum . Alio modo per accidens , id est ratione alicuius adiuncti , & hoc modo , beati de pœnis impiorum gaudebunt , considerando in eis Diuinæ iustitiæ rectitudinem , & suam liberationem . Vnde , Diuina iustitia , & sua liberatio erunt per se causa gaudiij beatorum , sed pœnæ damnatorum per accidens . præterea , sciendum est , quòd simpliciter loquendo , Deus , & beati nolunt damnatorum pœnas , sed solum secundum quid , id est propter iustitiam , & reordinationem culpæ : imò si placeret Deo , beati vellent eorum liberationem , aut saltem non displiceret eis , si soluerentur à pœnis ; non enim libenter vident eos in igne esse condemnatos , nisi quatenus ita ordinatum est à Deo : nec per hoc tristantur beati , quoniam conformant se Diuinæ voluntati ; & cum teneantur conformare voluntatem suam voluntati Diuinæ in voluto , & voluntas Diuina velit istas pœnas esse in illis , consequens est , quòd etiam beati velint damnatos in igne æterno cruciari . tu dices , igitur gaudebunt beati vidētes , & volentes pœnas : dico , q̃ sic , latabitur enim iustis cum viderit vindictam , (vt dicit Propheta Psal. 57.) & hoc ideò erit , quia videbunt istas pœnas infligi secundū Diuinam iustitiam . patet igitur , quòd beati , secundum Dei iustitiam , de pœnis impiorum latantur .

Vtrum

Vtrum damnati habeant Deum odio.

R E S O L V T I O.

Dicendum est secundum D. Tho. in 4. sent. dist. 50. Q. 2. art. 1. Quæst. 5. quod Deus potest considerari dupliciter. Vno modo ratione sui, & sic nullus Deum odire potest: quoniam Deus in seipso, cum sit per essentiam bonus, non potest alicui voluntati displicere. Vnde, quicumque eum per essentiam videt, eum odio habere non potest. Alio modo potest considerari Deus ratione quorundam iustitiæ effectuum, qui voluntati repugnant, in quantum contrariantur alicui: & sic aliquis hoc modo Deum odire potest. Damnati ergo Deum percipientes in effectui iustitiæ, qui est pœna, eum odio habent; sicuti etiam pœnas quas sustinent. Vnde, manifestum est, quod Deum odio habent damnati, non in seipso, scilicet ratione suæ Diuinæ essentiæ, quæ est ipsa bonitas, sed respectu quorundam effectuum, scilicet ratione pœnæ sensus, & damni, quæ quidem pœna, est effectus iustitiæ Diuinæ. & hæc satis dicta sint. Si quæ autem inordinatè, & contra veritatem Sanctæ Matris Ecclesiæ fortè dicta essent, tanquam non dicta sint. me enim primò Domino, & Patri meo Iesu Christo, secundariò autem S. Matris Ecclesiæ penitus subijcio.

Laus Deo Opt. Max. Qui Trinus, & Vnus est

F I N I S.



AD EXCELLENTISS.

PAVLVM FRANZOSVM

Doctorem Theologum.

MALFACTI SALVATORIS

Iuris Vtr. Doct. Tridentini.

Epigramma.



*M*mensus, pulcher, velox describi-
tur orbis,

Et tempus sapiens, athereumque
canunt.

Tu velox; volitas etenim super
athera mente:

Magnus, quòd morum te Dea magna colit;

Virtute es pulcher, sapiens caelestis origo;

Est in te mundus: tu Deus alter humi.

PETRI ALBERTI BENACEN-

sis Aliud.

*M*Undi prudentes querebant plurimi, an vnus
Esset ab aeterno numine dispositus.

Tu; qui vnum vno ictu velox percurris, an esse
Plures inspicies feruidus ingenio?

Andreas

ANDREAE MALFACTI
Iur. Vtr. Doct. Brentonicen-
sis, Prætoris Ripæ.

Epigramma.



*Spiritus Aetereus cum sit tibi, Pau-
le, Quærens
Cœlica, tu viues tempus in omne
memor.
Cum Sacræ Sophiæ neſtas, no-
dosque resoluas,
Nomine, & ingenio Paulus altereris.*

FRANCISCI CONTARENI,
Thadæi Patritij Veneti Filij, Philo-
sophiæ Doctores, Aliud.

*Q**Valis apes varios decerpit sedula flores,
Et cogit pressis dulcia mella fauis;
Talis, quæ varij scripserunt ordine longo
Paulus in hunc magna congerit arte librum,
Atq; hoc exiguo cultoq; volumine claudit,
Plurima quæ nobis vix monumenta dabant:
Tantum ergo ille alijs maior censebitur esse,
Quantum pars toto dicitur esse minor.*

FINIS.

FL. 225



B R I X I A E,

A P V D Polycretum Turlinum. 1592.

Permissu Superiorum.

2952237

Am. 3	2
Am. 3	4
Am. 3	3
Am. 3	
Am. 3	1
Am. 3	
Am. 3	1
Am. 3	



BIBLIOTECA